

Tawureta Munsa Isirayila xa Konti Tife Masenyi nde yi Kitaabui xa fe ra

Annabi Munsa xa kitaabui naani nde kui, Isirayila jama xa taruxui nde masenxi naa naxan tide gbo danxaniyatɔɛ birin bɛ. Alatala nu bara Isirayila ramini Misira konyiya kui sigafe ra Kanaan bɔxi ma, a dennaxɛ laayidixi e benbae bɛ. Na sigɛ kui a nu lanma e xa gbengberenyi igiri. E to Turusinina geya li, Alatala naxa mini jama ma alako e xa gaaxu a ya ra, e man xa a xa seriyɛ kolon.

Kɔnɔ na dangi xanbi, Isirayila naxa tagan na jɛrɛ ma, Ala naxa e xɔnɔ xui mɛ. Ala nu fe birin nabama alako e xa a kolon a na mɛɛnife e ma biyaasi kui, kɔnɔ e mu wasa na ra. E to makɔrɛ Kanaan bɔxi ra, Ala naxa mixie sugandi e ya ma naxee siga naa rabende. Nee xa dɛntɛgɛ naxa a niya Isirayila xa kontɔfili a jaaxi ra, e fa tondi sigade na bɔxi suxude.

Na kui Alatala naxa nate tongo na mixie xili ma, naxee minixi Misira bɔxi ma, a e sese mu nu nɔma Kanaan bɔxi masɔtɔde fa, fo e xa die. Isirayila jama naxa jɛ tongo naani raba gbengberenyi ma, alako forie birin xa faxa, e xa die xa mɔ na biyaasi kui.

A rapɔnyi, e naxa makɔrɛ Kanaan naaninyi ra. Mowabakae mu tin e xa so, kɔnɔ Ala naxa a masen a fixɛ ra a sese mu nɔma a niyade a xa

a xa ꝓama Isirayila rabeꝓin. Hali e to bara nu yunubi soꝓo, Ala e ꝓaxankataxi naxan ma fe ra, a mu danyi sa a xa hinne ma e be.

Seriye nan na ki danxaniyatoe birin be. Yunubi mu fan, a Ala raxoꝓoma. Won na gbilen Ala xa seriye foxo ra, won xa a kolon na mu findima fe fanyi ra won be. Koo Ala yuge na ki naxe, hali a yunubitoe ꝓaxankata a xa yunubie xa fe ra, a man kate birin nabama alako a xa tin a xa hinne ra naxan noꝓa findide kisi ra a be abadan. Ala tinxin, a xa kiiti mu kanama. Koo a xa xanunteya gbo dangi fe birin na. A wama ibunadama birin xa lu a xa ꝓama ya ma, e fa so ariyanna. Ala xa na raba won birin be. Amina.

Tawureta Munsa Isirayila xa Konti Tife

Isirayila xeme konti tife

¹ Isirayilakae xa mini Misira ꝓe firin nde, kike firin nde, xi singe, Alatala naxa a masen Munsa be Turusinina gbengberenyi ma hoꝓomolingira kui,

² «Wo xa Isirayila xeme birin konti a xabile nun a denbaya ki ma,

³ naxee xa simaya bara ꝓe moꝓoꝓen li, naxee noꝓa findide Isirayila soꝓrie ra. I nun Haruna, wo xa e itaxun soꝓri gaali ki ma.

⁴ Bonsoe xunyiye xa wo mali na wali kui.

⁵ E xilie nan ya:

Ruben bonsoe ya ma, Sedeyuri xa di xeme Elisuru.

- 6 Simeyon bõnsõε ya ma, Surisadayi xa di xeme Selumiyeli.
- 7 Yuda bõnsõε ya ma, Aminadabo xa di xeme Naxason.
- 8 Isakari bõnsõε ya ma, Suwara xa di xeme Netaneeli.
- 9 Sabulon bõnsõε ya ma, Xelon xa di xeme Eliyabi.
- 10 Yusufu xa di xeme Efirami bõnsõε ya ma, Amixudi xa di xeme Elisama.
Yusufu xa di xeme Manasi bõnsõε ya ma, Pedasuru xa di xeme Gamaliyeli.
- 11 Bunyamin bõnsõε ya ma, Gideyoni xa di xeme Abidan.
- 12 Dana bõnsõε ya ma, Amisadayi xa di xeme Axiyeseri.
- 13 Aseri bõnsõε ya ma, Okiran xa di xeme Pagiyeeli.
- 14 Gadi bõnsõε ya ma, Duweli xa di xeme Eliyasafa.
- 15 Nafatali bõnsõε ya ma, Enan xa di xeme Axira.»
- 16 Na bõnsõε xunyie nan xilixi, e xa findi Isirayila sõõri mangεε ra.
- 17 E naxa kafu Munsa nun Haruna ma,
- 18 e xa Isirayila jama malan, na kike firin nde, xi singe. Xeme birin naxee xa simaya nu bara jε mõxõjεn li, e naxa e tengε e xabile nun e denbaya ki ma,
- 19 alõ Alatala a yamari ki naxε. Munsa naxa e tengε Turusinina gbengberenyi ma.
- 20 E naxa Isirayila xa di singe Ruben bõnsõε birin tengε e xabile nun e denbaya ki ma. E

naxa xemee xili sebe, naxee xa simaya nu bara je moxoren li, naxee nu noma soorija rabade.

²¹ Na xasabi lan ne xeme wulu tongo naani nun senni, xeme keme suuli nan ma.

²² E naxa Simeyon bonsoe birin tenge e xabile nun e xa denbaya ki ma. E naxa xemee xili sebe, naxee xa simaya nu bara je moxoren li, naxee nu noma soorija rabade.

²³ Na xasabi lan ne xeme wulu tongo suuli nun solomanaani, xeme keme saxan nan ma.

²⁴ E naxa Gadi bonsoe birin tenge e xabile nun e xa denbaya ki ma. E naxa xemee xili sebe, naxee xa simaya nu bara je moxoren li, naxee nu noma soorija rabade.

²⁵ Na xasabi lan ne xeme wulu tongo naani nun suuli, xeme keme senni tongo suuli nan ma.

²⁶ E naxa Yuda bonsoe birin tenge e xabile nun e xa denbaya ki ma. E naxa xemee xili sebe, naxee xa simaya nu bara je moxoren li, naxee nu noma soorija rabade.

²⁷ Na xasabi lan ne xeme wulu tongo solofere nun naani, xeme keme senni nan ma.

²⁸ E naxa Isakari bonsoe birin tenge e xabile nun e denbaya ki ma. E naxa xemee xili sebe, naxee xa simaya nu bara je moxoren li, naxee nu noma soorija rabade.

²⁹ Na xasabi lan ne xeme wulu tongo suuli nun naani, xeme keme naani nan ma.

³⁰ E naxa Simeyon bonsoe birin tenge e xabile nun e xa denbaya ki ma. E naxa xemee xili sebe, naxee xa simaya nu bara je moxoren li, naxee nu noma soorija rabade.

³¹ Na xasabi lan ne xeme wulu tongo suuli nun solofere, xeme keme naani nan ma.

³² E naxa Yusufu xa di xeme Efirami bonsɔɛ birin tɛngɛ e xabile nun e xa denbaya ki ma. E naxa xemɛɛ xili seɓɛ, naxee xa simaya nu bara ɲɛ mɔxɔɲɛn li, naxee nu nɔma sɔɔriɲa rabade.

³³ Na xasabi lan ne xeme wulu tongo naani, xeme keme suuli nan ma.

³⁴ E naxa Yusufu xa di xeme Manasi bonsɔɛ birin tɛngɛ e xabile nun e xa denbaya ki ma. E naxa xemɛɛ xili seɓɛ, naxee xa simaya nu bara ɲɛ mɔxɔɲɛn li, naxee nu nɔma sɔɔriɲa rabade.

³⁵ Na xasabi lan ne xeme wulu tongo saxan nun firin, xeme keme firin nan ma.

³⁶ E naxa Bunyamin bonsɔɛ birin tɛngɛ e xabile nun e xa denbaya ki ma. E naxa xemɛɛ xili seɓɛ, naxee xa simaya nu bara ɲɛ mɔxɔɲɛn li, naxee nu nɔma sɔɔriɲa rabade.

³⁷ Na xasabi lan ne xeme wulu tongo saxan nun suuli, xeme keme naani nan ma.

³⁸ E naxa Dana bonsɔɛ birin tɛngɛ e xabile nun e xa denbaya ki ma. E naxa xemɛɛ xili seɓɛ, naxee xa simaya nu bara ɲɛ mɔxɔɲɛn li, naxee nu nɔma sɔɔriɲa rabade.

³⁹ Na xasabi lan ne xeme wulu tongo senni nun firin, xeme keme solofere nan ma.

⁴⁰ E naxa Aseri bonsɔɛ birin tɛngɛ e xabile nun e xa denbaya ki ma. E naxa xemɛɛ xili seɓɛ, naxee xa simaya nu bara ɲɛ mɔxɔɲɛn li, naxee nu nɔma sɔɔriɲa rabade.

⁴¹ Na xasabi lan ne xeme wulu naani nun keren, xeme keme suuli nan ma.

⁴² E naxa Nafatali bonsɔɛ birin tɛngɛ e xabile nun e xa denbaya ki ma. E naxa xemɛɛ xili seɓɛ,

naxee xa simaya nu bara ꞑe mɔxɔɓen li, naxee nu nɔma sɔɔriɓa rabade.

⁴³ Na xasabi lan ne xeme wulu tongo suuli nun saxan, xeme keme naani nan ma.

⁴⁴ Isirayila bɔnsɔɓe xunyi fu nun firinyi nan kafu Munsa nun Haruna ma na tenge tife ra.

⁴⁵ Isirayila xeme naxee nu bara ꞑe mɔxɔɓen li, naxee nu nɔma sɔɔriɓa rabade,

⁴⁶ nee nu lanxi xeme wulu keme senni nun saxan, xeme keme suuli nun tongo suuli nan ma.

⁴⁷ Kɔnɔ Lewi bɔnsɔɓe mu nu na na konti ya ma,

⁴⁸ barima Alatala nu bara a masen Munsa be,

⁴⁹ «I naxa Lewikae tenge Isirayilakae ya ma.

⁵⁰ I xa hɔrɔmɔlingira nun a xa se birin taxu e ra. N ma saate tɔnxuma na a ra. E xa a maxanin, e xa mɛɛni a ma, e xa yonkin a rabilinyi ra.

⁵¹ Wo na keli sigade, e xa a ragoro. Wo na yire neene li, e xa a ti. Xa mixi gbete a maso a ra naxan mu findi Lewi bɔnsɔɓe ra, na kanyi lan ne a xa faxa.

⁵² Isirayilaka birin xa yonkin yire e na dennaxe masen e be, e bɔnsɔɓe xa tɔnxuma bun ma, a nun e xa sɔɔrie.

⁵³ Lewi bɔnsɔɓee xa yonkin hɔrɔmɔlingira rabilinyi, xa na mu a ra n xɔnɔma ne Isirayila ɓama ma. Lewikae xa e ɓengi sa hɔrɔmɔlingira xɔn ma.»

⁵⁴ Isirayilakae naxa Alatala xa yaamari birin suxu, a naxan soxi Munsa yi ra.

2

Bɔnsɔɓee dɔxo ki

¹ Alatala naxa a masen Munsa nun Haruna be,

² «Isirayilaka birin yonkinma e xabile xa tɔnxuma nan bun ma. E birin ya rafindima e booree nan ma, hɔrɔmɔlingira fa lu e tagi.»

³ Yuda bɔnsɔɛ nan yonkinma sogetede mabiri e xa tɔnxuma bun ma. Aminadabo xa di Naxason nan e xa yarerati ra.

⁴ A xa sɔɔrie xasabi lan mixi wulu tongo solofere nun naani, mixi kɛmɛ senni nan ma.

⁵ Isakari bɔnsɔɛ nan yonkinma Yuda bɔnsɔɛ sɛɛti ma e xa tɔnxuma bun ma. Suwara xa di Netaneeli nan e xa yarerati ra.

⁶ A xa sɔɔrie xasabi lan mixi wulu tongo suuli nun naani, mixi kɛmɛ naani nan ma.

⁷ Sabulon bɔnsɔɛ nan yonkinma Yuda bɔnsɔɛ sɛɛti ma e xa tɔnxuma bun ma. Xelon xa di Eliyabi nan e xa yarerati ra.

⁸ A xa sɔɔrie xasabi lan mixi wulu tongo suuli nun solofere, mixi kɛmɛ naani nan ma.

⁹ Gali naxan yonkin Yuda bɔnsɔɛ mabiri, e xasabi lan mixi wulu kɛmɛ mixi wulu tongo solomasaxan nun senni, mixi kɛmɛ naani nan ma. E tan nan tima yare ra.

¹⁰ Ruben bɔnsɔɛ nan yonkinma sogetede mabiri e xa tɔnxuma bun ma. Sedeyuri xa di Elisuru nan e xa yarerati ra.

¹¹ A xa sɔɔrie xasabi lan mixi wulu tongo naani nun senni, mixi kɛmɛ suuli nan ma.

¹² Simeyɔn bɔnsɔɛ nan yonkinma Ruben bɔnsɔɛ sɛɛti ma e xa tɔnxuma bun ma. Surisadayi xa di Selumiyeli nan e xa yarerati ra.

¹³ A xa sɔɔrie xasabi lan mixi wulu tongo suuli nun solomanaani, mixi kɛmɛ suuli nan ma.

14 Gadi bõnsõe nan yonkinma Ruben bõnsõe sèeti ma e xa tònxuma bun ma. Duweli xa di Eliyasafa nan e xa yarerati ra.

15 A xa sòorie xasabi lan mixi wulu tongo naani nun suuli, mixi keme senni nun tongo suuli nan ma.

16 Gali naxan yonkin Ruben bõnsõe mabiri, e xasabi lan mixi wulu keme mixi wulu tongo suuli nun keren, mixi keme naani nun tongo suuli nan ma. E tan nan sigama a firin nde.

17 Lewi bõnsõe naxan yonkinma e tagi, a birama e foxo ra hõrõmõlingira xanife ra. Bõnsõe birin jere ma e safe ki nan ma e xa tònxuma bun ma.

18 Efirami bõnsõe nan yonkinma sogegorode mabiri e xa tònxuma bun ma. Amixudi xa di Elisama nan e xa yarerati ra.

19 A xa sòorie xasabi lan mixi wulu tongo naani, mixi keme suuli nan ma.

20 Manasi bõnsõe nan yonkinma Efirami bõnsõe sèeti ma e xa tònxuma bun ma. Pedasuru xa di Gamaliyeli nan e xa yarerati ra.

21 A xa sòorie xasabi lan mixi wulu tongo saxan nun firin, mixi keme firin nan ma.

22 Bunyamin bõnsõe nan yonkinma Efirami bõnsõe sèeti ma e xa tònxuma bun ma. Gideyoni xa di Abidan nan e xa yarerati ra.

23 A xa sòorie xasabi lan mixi wulu tongo saxan nun suuli, mixi keme naani nan ma.

24 Gali naxan yonkin Efirami bõnsõe mabiri, e xasabi lan mixi wulu keme mixi wulu solo-masaxan, mixi keme nan ma. E tan nan sigama a saxan nde.

²⁵ Dana bɔnsɔɛ nan yonkinma yirefanyi mabiri e xa tɔnxuma bun ma. Amisadayi xa di Axiyeseri nan e xa yarerati ra.

²⁶ A xa sɔɔrie xasabi lan mixi wulu tongo senni nun firin, mixi kɛmɛ solofere nan ma.

²⁷ Aseri bɔnsɔɛ nan yonkinma Dana bɔnsɔɛ sɛɛti ma e xa tɔnxuma bun ma. Okiran xa di Pagiyeɓi nan e xa yarerati ra.

²⁸ A xa sɔɔrie xasabi lan mixi wulu tongo naani nun keren, mixi kɛmɛ suuli nan ma.

²⁹ Nafatali bɔnsɔɛ nan yonkinma Dana bɔnsɔɛ sɛɛti ma e xa tɔnxuma bun ma. Enan xa di Axira nan e xa yarerati ra.

³⁰ A xa sɔɔrie xasabi lan mixi wulu tongo suuli nun saxan, mixi kɛmɛ naani nan ma.

³¹ Gali naxan yonkin Dana bɔnsɔɛ mabiri, e xasabi lan mixi wulu kɛmɛ mixi wulu tongo suuli nun solofere, mixi kɛmɛ senni nan ma. E tan nan sigama a dɔnxɔɛ ra e xa tɔnxumae bun ma.

³² Isirayilaka naxee tengɛ e xabilɛ ki ma nun e xa sɔɔri gali ki ma, e xasabi lan mixi wulu kɛmɛ senni nun saxan, mixi kɛmɛ suuli nun tongo suuli nan ma.

³³ Lewi bɔnsɔɛ tan mu tengɛ Isirayilakae xun ma, alo Alatala a masen ki naxe Munsa bɛ.

³⁴ Isirayilakae naxa bira Alatala xa yaamari birin fɔxɔ ra, alo a Munsa yamari a ra ki naxe. E nu yonkinma e xa tɔnxuma nan bun ma, e man nu jɛrɛma e xabile nun e xa denbaya ki nan ma.

3

Sɛrɛxɛdubɛɛ

¹ Haruna nun Munsa xa taruxui nan ya, Alatala to woyen Munsa be Turusinina geya ma.

² Haruna xa di xemee xilie nan yi ki: a xa di xemee singe nu xili ne Nadabo, a xunyae, Abihu, Eleyasari, nun Itamari.

³ Nee nan sugandixi e xa findi serexedubee ra.

⁴ Konɔ Nadabo nun Abihu naxa faxa Alatala ya i e to serexe gan te ra naxan mu lanxi. E mu di yo sɔɔ, konɔ Eleyasari nun Itamari naxa lu serexedubeɲa kui e baba Haruna xa yaamari bun ma.

⁵ Alatala naxa a masen Munsa be,

⁶ «I xa Lewi bɔnsɔe masen Haruna be, e xa a mali a xa serexedube wali kui.

⁷ E xa Haruna nun Isirayila jama mali hɔrɔmɔlingira wali kui.

⁸ E xa e jɔxɔ sa hɔrɔmɔlingira raxunmasee xɔn na, e man xa hɔrɔmɔlingira wali raba Isirayilakae be.

⁹ Na kui i Lewi bɔnsɔe sama Haruna nun a xa di xemee nan sago. E sugandixi Isirayilakae ya ma Haruna malife nan na.

¹⁰ I xa Haruna nun a xa die nan tun ti serexedube wali rabafe ra. Xa mixi gbete sa a maso hɔrɔmɔlingira ra, na kanyi xa faxa.»

¹¹ Alatala naxa a masen Munsa be,

¹² «N bara Lewi bɔnsɔe sugandi Isirayilakae tagi Isirayila ginnee xa di singe birin jɔxɔe ra. Na bɔnsɔe findixi n gbe nan na,

¹³ barima n gbe nan na di xemee singe birin na. N to di xemee singe birin faxa Misira bɔxi ma, n naxa Isirayila di xemee singe birin sugandi n yete be, a findi mixi ra, a findi xuruse ra. N tan nan na Alatala ra.»

Lewi bɔnsɔɛ tɛngɛfɛ

¹⁴ Alatala naxa a masen Munsa bɛ Turusinina gbɛngberenyi ma,

¹⁵ «Lewi bɔnsɔɛ tɛngɛ a denbaya nun a xabile ki ma. Xɛmɛ birin tɛngɛma nɛ naxan ma simaya bara kike keren li.»

¹⁶ Munsa naxa e tɛngɛ alɔ Alatala a yamari ki naxɛ.

¹⁷ Lewi xa di xɛmɛɛ xilie nan yi ki:

Gerison, Kehati, nun Merari.

¹⁸ Gerison xa di xɛmɛɛ xilie nan yi ki a xabile ki ma:

Libini nun Simeyi.

¹⁹ Kehati xa di xɛmɛɛ a xabile ki ma:

Amarama, Yisehari, Xebiron nun Yusiyeli.

²⁰ Merari xa di xɛmɛɛ a xabile ki ma:

Maxali nun Musi.

Lewi xabile nan na ki e xa denbaya ki ma.

²¹ Gerison bɔnsɔɛ nu na Libini Simeyi xabile nan na.

²² Naxee xa simaya nu bara kike keren li, e xasabi lan mixi wulu solofere mixi kɛmɛ suuli nan ma.

²³ Gerison xabile nu yonkinma hɔrɔmɔlingira nan xanbi ra sogegorode mabiri ra.

²⁴ E xunyi nu na Layeli xa di xɛmɛ Eliyasafa nan na.

²⁵ Gerison xa mixie nu e jɔxɔɛ saxi hɔrɔmɔlingira nan xɔn ma, nun mafelenyi naxan felenma a xun ma, a nun a sode dɛ ra,

²⁶ a nun kɔlime naxee nu sama hɔrɔmɔlingira nun sɛrɛxɛbade rabilinyi ma, a nun na tɛtɛ sode dɛ ra, a nun luutie e na maxirima naxee ra.

²⁷ Kehati xa mixie nan yi ki: Amarama xabile, Yisehari xabile, Xebiron xabile, nun Yusiyeli

xabile. Na xabilee nan minixi e benba Kehati ma.

²⁸ E xa di xeme naxee xa simaya nu bara kike keren li, e xasabi lan mixi wulu solomasaxan keme senni nan ma. Kehati xa mixie nan nu meenima horomolingira ma.

²⁹ E tan nu yonkinma horomolingira yirefanyi mabiri ne.

³⁰ Yusiyeli xa di xeme Elisafan nan nu na e xunyi ra.

³¹ Horomolingira saate kankira, teebili, lanpuie, serexebadee, yirabase naxee rawalima yire seniye nxi kui, nun dugi yarasa naxan na horomolingira kui, e nu taxuxi e tan nan na.

³² Lewi bonsae birin xunyi nu na Haruna xa di xeme Eleyasari nan na. A tan nan nu Lewi bonsae mixie xun ma, naxee meenima horomolingira ma.

³³ Merari xa mixie nan yi ki: Maxali xabile nun Musi xabile.

³⁴ E xa di xeme naxee xa simaya nu bara kike keren li, e xasabi lan mixi wulu senni keme firin nan ma.

³⁵ Abixayili xa di xeme Suriyeli nan nu na Merari xabilee xunyi ra. E nu yonkinma horomolingira kola mabiri ne.

³⁶ Horomolingira xebenyie, a wuri kuyee, a kontigibae, a sanbunye, a xa yirabase, nun a rawalisee nu taxuxi e tan nan na.

³⁷ E man nu e joxo sama kontigibae xon ma naxee nu horomolingira tete rabilinxi, a nun e sanbunye, e xa koridie, nun e xa luutie.

³⁸ Munsa, Haruna, nun a xa di xeme nu yonkinma horomolingira sode de nan na sogetede

mabiri. E tan nan nu e ɲɔɔ sama hɔrɔmɔlingira xɔn ma Isirayilaka birin xili ra. Xa mixi gbete sa a maso hɔrɔmɔlingira ra, na kanyi xa faxa.

³⁹ Lewi bɔnsɔe di xeme naxee xa simaya nu bara kike keren li, e xasabi lan mixi wulu mɔxɔɲen nun firin nan ma. Munsa nun Haruna nu bara e tenge e xabile ki ma alɔ Alatala e yamari ki naxe.

⁴⁰ Alatala naxa a masen Munsa be, «Di xeme singe birin tenge Isirayilakae ya ma, naxee simaya bara kike keren li, i xa e xilie sebe.

⁴¹ Lewi bɔnsɔe xa findi Isirayila di xeme singe birin ɲɔɔe ra. Lewi bɔnsɔe xa gɔɔɔe xa findi Isirayilakae xa xurusee di singee ɲɔɔe ra. N tan nan na Alatala ra.»

⁴² Munsa naxa Isirayila di xeme singe birin tenge alɔ Alatala a yamari ki naxe.

⁴³ Isirayila di xeme singe birin naxee xa simaya bara kike keren li, e xasabi lan mixi wulu mɔxɔɲen nun firin mixi keme firin tongo solofere nun saxan nan ma.

⁴⁴ Alatala naxa a masen Munsa be,

⁴⁵ «Lewi bɔnsɔe xa findi Isirayila di xeme singe birin ɲɔɔe ra. Lewi bɔnsɔe xa gɔɔɔe xa findi Isirayilakae xa xurusee di singee ɲɔɔe ra. N tan nan na Alatala ra.

⁴⁶ Na Isirayila di xeme singe mixi keme firin tongo solofere nun saxan naxee xasabi dangi Lewi bɔnsɔe konti ra,

⁴⁷ i xa kankan xun sara gbeti giramu tongo suuli nun solofere ra naxan mɔoli rawalima hɔrɔmɔlingira kui.

⁴⁸ I xa na gbeti so Haruna nun a xa di xeme yi

ra, di singee xunsare ra naxee xasabi nu dangi Lewi bɔnsɔɛ xasabi ra.»

⁴⁹ Munsa naxa na gbeti suxu naxan fixi di singee xunsare xa fe ra, naxee xasabi nu dangi Lewi bɔnsɔɛ xasabi ra.

⁵⁰ A naxa na gbeti kilo fu nun suuli nun a tagi rasuxu Isirayila di singee yi ra. Gbeti nan a ra naxan nu rawalima hɔrɔmɔlingira kui.

⁵¹ Munsa naxa na xunsare gbeti so Haruna nun a xa di xɛmɛɛ yi ra alo Alatala a yamari ki naxɛ.

4

Kehati xa mixie

¹ Alatala naxa a masen Munsa bɛ,

² «Kehati xa die tɛngɛ Lewi bɔnsɔɛɛ ya ma a xabile nun a denbaya ki ma,

³ naxee xa simaya bara ɲɛ tongo saxan li han ɲɛ tongo suuli, naxee fama hɔrɔmɔlingira wali rabade.

⁴ Kehati xa die lanma e xa mɛɛni se sɛniyɛnxie ma naxee na hɔrɔmɔlingira kui.

⁵ Isirayilakae na keli sigade, Haruna nun a xa di xɛmɛɛ xa dugi yarasa ragoro, e saate kankira makoto a ra.

⁶ Na dangi xanbi e xa foye yɛxɛ kiri sa na fari, a nun gɛɛ dugi. A dɔnxɔɛ ra e xa wuri kuyee raso kankira tongosee ra.»

⁷ «E na gɛɛ dugi gbɛɛ itala teebili ma, e xa piletie, tɔnbilie, nun kundie sa na fari, naxee rawalima wɛni sɛɛxɛɛ ra. Taami naxan bama sɛɛxɛ ra, na fan sama nɛ na teebili nan fari.

⁸ E dugi gbeeli nan sama na birin xun ma, e fa foye yexe kiri itala na fari. Na dangi xanbi e xa wuri kuyee raso teebili tongosee ra.»

⁹ «E xa gere dugi dusu lanpui doxoŋe, lanpuie, a yirabasee, xube sasee, nun ture kundie xun ma.

¹⁰ E xa na birin mafilin foye yexe kiri nan kui, e fa a sa xaninse fari.

¹¹ E xa gere dugi itala serexebade xema daaxi fari, e fa a makoto foye yexe kiri ra, e wuri kuyee raso a tongosee ra.

¹² Na hɔrɔmɔlingira raxunmase birin makotoma gare dugi nan na, e e mafilin foye yexe kiri kui, e fa na sa xaninse fari.

¹³ E xa xube ba serexebade wure gbeeli daaxi kui, e fa dugi gbeeli dusu a xun na.

¹⁴ E na a yirabasee sa a fari, alɔ surayi gansee, suxumɛ, pelie, nun pɔɔti xungbee, e xa na birin mafilin foye yexe kiri ra, e fa wuri kuyee raso a tongose ra.

¹⁵ Haruna nun a xa di xeme na ge na xunmase seniyenxie nun a yirabasee makotode, Kehati xa die lanma e xa na birin xanin biyaasi kui. Kɔnɔ e mu lanma e xa din na se seniyenxie ra xa na mu e faxama nɛ. Kehati bɔnsɔɛe xa wali nan na ki.

¹⁶ Haruna serexedube xa di xeme Eleyasari nan a joxɔ sama lanpui ture, surayi, sansi serexe, nun ture seniyenxi xɔn ma. Hɔrɔmɔlingira raxunmase seniyenxie nun a yirabase birin taxuxi a tan nan na.»

¹⁷ Alatala naxa a masen Munsa nun Haruna be,

¹⁸ «Wo naxa lu Kehati bɔnsɔɛ xabilɛe xa ba Lewi bɔnsɔɛ ya ma.

19 Haruna nun a xa di xemεε xa e mati hōrōmōlingira kui, e fa e xa wali masen kankan be alako e naxa e makōre se seniyenxie ra, e fa faxa.

20 E mu lan e xa e ya masa se seniyenxie ma, hali dondoronti, xa na mu e faxama ne.»

Gerison xa mixie

21 Alatala naxa a masen Munsa be,

22 «Gerison bōnsōe tengε a xabile nun a den-baya ki ma,

23 naxee xa simaya bara ne tongo saxan li han ne tongo suuli, naxee fama hōrōmōlingira wali rabade.

24 Gerison xabile xa wali nan yi ki.

25 E hōrōmōlingira mafelenyie nan xaninma, a nun mafelenyi naxan yailanxi foye yexe kiri ra, a nun mafelenyi naxan gbakuxi hōrōmōlingira sode de ra.

26 E xa tete mafelenyie fan xanin naxee hōrōmōlingira nun serexebade rabilinma, a nun naxan gbakuxi tete sode de ra, a nun tete luutie. E xa e joxo sa na se mooli birin xon ma.

27 Gerison xabile walima Haruna nun a xa di xemεε xa yaamari nan bun ma, a findi kotee xanife ra, a findi wali gbete rabafe ra. Nee nan a falama e be e lan e xa naxan naba, a nun e lan e xa naxan xanin.

28 Gerison bōnsōe xa wali nan na ki hōrōmōlingira xa fe ra. E na wali rabama Haruna serexedube xa di xeme Itamari xa yaamari nan bun ma.»

Merari xa mixie

²⁹ «I xa Merari bõnsõε fan tẽnge a xabile nun a denbaya ki ma,

³⁰ naxee xa simaya bara jε tongo saxan li han jε tongo suuli, naxee fama hõrõmõlingira wali rabade.

³¹ See nan yi ki e tan lan e xa naxee maxanin hõrõmõlingira see ra: a xe benyie, a wuri kuyee, a kontigibae, nun e sanbunyie.

³² E xa tete fan xanin, a nun a kontigibae, e sanbunyie, e sõrõnsee, e xa luutie, e xa yirabasee, nun e xa walise birin. Wo see masen kankan be, a lanma a xa naxee xanin.

³³ Merari bõnsõεε xa wali birin nan na ki hõrõmõlingira xa fe ra. E walima Haruna serexedube xa di xeme Itamari xa yaamari nan bun ma.»

Walikeε tẽngefe Lewi bõnsõε ya ma

³⁴ Munsa, Haruna, nun pama kuntigie naxa Kehati xa mixie tẽnge e xabile nun e xa denbaya ki ma,

³⁵ xeme naxee xa simaya bara jε tongo saxan li han jε tongo suuli, naxee fama hõrõmõlingira wali rabade.

³⁶ E xasabi lan mixi wulu firin, mixi keme solofere, tongo suuli nan ma.

³⁷ Xeme nan na ki Kehati xabileε ya ma naxee hõrõmõlingira wali rabama. Munsa nun Haruna bara e tẽnge alõ Alatala Munsa yamarixi ki naxe.

³⁸ E naxa Gerison xa mixie tẽnge e xabile nun e xa denbaya ki ma,

³⁹ xeme naxee xa simaya bara jε tongo saxan li han jε tongo suuli, naxee fama hõrõmõlingira wali rabade.

⁴⁰ E xasabi lan mixi wulu firin, keme senni, tongo saxan nan ma.

⁴¹ Xeme nan na ki Gerison xabilee ya ma naxee horomolingira wali rabama. Munsa nun Haruna bara e tenge alo Alatala Munsa yamarixi ki naxe.

⁴² E naxa Merari xa mixie tenge e xabile nun e xa denbaya ki ma,

⁴³ xeme naxee xa simaya bara je tongo saxan li han je tongo suuli, naxee fama horomolingira wali rabade.

⁴⁴ E xasabi lan mixi wulu saxan mixi keme firin nan ma.

⁴⁵ Xeme nan na ki Merari xabilee ya ma naxee horomolingira wali rabama. Munsa nun Haruna bara e tenge alo Alatala Munsa yamarixi ki naxe.

⁴⁶ Munsa, Haruna, nun Isirayila kuntigie, e Lewi bonsoe mixi naxee tengexi e xabile nun e xa denbaya ki ma,

⁴⁷ xeme naxee xa simaya bara je tongo saxan li han je tongo suuli, naxee fama horomolingira wali rabade.

⁴⁸ E xasabi lan mixi wulu solomasaxan, keme suuli, tongo solomasaxan nan ma.

⁴⁹ Xeme nun e xa walie nan na ki Lewi naxee tengexi Munsa nun Haruna saabui ra alo Alatala Munsa yamarixi ki naxe.

5

Mixi seniyantaree, haake tongoe, nun yenelae

¹ Alatala naxa a masen Munsa be,

² «Isirayilakae yamari e xa kune kanyi nun korosila kanyi birin namini e yonkinde, a

nun mixi naxee dinxi fure nde ra, e fa findi seniyeutaree ra.

³ A findi xeme ra, a findi gine ra, wo e ramini wo ya ma, e xa sa lu e xati ma alako e naxa seniyeutareja raso wo ya ma, n sabatixi dennaxe.»

⁴ Isirayilakae naxa a raba alo Alatala a yamarixi ki naxe, e naxa na mixie ramini e ya ma. Alatala a yamari ki naxe Munsa be, e naxa a raba na ki.

⁵ Alatala naxa a masen Munsa be,

⁶ «A fala Isirayilakae be, a findi xeme ra, a findi gine ra, naxan yo na haake nde raba a boore ra, haake naxan findima Alatala xui matandife ra, na fe doxoxi a xun ma.

⁷ A lan ne a xa a ti na haake ra, a xa na fe yailan a nun na kanyi tagi, a man fa na fe kanaxi doxo suuli nde sa na fari.

⁸ Xa a sa li a haake rabaxi naxan na, a bara faxesa, a xa mixi yo mu na naxan noma na fe yailanxi rasuxude, na findima Alatala nan gbe ra, a so serexedube yi ra. Fe kane man fa yexee kontonyi keren ba a xa yunubi xafari ra, a a so serexedube yi ra.

⁹ Isirayilakae na serexe ba, e a fi serexedube ma, na serexe findima na serexedube nan gbe ra.

¹⁰ Naxan birin serexe bama, a naxan bama, a gbe nan na ki, konjo a naxan fima serexedube ma, serexedube gbe nan na ki.»

¹¹ Alatala naxa a masen Munsa be,

¹² «A fala Isirayilakae be, e yi nan nabama xa gine nde sa yene raba.

13 Xa e nun xeme gbete bara e sa gundo ra, gine xa m̄ori mu na kolon, seede mu na, mixi mu a suxu a kui,

14 k̄on̄o a xa m̄ori bara a xa gine t̄on̄e f̄olo, xa a xa gine seniyenxi, xa na mu a mu seniyenxi,

15 a xa a xa gine xanin serexedube yire, a mengi kilo saxan ba a be serexe ra ture nun surayi mu na naxan xun, barima t̄on̄e serexe nan a ra naxan bama a kolonfe ra xa yunubi rabaxi.»

16 «Serexedube xa na gine ti Alatala ya i,

17 a fa xube mak̄o b̄oxi ma h̄or̄om̄olingira kui, a a masunbu ye seniyenxi ra feje kui.

18 Gine na ti Alatala ya i, serexedube xa a xunsexe fulun, a fa t̄on̄e serexe sa gine belexe maratuse ra. Serexedube tan xa na ye tongo naxan findima danka ra, a a lintan gine ya i.»

19 «Serexedube gine rakalima ne, a a fala, <Xa a sa li i tan nun xeme gbete mu kafuxi, i mu i xa m̄ori yanfa, i mu seniyentareja soto futi kui, i xa ratanga danke ma yi ye fama naxan na.

20 K̄on̄o xa a sa li, i bara i xa m̄ori yanfa wo xa futi kui, i nun xeme gbete bara kafu seniyentareja kui,

21 Alatala xa a ragiri i furi xa kana. Na kui i ngaxakerenyie i dankama ne, e i konbi.

22 Yi ye naxan fama danke ra, a xa i furi mafuntu, a i x̄ore maba.> Gine xa a ratin a falafe ra, <Amina, amina.>»

23 «Serexedube na ge na danke sebede kiri ma, a xa na kiri xa na ye seniyenxi ra,

24 a fa a fi gine ma, a xa a min. Na ye naxan n̄oma findide danke ra, a soma a fate i.

²⁵ Serexedube tōne serexe rasuxuma ne gine yi ra, a dentegge Alatala be serexebade yire.

²⁶ Serexedube xa mengi suxui keren gan serexebade fari, a findi serexe tōnxuma ra. A na ge na ra, a xa na ye fi gine ma, a xa a min.

²⁷ A na na ye min, xa a sa li na gine bara findi seniyentare ra, a bara a xa mōri yanfa, na ye naxan findima danke ra, a soma ne a fate i, a a tōro ki fanyi ra. A furi funtuma ne, a xore mabama ne, a ngaxakerenyie fama ne a dankade.»

²⁸ «Kōno xa a sa li a mu seniyentarena yo rabaxi, tōnege bama ne a xun ma, a man noma di baride.

²⁹ Tōne seriyē nan na ki naxan nawalima xa gine findima seniyentare ra, a a xa mōri yanfa futi kui,

³⁰ xa na mu a ra, tōne xaxili na so xeme furi, a fa siike a xa gine ma. A a xa gine xaninma Alatala ya i, serexedube fa na seriyē rabatu a xa fe ra.

³¹ Na kui yunubi mu na na xeme ma, kōno gine tan a xa yunubi sare sōtoma ne.»

6

Mixi xa seriyē naxan a yete safe Alatala sago

¹ Alatala naxa a masen Munsa be,

² «A fala Isirayilakae be, xa xeme nde, xa na mu gine nde sa laayidi tongo Alatala be, a xa lu a sago, na nan na ki a xa findi Nasari ra,

³ na kanyi mu lan a xa weni nun beere min. A naxa sese min naxan kelixi weni bogi ma, xa na

mu beere ma. A naxa weni bogi bunda don, a naxa a xare don.

⁴ A temui naxan birin nabama a xa Nasariya kui, a naxa sese don naxan keli weni bili ma, keli a bogi ma a sa dɔxɔ a xori ra.»

⁵ «A xa Nasariya kui, a mu lanma a xunyi xa bi. A xa lu seniyeanyi kui, a xunsexe xa nu kuya ra tun.

⁶ Na waxati bun ma, a mu lan a xa a maso fure ra,

⁷ hali a findi a baba ra, a nga, a taara, xa na mu a ra a xunya fure ra. A na Alatala nan sago tun, alɔ a xunsexe keɓa a masenxi ki naxe.

⁸ A temui naxan birin nabama a xa Nasariya kui, a luma seniyeanyi nan kui Alatala be.»

⁹ «Xa mixi nde sa faxa a fe ma a terenna ki ma, a xunsexe bara findi se seniyantare ra. Na temui a xa seniyeen loxun keren bun ma, a man fa a xunyi bi na xi solofere loxɔe.

¹⁰ A xi solomasaxan loxɔe, a fogotara firin nan xaninma serexedube xon ma horomolingira sode de ra, xa na mu ganbe firin.

¹¹ Serexedube xoni keren nan bama yunubi xafari serexe ra, boore findima a gan daaxi nan na, alako a xa yunubi xa xafari, barima a dinfe fure ra, na findima yunubi nan na. Na loxɔe a man xa a xunyi raseniyeen.

¹² A na ge na ra, a man xa gbilen a xa laayidi ma. Fo a xa yexee keren ba yete ragbilen serexe ra, naxan je keren a ra a xa yunubi xafarife ra. Loxɔe naxee bara dangi, nee mu kontima sonon, barima a nu bara seniyantareɓa soɔ.»

¹³ «Mixi na ge Nasariya rabade, a xa bira yi

seriyε nan fɔxɔ ra. A xa siga hɔrɔmɔlingira sode dε ra,

¹⁴ a xa sεrεxε gan daaxi ba Alatala bε, yεxεε naxan bara jε keren sɔtɔ, lanyuru yo mu na naxan ma. A xa yunubi xafari sεrεxε fan ba, yεxεε ginε naxan bara jε keren sɔtɔ, lanyuru yo mu na naxan ma. A xa xanunteya sεrεxε ba, yεxεε kontonyi, lanyuru yo mu na naxan ma.

¹⁵ A xa sεrεxε ndee sa na fari, alɔ sansi xɔri dinxi sεrεxε, weni sεrεxε, taami lɛbinitare, lɛki yailanxi ture ra, nun lɛki ture masoxi naxee ma.

¹⁶ Sεrεxεdubε na sεrεxε see nan dεntεgema Alatala bε, a fa yunubi xafari sεrεxε ba, a nun sεrεxε gan daaxi.

¹⁷ A xa na taami lɛbinitare masen Alatala bε, a xa na yεxεε kontonyi ba xanunteya sεrεxε ra, a xa sansi xɔri dinxi sεrεxε nun weni sεrεxε sa na fari.»

¹⁸ «Na tɛmui Nasari xa a xunsexe bi hɔrɔmɔlingira sode dε ra, a naxan fixi Alatala ma. A xa na raso tε xɔɔra xanunteya sεrεxε na bafe dennaxε.

¹⁹ Nasari na gε a xunsexe bide, sεrεxεdubε yεxεε kontonyi belexε ganxi keren nan tongoma a belexε ra, a nun lɛki lɛbinitare firin naxee na debe kui.

²⁰ A xa e dεntεgε Alatala bε e lintanfe ra. Na findi donse seniyenxi nan na sεrεxεdubε bε, a nun na yεxεε ganyanyi nun a tabe. Na dangi xanbi, Nasari nɔma weni minde sɔnɔn.

²¹ Nasari seriyε nan na ki. A lanma a xa na sεrεxεε ba Alatala bε alɔ a janigexi ki naxε, a nun se gbetεε a nɔma naxan na. Fo a xa a xa Nasari laayidi rakamali a seriyε ki ma.»

22 Alatala naxa a masen Munsa be,

23 «A fala Haruna nun a xa die be, e xa duba Isirayilakae be yi ki ne:

24 <Alatala xa baraka sa i xa fe, a xa i kanta.

25 Alatala yatagi xa noro i ma, a xa hinne i ra.

26 Alatala xa a ya rafindi i ma, a xa boresa fi i ma.>

27 E dubama Isirayilakae be na ki ne, n fan baraka sama ne e ma.»

7

Hadiya naxee fixi hōromōlingira rabi temui

1 Munsa to ge hōromōlingira tide, a naxa ture seniyeñxi sa a ma, a nun a xunmasee, a xa serexebadee, nun a yirabasee, alako nee xa seniyeñ Alatala be.

2 Isirayila kuntigie, xabile xunyi naxee bōnsōee tēge, e naxa hadiyae ba Alatala be.

3 E naxa fa sareti makotoxi senni nun ninge fu nun firin na hōromōlingira sode de ra, e xa findi e xa serexe ra Alatala be.

4 Alatala naxa a masen Munsa be,

5 «Yi hadiyae rasuxu e yi ra hōromōlingira wali xa fe ra. E taxu Lewi bōnsōe xa mixie ra kankan xa wali bere ra.»

6 Munsa naxa na sareti nun ninge so Lewi xa mixie yi ra.

7 A naxa sareti firin nun ninge naani so Gerison xabile yi ra e xa wali bere ra.

8 A naxa sareti naani nun ninge solomasaxan so Merari xabile yi ra e xa wali bere ra. E nu

na Haruna serexedube xa di Itamari xa yaamari nan bun ma.

⁹ Kono a mu sese so Kehati xabile tan yi, barima a nu lanma e xa se seniyenxie maxanin e tunki fari alo Alatala e yamarixi ki naxe.

¹⁰ Serexebade neene xa wali singe, ture seniyenxi to maso a ma temui naxe, kuntigie naxa fa e xa serexee ra serexebade yire.

¹¹ Alatala nu bara a masen Munsa be, «Loxoe yo loxoe mixi keren xa fa a xa hadiya ra serexebade neene xa fe ra.»

¹² Na loxoe singe, Aminadabo xa di Naxason kelife Yuda bonsoe,

¹³ a naxa fa yi hadiyae ra: piletu keren naxan yailanxi gbeti kilo fu nun suuli ra, a nun pooti keren naxan yailanxi gbeti kilo keren na alo se maniyama ki naxe horomolingira kui. E firin nafexi sansi xori dinxi ra, ture masunbuxi naxan na, alako a xa findi sansi serexe ra.

¹⁴ A man naxa fa pooti keren na naxan yailanxi xee ma giramu keme giramu fu nun naani ra, naxan nafexi surayi ra,

¹⁵ a nun naxee bama serexe gan daaxi ra alo tuura keren, yexee kontonyi keren, nun yexee keren naxan xa simaya bara je keren li,

¹⁶ a nun sikote naxan findima yunubi xafari serexe ra,

¹⁷ a nun naxee bama xanunteya serexe ra alo ninge firin, yexee kontonyi suuli, nun yexee suuli naxee xa simaya bara je keren li. Aminadabo xa di Naxason xa hadiya nan na ki.

¹⁸ Na loxoe firin nde, Suwara xa di Netaneeli kelife Isakari bonsoe,

¹⁹ a naxa fa yi hadiyae ra: pileti keren naxan yailanxi gbeti kilo fu nun suuli ra, a nun pooti keren naxan yailanxi gbeti kilo keren na alo se maniyama ki naxe hɔrɔmɔlingira kui. E firin nafexi sansi xɔri dinxi ra, ture masunbuxi naxan na, alako a xa findi sansi sɛrɛxɛ ra.

²⁰ A man naxa fa pooti keren na naxan yailanxi xɛɛma giramu kɛmɛ giramu fu nun naani ra, naxan nafexi surayi ra,

²¹ a nun naxee bama sɛrɛxɛ gan daaxi ra alo tuura keren, yɛxɛɛ kontonyi keren, nun yɛxɛɛ keren naxan xa simaya bara jɛ keren li,

²² a nun sikɔtɛ naxan findima yunubi xafari sɛrɛxɛ ra,

²³ a nun naxee bama xanunteya sɛrɛxɛ ra alo ninge firin, yɛxɛɛ kontonyi suuli, nun yɛxɛɛ suuli naxee xa simaya bara jɛ keren li. Suwara xa di Netaneeli xa hadiya nan na ki.

²⁴ Na lɔxɔɛ saxan nde, Xelon xa di Eliyabi kelifɛ Sabulon bɔnsɔɛ,

²⁵ a naxa fa yi hadiyae ra: pileti keren naxan yailanxi gbeti kilo fu nun suuli ra, a nun pooti keren naxan yailanxi gbeti kilo keren na alo se maniyama ki naxe hɔrɔmɔlingira kui. E firin nafexi sansi xɔri dinxi ra, ture masunbuxi naxan na, alako a xa findi sansi sɛrɛxɛ ra.

²⁶ A man naxa fa pooti keren na naxan yailanxi xɛɛma giramu kɛmɛ giramu fu nun naani ra, naxan nafexi surayi ra,

²⁷ a nun naxee bama sɛrɛxɛ gan daaxi ra alo tuura keren, yɛxɛɛ kontonyi keren, nun yɛxɛɛ keren naxan xa simaya bara jɛ keren li,

28 a nun sikote naxan findima yunubi xafari serexe ra,

29 a nun naxee bama xanunteya serexe ra alo ninge firin, yexee kontonyi suuli, nun yexee suuli naxee xa simaya bara ne keren li. Xelon xa di Eliyabi xa hadiya nan na ki.

30 Na loxe naani nde, Sedeyuri xa di Elisuru kelife Ruben bonsoe,

31 a naxa fa yi hadiyae ra: pileti keren naxan yailanxi gbeti kilo fu nun suuli ra, a nun pooti keren naxan yailanxi gbeti kilo keren na alo se maniyama ki naxe horomolingira kui. E firin nafexi sansi xori dinxi ra, ture masunbuxi naxan na, alako a xa findi sansi serexe ra.

32 A man naxa fa pooti keren naxan yailanxi xee ma giramu keme giramu fu nun naani ra, naxan nafexi surayi ra,

33 a nun naxee bama serexe gan daaxi ra alo tuura keren, yexee kontonyi keren, nun yexee keren naxan xa simaya bara ne keren li,

34 a nun sikote naxan findima yunubi xafari serexe ra,

35 a nun naxee bama xanunteya serexe ra alo ninge firin, yexee kontonyi suuli, nun yexee suuli naxee xa simaya bara ne keren li. Sedeyuri xa di Elisuru xa hadiya nan na ki.

36 Na loxe suuli nde, Surisadayi xa di Selumiyeli kelife Simeyon bonsoe,

37 a naxa fa yi hadiyae ra: pileti keren naxan yailanxi gbeti kilo fu nun suuli ra, a nun pooti keren naxan yailanxi gbeti kilo keren na alo se maniyama ki naxe horomolingira kui. E firin

nafexi sansi xori dinxi ra, ture masunbuxi naxan na, alako a xa findi sansi serexe ra.

³⁸ A man naxa fa pooti keren na naxan yailanxi xεεma giramu kεmε giramu fu nun naani ra, naxan nafexi surayi ra,

³⁹ a nun naxee bama serexe gan daaxi ra alo tuura keren, yεxεε kontonyi keren, nun yεxεε keren naxan xa simaya bara γε keren li,

⁴⁰ a nun sikote naxan findima yunubi xafari serexe ra,

⁴¹ a nun naxee bama xanunteya serexe ra alo ninge firin, yεxεε kontonyi suuli, nun yεxεε suuli naxee xa simaya bara γε keren li. Surisadayi xa di Selumiyeli xa hadiya nan na ki.

⁴² Na loxoe senni nde, Duweli xa di Eliyasafa fatanfe Gadi bonsoe ra,

⁴³ a naxa fa yi hadiyae ra: pileti keren naxan yailanxi gbeti kilo fu nun suuli ra, a nun pooti keren naxan yailanxi gbeti kilo keren na alo se maniyama ki naxe horomolingira kui. E firin nafexi sansi xori dinxi ra, ture masunbuxi naxan na, alako a xa findi sansi serexe ra.

⁴⁴ A man naxa fa pooti keren na naxan yailanxi xεεma giramu kεmε giramu fu nun naani ra, naxan nafexi surayi ra,

⁴⁵ a nun naxee bama serexe gan daaxi ra alo tuura keren, yεxεε kontonyi keren, nun yεxεε keren naxan xa simaya bara γε keren li,

⁴⁶ a nun sikote naxan findima yunubi xafari serexe ra,

⁴⁷ a nun naxee bama xanunteya serexe ra alo ninge firin, yεxεε kontonyi suuli, nun yεxεε suuli naxee xa simaya bara γε keren li. Duweli xa di

Eliyasafa xa hadiya nan na ki.

⁴⁸ Na loxoε solofere nde, Amixudi xa di Elisama fatanfe Efirami bonsoε ra,

⁴⁹ a naxa fa yi hadiyae ra: pileti keren naxan yailanxi gbeti kilo fu nun suuli ra, a nun pooti keren naxan yailanxi gbeti kilo keren na alo se maniyama ki naxe hɔromolingira kui. E firin nafexi sansi xori dinxi ra, ture masunbuxi naxan na, alako a xa findi sansi serexe ra.

⁵⁰ A man naxa fa pooti keren naxan yailanxi xeema giramu keme giramu fu nun naani ra, naxan nafexi surayi ra,

⁵¹ a nun naxee bama serexe gan daaxi ra alo tuura keren, yexee kontonyi keren, nun yexee keren naxan xa simaya bara je keren li,

⁵² a nun sikote naxan findima yunubi xafari serexe ra,

⁵³ a nun naxee bama xanunteya serexe ra alo ninge firin, yexee kontonyi suuli, nun yexee suuli naxee xa simaya bara je keren li. Amixudi xa di Elisama xa hadiya nan na ki.

⁵⁴ Na loxoε solomasaxan nde, Pedasuru xa di Gamaliyeli fatanfe Manasi bonsoε ra,

⁵⁵ a naxa fa yi hadiyae ra: pileti keren naxan yailanxi gbeti kilo fu nun suuli ra, a nun pooti keren naxan yailanxi gbeti kilo keren na alo se maniyama ki naxe hɔromolingira kui. E firin nafexi sansi xori dinxi ra, ture masunbuxi naxan na, alako a xa findi sansi serexe ra.

⁵⁶ A man naxa fa pooti keren na naxan yailanxi xeema giramu keme giramu fu nun naani ra, naxan nafexi surayi ra,

57 a nun naxee bama serexe gan daaxi ra alo tuura keren, yexee kontonyi keren, nun yexee keren naxan xa simaya bara ne keren li,

58 a nun sikote naxan findima yunubi xafari serexe ra,

59 a nun naxee bama xanunteya serexe ra alo ninge firin, yexee kontonyi suuli, nun yexee suuli naxee xa simaya bara ne keren li. Pedasuru xa di Gamaliyeli xa hadiya nan na ki.

60 Na loxe solomanaani nde, Gideyoni xa di Abidan fatanfe Bunyamin bonsoe ra,

61 a naxa fa yi hadiyae ra: pileti keren naxan yailanxi gbeti kilo fu nun suuli ra, a nun pooti keren naxan yailanxi gbeti kilo keren na alo se maniyama ki naxe horomolingira kui. E firin nafexi sansi xori dinxi ra, ture masunbuxi naxan na, alako a xa findi sansi serexe ra.

62 A man naxa fa pooti keren na naxan yailanxi xema giramu keme giramu fu nun naani ra, naxan nafexi surayi ra,

63 a nun naxee bama serexe gan daaxi ra alo tuura keren, yexee kontonyi keren, nun yexee keren naxan xa simaya bara ne keren li,

64 a nun sikote naxan findima yunubi xafari serexe ra,

65 a nun naxee bama xanunteya serexe ra alo ninge firin, yexee kontonyi suuli, nun yexee suuli naxee xa simaya bara ne keren li. Gideyoni xa di Abidan xa hadiya nan na ki.

66 Na loxe fu nde, Amisadayi xa di Axiyeseri fatanfe Dana bonsoe ra,

67 a naxa fa yi hadiyae ra: pileti keren naxan yailanxi gbeti kilo fu nun suuli ra, a nun pooti

keren naxan yailanxi gbeti kilo keren na alo se maniyama ki naxe hɔrɔmɔlingira kui. E firin nafexi sansi xɔri dinxi ra, ture masunbuxi naxan na, alako a xa findi sansi sɛrɛxɛ ra.

⁶⁸ A man naxa fa pɔɔti keren na naxan yailanxi xɛɛma giramu kɛmɛ giramu fu nun naani ra, naxan nafexi surayi ra,

⁶⁹ a nun naxee bama sɛrɛxɛ gan daaxi ra alo tuura keren, yɛxɛɛ kontonyi keren, nun yɛxɛɛ keren naxan xa simaya bara nɛ keren li,

⁷⁰ a nun sikɔtɛ naxan findima yunubi xafari sɛrɛxɛ ra,

⁷¹ a nun naxee bama xanunteya sɛrɛxɛ ra alo ninge firin, yɛxɛɛ kontonyi suuli, nun yɛxɛɛ suuli naxee xa simaya bara nɛ keren li. Amisadayi xa di Axiyeseri xa hadiya nan na ki.

⁷² Na lɔxɔɛ fu nun keren nde, Okiran xa di Pagiyeɛli fatanfe Aseri bɔnsɔɛ ra,

⁷³ a naxa fa yi hadiyae ra: piletɛi keren naxan yailanxi gbeti kilo fu nun suuli ra, a nun pɔɔti keren naxan yailanxi gbeti kilo keren na alo se maniyama ki naxe hɔrɔmɔlingira kui. E firin nafexi sansi xɔri dinxi ra, ture masunbuxi naxan na, alako a xa findi sansi sɛrɛxɛ ra.

⁷⁴ A man naxa fa pɔɔti keren na naxan yailanxi xɛɛma giramu kɛmɛ giramu fu nun naani ra, naxan nafexi surayi ra,

⁷⁵ a nun naxee bama sɛrɛxɛ gan daaxi ra alo tuura keren, yɛxɛɛ kontonyi keren, nun yɛxɛɛ keren naxan xa simaya bara nɛ keren li,

⁷⁶ a nun sikɔtɛ naxan findima yunubi xafari sɛrɛxɛ ra,

⁷⁷ a nun naxee bama xanunteya sɛrɛxɛ ra alo

ninge firin, yexεε kontonyi suuli, nun yexεε suuli naxee xa simaya bara γε keren li. Aminadabo xa di Naxason xa hadiya nan na ki.

⁷⁸ Na λoxε fu nun firin nde, Enan xa di Axira fatanfe Nafatali bonsoε ra,

⁷⁹ a naxa fa yi hadiyae ra: pileti keren naxan yailanxi gbeti kilo fu nun suuli ra, a nun pooti keren naxan yailanxi gbeti kilo keren na alo se maniyama ki naxe hōromolingira kui. E firin nafexi sansi xori dinxi ra, ture masunbuxi naxan na, alako a xa findi sansi serεε ra.

⁸⁰ A man naxa fa pooti keren na naxan yailanxi xεεma giramu kεmε giramu fu nun naani ra, naxan nafexi surayi ra,

⁸¹ a nun naxee bama serεε gan daaxi ra alo tuura keren, yexεε kontonyi keren, nun yexεε keren naxan xa simaya bara γε keren li,

⁸² a nun sikote naxan findima yunubi xafari serεε ra,

⁸³ a nun naxee bama xanunteya serεε ra alo ninge firin, yexεε kontonyi suuli, nun yexεε suuli naxee xa simaya bara γε keren li. Enan xa di Axira xa hadiya nan na ki.

⁸⁴ Isirayila kuntigie xa hadiya malanxie findixi yi nan na serεεbade nεεne xa fe ra: pileti gbeti daaxi fu nun firin, pooti gbeti daaxi fu nun firin, nun pooti xεεma daaxi fu nun firin.

⁸⁵ Pileti keren keren lanxi gbeti kilo keren nun a tagi nan ma. Pooti keren keren lanxi gbeti kilo keren nan ma. Se naxee yailanxi gbeti ra, nee lanxi kilo mōxōnen nun naani nan ma, alo se maniyama ki naxe hōromolingira kui.

⁸⁶ Pooti xεεma daaxi fu nun firin lanxi xεεma giramu kεmε giramu fu nun naani nan ma, alɔ se maniyama ki naxε hɔrɔmɔlingira kui. Na pooti fu nun firin lanxi xεεma kilo keren nun a tagi nan ma. E birin nafexi surayi nan na.

⁸⁷ Sεrεxε gan daaxi xuruse xasabi naxa lan tuura fu nun firin ma, a nun yεxεε kontonyi fu nun firin, nun yεxεε fu nun firin naxee xa simaya nu bara jε keren li, a nun e xa sansi xori dinxi sεrεxε. Yunubi xafari sεrεxε xuruse xasabi naxa lan sikɔtε fu nun firin ma.

⁸⁸ Xanunteya sεrεxε xa xuruse xasabi naxa lan tuura mɔxɔjɛn nun naani ma, yεxεε kontonyi tongo senni, sikɔtε tongo senni, nun yεxεε tongo senni naxee bara jε keren sɔtɔ. Nee nan findi hadiyae ra sεrεxεbade xa wali fɔlɔ tɛmɔi, ture seniyeɛnxi to sa a ma.

⁸⁹ Munsa to so hɔrɔmɔlingira kui, a nun Alatala xa sumun, a naxa Alatala xui mε saatε kankira dεrakote fari, a masenyi tima a bε malekε firinyie sawurε tagi naxee na na kankira fari.

8

Lanpuie dɔxɔfe

¹ Alatala naxa a masen Munsa bε,

² «A fala Haruna bε, a xa lanpui solofere dɔxɔ alako e xa yanba e dɔxɔse ya ra.»

³ Haruna a raba na ki nε. A naxa lanpui dɔxɔ alɔ Alatala a yamari ki naxε Munsa bε.

⁴ Lanpuie dɔxɔse nu rafalaxi xεεma dinxi nan na, kelifε a sanbunyi ma han a xunyi, alɔ Alatala a masenxi Munsa bε ki naxε.

⁵ Alatala naxa a masen Munsa bε,

⁶ «Lewi bõnsõe ba Isirayilakae ya ma, i xa e raseniyeŋ.

⁷ I e raseniyeŋma yi ki ñe. Maraseniyeŋ ye makasan e ma. E xa e fate maxabe birin bi, e xa e xa dugie xa, alako e xa seniyeŋ.

⁸ Na xanbi, e xa tuura keren ba serexe ra, a nun menŋi naxan masunbuxi ture ra. I xa tuura gbete ba yunubi xafari serexe ra.

⁹ I xa Lewi bõnsõe nun Isirayilaka birin malan hõrõmõlingira sode de ra.

¹⁰ Menni, Alatala ya xõri, Isirayilakae xa e belexe sa Lewi bõnsõe mixie ma.

¹¹ Haruna nan fama e dentegede Alatala be e xa lu alo serexe Isirayilakae jõxõe ra. Na kui e nõma Alatala xa wali rabade.»

¹² «Lewi bõnsõe mixie xa e belexe sa na tuura firinyie ma. Keren bama yunubi xafari serexe nan na, boore ba serexe gan daaxi ra, alako e xa yunubie xa xafari.

¹³ Lewi bõnsõe na ti Haruna nun a xa die ya i, i xa e dentegede a serexe ki ma Alatala be.

¹⁴ A lima ñe, na temui, i bara Lewi bõnsõe tan ba Isirayilakae ya ma, e xa findi n gbe ra.»

¹⁵ «I na ge e raseniyeŋde a serexe ki ma, Lewi bõnsõe fama ñe sode e xa hõrõmõlingira wali kui.

¹⁶ Isirayilakae nan e ra naxee findixi n gbe ra Isirayila di singe birin jõxõe ra.

¹⁷ Isirayila di singe birin nun e xa xuruse di singe birin findixi n gbe nan na, kafi n sa Misirakae xa di singe birin faxa temui naxe.

¹⁸ N naxa Lewi bõnsõe tongo Isirayila di singe birin jõxõe ra.

19 N bara e so Haruna nun a xa die yi ra Isirayilakae tagi, alako e xa hōrōmōlingira wali raba Isirayilakae xili ra. E man xa yunubi xafari serexe ba Isirayilakae be, alako gbaloe yo naxa goro Isirayilakae ma e na makore yire seniyeñxi ra temui naxe.»

20 Munsa, Haruna, nun jama birin naxa na raba Lewi bōnsōe ra alo Alatala a yamari ki naxe.

21 Lewi bōnsōe naxa e yete raseniyeñ, e naxa e xa dugie xa. Haruna naxa e dentēge Alatala be. A naxa e xa yunubi xafari serexe ba e be e xa seniyeñ.

22 Na to ba a ra, Lewi bōnsōe naxa fa e xa wali suxu hōrōmōlingira xa fe ra Haruna nun a xa die xa yaamari bun ma, alo Alatala a yamari Munsa be ki naxe.

23 Alatala naxa a masen Munsa be,

24 «Lewi bōnsōe mixie xa simaya na je mōxōpēñ nun suuli li, e nōma hōrōmōlingira wali suxude.

25 E na je tongo suuli soto, e xa na wali lu naa.

26 E nōma e ngaxakerenyie malide na wali kui, kōno e tan mu nōma na rabade sonōñ. I xa na seriyēe suxu Lewi bōnsōe xa fe ra hōrōmōlingira wali rabafe ma.»

9

Sayamaleke Dangi Sali

1 Isirayilakae to mini Misira bōxi ma, e fa lu gbengberen yire je firin, na kike singe Alatala nu bara a masen Munsa be Turusinina gbengberenyi ma,

2 «Isirayilakae xa Sayamaleke Dangi Sali raba

³ yi kike xi fu nun naani, soge dula temui alo a yamarixi ki naxe.»

⁴ Munsa naxa a fala Isirayilakae be, a e xa Sayamaleke Dangi Sali raba.

⁵ E naxa na sali raba kike singe xi fu nun naani soge dula temui Turusinina gbengberenyi ma. E naxa a raba, alo Alatala a yamari ki naxe Munsa be.

⁶ Kono na loxo, mixi ndee mu no Sayamaleke Dangi Sali raba barima e nu bara din mixi fure ra, e fa findi seniyentare ra na loxo. Na loxo kerenyi e naxa siga Munsa nun Haruna yire.

⁷ E a fala e be, «Muxu mu seniyen fure xa fe ra, kono munfe ra muxu mu lan muxu xa fa muxu xa hadiya ra Alatala be alo Isirayilaka birin?»

⁸ Munsa naxa e yaabi, «Wo mame ti sinden, n xa a mato Alatala naxan yamarima wo xa fe ra.»

⁹ Alatala naxa a masen Munsa be,

¹⁰ «Xa wo mu seniyen fure nde xa fe ra, xa na mu a ra wo na biyaasi kui, wo man noma Sayamaleke Dangi Sali rabade Alatala xa binye bun ma, keli wo tan ma han a sa wo bonsoe li.

¹¹ Kono e tan xa a raba kike firin nde xi fu nun naani soge dula temui. E yexee don a nun taami lebinitare nun burexe xone ra.

¹² A donxo yo naxa lu han geesege. A xori fan mu iboma. E xa na sali raba a seriye ki ma.

¹³ Kono xa mixi seniyenxi naxan mu na biyaasi kui, a tondi Sayamaleke Dangi Sali rabade, na kanyi lanma a xa ba Alatala xa nama ya ma, barima a mu fa hadiya ra Alatala be a waxati. Na kanyi fama ne a xa yunubi sare sode.»

14 «Xa i xa xɔɲe nde wama Sayamaleke Dangi Sali rabafe, a xa a raba a seriye ki ma. Seriyɛ naxan saxi taa kanyie ma, na seriye kerenyi nan luma na xɔɲe fan ma.»

15 Hɔrɔmɔlingira ti lɔxɔɛ, saate walaxɛɛ na dennaxɛ, nuxui nde naxa dusu na xun na. Keli nunmare han kuye iba, a nu na hɔrɔmɔlingira fari, a maniyaxi tɛ ra.

16 Temui birin a nu na na ki nɛ, nuxui nu na hɔrɔmɔlingira fari yanyi ra, a fa yanba alɔ tɛ kɔɛ ra.

17 Nuxui nɛfɛ keli hɔrɔmɔlingira xun ma, Isirayilakae fan bara keli, e ɲɛrɛ fɔlɔ han a goro, e fa yonkin menni.

18 Na kui Isirayilakae nu ɲɛrɛma Alatala xa yaamari nan bun ma, e man nu yonkinma Alatala xa yaamari nan ma. Fanni nuxui na hɔrɔmɔlingira xun ma, e fan yonkinma menni nɛ.

19 Xa nuxui sa bu hɔrɔmɔlingira fari a gbe ra, Isirayilakae nu birama Alatala xa yaamari nan fɔxɔ ra, e lu menni.

20 Temui ndee na nuxui mu buma, a keli. Isirayilakae nu luma Alatala xa yaamari nan bun ma, e fan keli, e yonkin nuxui yire.

21 Temui ndee nuxui bara lu yire xi keren, keli kɔɛ ra han kuye iba, a fa siga. A nɛfɛ keli, Isirayilakae fan bara keli, e bira a fɔxɔ ra.

22 Xa nuxui lu hɔrɔmɔlingira xun ma xi firin, xa na mu kike keren, xa na mu ɲɛ keren, Isirayilakae mu nu kelima e yonkinde, fo na nuxui na keli hɔrɔmɔlingira xun ma temui naxɛ.

23 E nu yonkinma Alatala xa yaamari nan bun

ma, e nu kelima Alatala xa yaamari nan bun ma. E nu birama Alatala xa yaamari nan foxo ra, a naxan fixi Munsa saabui ra.

10

Sara firin gbeti daaxi

¹ Alatala naxa a masen Munsa be,

² «I xa sara firin yailan gbeti bonboxi ra. E rawalima jama xilife nan na malanyi. E man nawalima jama kelife nan na biyaasi temui.

³ E firin na fe temui keren, jama birin xa malan i yire horomolingira de ra.

⁴ Xa sara keren nan fe, Isirayila yareratie nun kuntigie gbansan xa malan i yire.»

⁵ «Wo kelima biyaaside temui naxe, sarae xa fe keren. Na kui naxee dodoxi sogetede, e xa siga.

⁶ Sarae na fe firin, naxee dodoxi yirefanyi ma, nee fan xa siga. Sara xui nan a masenma jama siga temui bara a li.

⁷ Sara xui keja gbete nan a masenma jama malan temui bara a li.»

⁸ «Haruna bonsoe serexedubee nan na sarae fema. Seriyen nan na ra wo tan nun wo bonsoe be abadan.

⁹ Wo na wo yaxuie gere wo xa boxi ma temui naxe, wo xa na sarae fe. Alatala joxo sama ne wo xon, a wo ratanga wo yaxuie ma.

¹⁰ Wo xa sali loxoe xungbee nun wo xa kike neene sali loxoe, wo man xa na sarae fe wo serexe gan daaxie nun xanunteya serexe bama temui naxe. Na nan a niyama, n nan n joxo sama wo xon ma. N tan nan na wo Marigi Alatala ra.»

Isirayilakae tife kira xɔn ma

¹¹ Nɛ firin nde kike firin nde xi mɔxɔɲɛn lɔxɔɛ, nuxui naxan nu dɔxɔxi hɔrɔmɔlingira xun ma, Ala xa seede nu na dɛnnaxɛ, a naxa ɲɛɛ fɔlɔ.

¹² Na kui Isirayilakae naxa keli Turusinina gbengberenyi ma, e bira na nuxui fɔxɔ ra han a sa ti Paran gbengberenyi xun ma.

¹³ Alatala naxa e yamari Annabi Munsa saabui ra, e xa na biyaasi singe fɔlɔ.

¹⁴ Yuda bɔnsɔɛ naxa ti yare, e xa tɔnxuma tixi e ya ra. E xunyi nu na Aminadabo xa di xɛmɛ Naxason nan na.

¹⁵ Suwara xa di xɛmɛ Netaneeli nan nu na Isakari bɔnsɔɛ xunyi ra.

¹⁶ Xelon xa di xɛmɛ Eliyabi nan nu na Sabulon bɔnsɔɛ xunyi ra.

¹⁷ Hɔrɔmɔlingira to mafagati, Gerison xa di xɛmɛ nun Merari xa di xɛmɛ naxa a xanin.

¹⁸ Ruben bɔnsɔɛ naxa bira e fɔxɔ ra, e xa tɔnxuma tixi e ya ra. Sedeyuri xa di xɛmɛ Elisuru nan nu na e xunyi ra.

¹⁹ Simeyɔn bɔnsɔɛ naxa bira e fɔxɔ ra. Surisadayi xa di xɛmɛ nan nu na e xunyi ra.

²⁰ Gadi bɔnsɔɛ naxa bira e fɔxɔ ra. Duweli xa di xɛmɛ Eliyasafa nan nu na e xunyi ra.

²¹ Kehati xabilɛ naxa bira e fɔxɔ ra hɔrɔmɔlingira se sɛniyɛnxie ra. Booree tan lan nɛ e xa hɔrɔmɔlingira ti beenu Kehati xabilɛ xa so.

²² Efirami bɔnsɔɛ naxa bira e fɔxɔ ra, e xa tɔnxuma tixi e ya ra. Amixudi xa di xɛmɛ Elisama nan nu na e xunyi ra.

²³ Manasi bɔnsɔɛ naxa bira e fɔxɔ ra. Pedasuru xa di xɛmɛ Gamaliyeli nan nu na e xunyi ra.

24 Gideyoni xa di xeme Abidan nan nu na Bunyamin bõnsõe xunyi ra.

25 Dana bõnsõe naxa jere e birin xanbi ra, e xa tõnxuma tixi e ya ra. Amisadayi xa di xeme Axiyeseri nan nu na e xunyi ra.

26 Okiran xa di xeme Pagiyele nan nu na Aseri bõnsõe xunyi ra.

27 Enan xa di xeme Axira nan nu na Nafatali bõnsõe xunyi ra.

28 Isirayilakae nu jere ma na ki ne e gali ki ma.

Kelifa Turusinina geya

29 Munsa naxa a fala a bitanyi Reyuweli Madiyanka xa di xeme Xobabo be, «Muxu na sigafe Alatala dennaxan laayidixi muxu be. I fan xa fa. Na findima sõneya nan na i be, barima Alatala bara laayidi tongo a fe fanyie rabama ne Isirayila be.»

30 Xobabo naxa a yaabi, «Ade, n xa gbilen n xõnyi n ma mixie tagi.»

31 Munsa naxa a maxandi, «Yandi, i naxa keli muxu xun ma. I tan nan yi gbengberenyi birin kolon muxu nõma yonkinde dennaxe. I findima muxu rapere ma nan na.»

32 Xa i muxu matima, muxu i kima ne hõeri ra Alatala fama naxan fide muxu ma.»

33 E naxa keli Alatala xa geya bun ma, e xi saxan jere raba. Alatala xa saate kankira nu tixi e ya ra na xi saxan bun ma yonkinde fenfe ra.

34 E to nu kelima e yonkinde, Alatala xa nuxui nu tixi e xun ma fõpenyi kui.

35 E to nu saate kankira rakelima temui naxe, Munsa nu a falama, «Alatala, i xa keli, i xa i

yaxuie rayensen. Naxee i xonxi, nee fan xa e gi i ya ra.»

³⁶ E to nu saate kankira ragoroma temui naxe, Munsa nu a falama, «Alatala, i xa i magoro Isirayila nama wuyaxi tagi.»

11

Isirayilakae mawafe

¹ Loxoe nde, nama naxa e mawa e xa toore xa fe ra Alatala ya i. Alatala naxa xono na fe ma, a fa te rasin nama tagi, a yire nde gan yonkinde seeti ma.

² Nama to gbelegbele Munsa ra, a naxa Alatala maxandi. Na kui te naxa xuben.

³ E naxa na yire xili sa Tabera, na nan na ki «Te mankanε,» barima Alatala nu bara te rasin e tagi.

⁴ Mixi kobi ndee to wa donse mooli gbete xon ma, Isirayilakae man naxa e mawa, a falafe ra, «Muxu wama sube nan xon!

⁵ Muxu muxu ratuma na donse fanyi ma muxu naxan soto Misira boxi ma kobiri xanbi, alo yeεε, kaakunboosi, basiketi, yeεε, nun yeεε maniyε.

⁶ Kono yakosi donse xoli mu na muxu ma, barima «mana» donse nan tun na be.»

⁷ Na «mana» nu luxi ne alo funden xori fiixe.

⁸ Nama nu minima a matongode, e fa a din gεme ra, xa na mu, mulunyi kui. E nu lεki yailanma a ra. A nu luxi alo ture nu na a ma.

⁹ Mana nu goroma xini goro temui.

¹⁰ Munsa naxa nama wa xui rame. Mixi birin nu e mawama e xonyi. Alatala naxa xono ki fanyi ra. Munsa naxa kontofili.

11 A naxa Alatala maxorin, «N Marigi, munfe ra i bara yi kontofili lu i xa konyi ma? N munse rabaxi naxan a niyama i xa yi pama xa kote dɔxɔ n xun ma? N tan nan nu wama a xɔn?

12 N tan nan e barixi? Munfe ra i bara e sa n belexe, n xa e xanin boxi ma i naxan laayidixi e benbae be, alo dingɛ a xa di xaninma ki naxe?

13 N sube sɔtɔma minden yi pama birin be? E e mawama e wama sube xɔn.

14 N keren mu nɔma yi pama birin xa kote ra, a binya n be.

15 Faxɛ nan fisa na kote be. Xa n ma fe rafa n i ma, i naxa n xun nakana.»

16 Alatala naxa a masen Munsa be, «Isirayila fori tongo solofere malan n be, i naxee kolon taa yareratɛ nun kuntigie ra. E xa e malan hɔrɔmɔlingira de ra i seeti ma.

17 N fama gorode i yire, won xa wɔyen. N Xaxili Seniyenxi naxan fixi i ma, n na nde bama i ma, n xa na sa e fan ma, alako i keren naxa yi pama xa kote xanin sɔnɔn. Wo nun na kuntigie nan a xaninma fa.»

18 «A fala pama be, <Wo xa wo yete raseniyen, barima tina wo sube donma ne. Alatala bara wo wa xui me, a falafe ra, «Muxu wama sube nan xɔn ma. Lufe Misira nan fisa.» Alatala fama sube fide wo ma wo naxan donma.

19 Kɔnɔ wo mu a donma xe xi keren, xa na mu xi firin, xa na mu xi suuli, xa na mu xi fu, xa na mu xi mɔxɔnen.

20 Wo a donma ne han kike keren, han a mini wo pɔe kui, han a rapaaxu wo ma, barima wo bara Alatala rabeɓin, naxan na wo ya ma. Wo

bara wo mawa a falafe ra, «Munfe ra muxu minixi Misira?»»

²¹ Munsa naxa a masen Alatala be, «I a falama i sube fima yi jama ma kike keren bun ma? N na xeme wulu keme senni nan ya ma.

²² Xuruse goore mu noma e ralide sube ra. Hali yexe naxee na baa ma, e mu noma e ralide.»

²³ Alatala naxa a yaabi, «N senbe xurun na rabade? I fama a kolonde xa n ma woyenyi findixi nondi nan na.»

²⁴ Munsa naxa siga Alatala xa masenyi dentegede jama be. A naxa jama forie mixi tongo solofere malan Ala xa horomolingira rabilinyi.

²⁵ Alatala naxa goro nuxui kui, a masenyi ti Munsa be. A naxa a yete Xaxili Seniyenxi nde tongo naxan nu na Munsa ma, a a sa na fori mixi tongo solofere ma. Na Xaxili Seniyenxi to goro e ma, e naxa so masenyi tife Ala xili ra, konjo e mu a ikuya.

²⁶ Konjo xeme firin nu na na fori tongo solofere ya ma naxee mu siga malanyi. E mu siga horomolingira yire, e naxa lu yonkinde kui. Konjo Ala Xaxili Seniyenxi naxa goro e fan ma, e fa masenyi ti Ala xili ra jama tagi.

²⁷ Fonike nde naxa a gi, a sa a fala Munsa be, «Eledade nun Medadi na masenyi tife Ala xili ra jama tagi.»

²⁸ Nunu xa di xeme Yosuwe, naxan nu Munsa malima kafi a fonike temui, a naxa a fala Munsa be, «N marigi, i xa na fe dan.»

²⁹ Munsa naxa a yaabi, «I toone tife n tan nan ma fe ra? A xoli n ma Alatala xa jama birin findi

namijonmæe ra naxee bara Ala Xaxili Seniyenxi soto!»

³⁰ Na temui, Munsa nun Isirayila kuntigie naxa gbilen nama ya ma.

³¹ Alatala naxa foye xungbe ramini kelife baa ma, naxan xoni gbege radin nama yonkinde rabilinyi, han kelife yonkinde tagi, a sa doxo feɛɛɛn keren ɲere ra.

³² Nama naxa feɛɛɛn na xonie matongo ra, han na kuye iba. E man naxa feɛɛɛn xonie matongo ra, han kankan naxa paani ya fu soto, litiri keme saxan tongo suuli sama paani naxan kui. E naxa e rafen e xa yonkinde rabilinyi.

³³ Kono beenu Isirayilakae xa ge na sube donde, Alatala naxa xono e ma, a e ɲaxankata a xoxoxe ra.

³⁴ E naxa na yire xili sa Kibiroti Hataawa, na nan na ki «milante gaburi,» barima milante gali nan nagata menni.

³⁵ Nama naxa keli Kibiroti Hataawa, e sa yonkin Xaseroti.

12

Mariyama nun Haruna Munsa xili kanafe

¹ Munsa to nu bara Kusi gine doxo, Mariyama nun Haruna naxa Munsa mafala,

² a falafe ra, «Alatala woyenma Munsa nan gbansan saabui ra? A mu woyenma muxu fan saabui ra?» Alatala naxa na masenyi me.

³ Munsa nu findixi yete magoroe nan na dangife mixi birin na.

⁴ Alatala naxa Munsa, Haruna, nun Mariyama xili keren na, a e birin xa siga hɔrɔmɔlingira. E to siga naa,

⁵ Alatala naxa goro nuxui kui hɔrɔmɔlingira de ra. A naxa Haruna nun Mariyama xili. E firin naxa e maso a ra.

⁶ Alatala naxa a masen e be, «Wo tuli mati n ma masenyi ra. N namijɔnmɛ xɛɛma wo ya ma temui naxe, n nan n yete masenma na kanyi be laamatunyi nan kui. N woyen a ra xiye ra.

⁷ Kɔnɔ n ma konyi Munsa tan gbe mu na na ki xe. A tan findixi n dugutege nan na n ma wali birin kui.

⁸ N na n ma masenyi makenɛnma a be, n mu taali woyenyi rawalima muxu tagi. N nan n yete masenma a be, a fa n niini igbefe. Munfe ra wo mu gaaxu n ma konyi Munsa mafalafe ra?»

⁹ Alatala naxa xɔnɔ e ma, a fa keli e xun ma.

¹⁰ Nuxui to keli hɔrɔmɔlingira xun ma, Mariyama fate naxa rafixe kune ra keren na. Haruna to a to, kune na Mariyama fate birin ma,

¹¹ a naxa Munsa mayandi, «Yandi, n marigi, i naxa muxu raton muxu xa yunubi xa fe ra, muxu naxan nabaxi muxu xa xaxilitarepa kui.

¹² Mariyama naxa lu alo di naxan faxaxi a nga furi, naxan fate seeti borɔxi beenu a bari temui.»

¹³ Munsa naxa a xui rate Alatala ma, «N Marigi, n bara i maxandi, a rayalan!»

¹⁴ Alatala naxa a yaabi, «Xa a baba deye boxun a yatagi, a mu yaagima xe han loxun keren? I xa a ramini pama ya ma. A na ge loxun keren nabade pama yonkinde fari ma, wo noma a rasode wo ya ma.»

¹⁵ Na kui, e naxa a ramini nama ya ma, a xi solofere raba yonkinde fari ma. Nama mu keli e yonkinde han Mariyama naxa ragbilen e ya ma.

¹⁶ Na to ba a ra, nama naxa keli Xaseroti, e naxa sa yonkin Paran gbengberenyi ma.

13

Kanaan bɔxi rabɛnfe

¹ Alatala naxa a masen Munsa bɛ,

² «I xa yarerati keren keren sugandi bɔnsɔɛ birin ya ma, i xa e xɛɛ Kanaan bɔxi ma, e xa sa na bɔxi rabɛn, n naxan fima Isirayilakae ma.»

³ Munsa naxa na mixie xɛɛ kelife Paran gbengberenyi ma, alɔ Alatala a yamarixi ki naxɛ. Na mixi birin findi Isirayila kuntigie nan na.

⁴ E xilie nan yi ki:

Kelife Ruben bɔnsɔɛ ma, Sakuru xa di xɛmɛ Samuwa.

⁵ Kelife Simeyɔn bɔnsɔɛ ma, Xori xa di xɛmɛ Safati.

⁶ Kelife Yuda bɔnsɔɛ ma, Yefune xa di xɛmɛ Kalebi.

⁷ Kelife Isakari bɔnsɔɛ ma, Yusufu xa di xɛmɛ Yigali.

⁸ Kelife Efirami bɔnsɔɛ ma, Nunu xa di xɛmɛ Hoseya.

⁹ Kelife Bunyamin bɔnsɔɛ ma, Rafu xa di xɛmɛ Paliti.

¹⁰ Kelife Sabulon bɔnsɔɛ ma, Sodi xa di xɛmɛ Gadiyeli.

¹¹ Kelife Yusufu xa di, Manasi bɔnsɔɛ ma, Susi xa di xɛmɛ Gadi.

¹² Kelife Dana bɔnsɔɛ ma, Gemali xa di xɛmɛ Amiyeli.

13 Kelife Aseri bɔnsɔɛ ma, Mikayeli xa di xɛmɛ Seturu.

14 Kelife Nafatali bɔnsɔɛ ma, Fofisi xa di xɛmɛ Naxabi.

15 Kelife Gadi bɔnsɔɛ ma, Maki xa di xɛmɛ Geyuweli.

16 Xɛmɛɛ xilie nan na ki Munsa naxee xɛɛ Kanaan bɔxi rabende. Munsa naxa Nunu xa di xɛmɛ Hoseya xili sa Yosuwe.

17 Munsa to e xɛɛ Kanaan bɔxi rabende, a naxa a fala e bɛ, «Wo xa mini Negewi gbengberenyi biri, han wo geyae yire li.

18 Wo xa na bɔxi rabɛn, wo xa a kolon xa mɛnnikae sɛnbɛ gbo, xa e sɛnbɛ mu gbo, xa e wuya, xa e mu wuya.

19 Wo xa a mato xa na bɔxi fan. Wo xa a kolon xa tɛtɛ na na taɛe rabilinyi ma.

20 Wo xa a mato xa na bɔxi fan sansi bɛ, xa wurie gbo naa. Wo kata wo xa fa na sansi bogi ndee ra.» Wɛni bilie bogi singe tɛmɛi nan nu a ra.

21 E naxa sa na bɔxi rabɛn, kelife Sini gbengberenyi ma, han Rexobo, Xamata mabiri.

22 E naxa dangi Negewi gbengberenyi ra, e sa Xebiron li, Anaki xa die Aximan, Sɛsayi, nun Talamayi nu sabatixi dɛnnaxɛ. Xebiron taa nu tixi jɛ solofere beenu Sowan taa xa ti Misira.

23 E to Esekoli gulunba li, e naxa wɛni bili salonyi nde rasegɛ, a tɔnsɔɛ nu na naxan ma. Mixi firin naxa na xanin wuri kuye ra. E naxa xɔrɛ bogi nde fan tongo, a nun bogise nde naxan xili girenadi, naxan maniyɛ kɔɔbɛ ra.

²⁴ E naxa na yire xili sa Esekoli, na nan na ki «Tɔnsɔɛ yire,» na weni bogi tɔnsɔɛ xa fe ra, e naxan baxi.

²⁵ E to xi tongo naani raba naa na bɔxi rabende, e naxa gbilen

²⁶ Munsa, Haruna, nun Isirayila pama yire. E nu na Kadesi, Paran gbengberenyi ma. Menni e naxa dentɛge sa, e na bɔxi sansi bogie masen e be.

²⁷ E naxa a fala Munsa be, «Muxu so ne bɔxi ma, i muxu xee dennaxe. Bɔxi nan a ra, kumi nun xije xelema dennaxe. Na bogise ndee nan ya.

²⁸ Kɔnɔ pama naxan sabatixi na bɔxi ma, e senbe gbo. Tete dɔxɔxi taa birin na. Taa xungbe nan e ra. Muxu Anaki bɔnsɔɛ yati toxi ne naa.

²⁹ Amalekikae sabatixi Negewi gbengberenyi nan ma. Xitikae, Yebusukae, nun Amorikae, nee nan sabatixi geya yire. Kanaankae tan sabatixi baa de nan na, a nun Yuruden xure de ra.»

³⁰ Kalebi naxa pama masabari Munsa ya xɔri, a falafe ra, «Won xee! Won xa yi bɔxi findi won gbe ra. Won nɔma na rabade.»

³¹ Kɔnɔ boore naxee siga bɔxi rabende, nee naxa a fala, «Won mu nɔma sigade na pama gereede. E senbe gbo won be!»

³² Na kui e naxa fe paaxi fala na bɔxi xa fe ra Isirayila pama be. E naxa a fala, «Muxu bɔxi naxan nabenxi, bɔxi nan a ra naxan mixi faxama. Mixi gbangbalanyie sabatixi naa.

³³ Muxu anabiyoroe to ne naxan fatanxi Anaki bɔnsɔɛ ra. Muxu nu luxi ne alo katoe e mabiri. E tan yo, muxu tan yo, e birin a toxi na ki ne.»

14

Isirayilakae Ala matandife

¹ Nama naxa wa xui ramini kɔɛ ra.

² Isirayilaka birin nu fa wɔyɛn na Munsa nun Haruna ma, e nu a fala, «A nu fisa muxu xa faxa Misira, xa na mu a ra yi gbengberen yire.

³ Munfe ra Alatala muxu rasofe yi bɔxi ma, muxu xa faxa santidegema ra, muxu xa die nun muxu xa ginɛɛ xa suxu gere kui. A mu fisa muxu xa gbilen Misira?»

⁴ E naxa a fala e booree bɛ, «Won mangɛ keren ti won xun na, won xa gbilen Misira.»

⁵ Munsa nun Haruna naxa e yatagi rafelen bɔxi ma Isirayilaka birin ya xɔri.

⁶ Nunu xa di xɛmɛ Yosuwe nun Yefune xa di xɛmɛ Kalebi naxa e xa donma ibɔɔ sunnunyi kui. Na mixi firin nu na na xɛɛrae ya ma, naxee siga Kanaan bɔxi rabende.

⁷ E naxa fa yi masenyi ti jama bɛ, «Muxu bɔxi naxan matoxi, bɔxi fanyi fanyi nan a ra.

⁸ Xijɛ nun kumi yire nan a ra. Xa Alatala na won bɛ, a won nasoma nɛ naa, a na bɔxi fi won ma.

⁹ Yandi, wo naxa Alatala matandi. Wo naxa gaaxu na bɔxi mixie ya ra. Won nɔma nɛ e ra. E sanke yo mu na sɔnɔn, barima Alatala na won tan nan bɛ. Wo naxa gaaxu e ya ra.»

¹⁰ Nama nu wama e magɔnɔfe, kɔnɔ Alatala xa nɔrɛ naxa mini hɔrɔmɔlingira Isirayilaka birin ya xɔri.

¹¹ Alatala naxa a masen Munsa bɛ, «Yi jama bama n maberefe mun tɛmɔi? Munfe ra e siikema hali n kaabanakoe rabama e tagi?

12 N xa wuganyi radin e ma, n nee faxa. Na temui n bɔnsɔɛ xungbe senbema nde rakelima ne i saabui ra, naxan dangi e tan na.»

13 Munsa naxa Alatala yaabi, «Misirakae bara a kolon, a i yi jama ramini e xa bɔxi ra i senbe nan na.

14 E bara bekae rakolon. Nee bara a me, a i tan Alatala na i xa jama fɔxɔ ra, a i i yete masenma e ma, a i nuxui sama e xun ma, a i jereɛma e ya ra nuxui kui yanyi ra, nun te kui kɔɛ ra.

15 Xa i fa yi jama birin faxa kerenyi ra, bɔnsɔɛ naxee i xa fe mexi, e a falama ne,

16 «Alatala senbe yo mu nu nɔma yi jama rasode bɔxi ma, a naxan laayidixi e be. Na nan a ra, a e birin sɔntɔ gbengberenyi ma.»

17 «I xa i senbe masen e be, alɔ i tan yati a yitaxi ki naxe, a falafe ra,

18 «N mu xɔnɔma mafuren mafuren. N ma dije nun fanyi gbo. N mixie xa yunubie nun fe jaaxie xafarima. Kɔnɔ n mixi kobi nun mixi fanyi tagi rasama. N benbae xa yunubi sare dɔxɔma e xa die xun ma han bɔnsɔɛ saxan, xa na mu naani.»

19 Yandi, n bara i maxandi, dije i xa jama xa yunubi ma i xa hinne xa fe ra, alɔ i a rabaxi kabi e mini Misira temui naxe.»

20 Alatala naxa a yaabi, «N bara dije i xa maxandi xa fe ra.

21 Kɔnɔ, n bara n kali, nɔndi nan a ra alɔ n to na na, alɔ n ma nɔre naxan bɔxi rafema,

22 xeme naxan birin n ma nɔre nun n ma kaabanakoe toxi, n naxee raba Misira nun gbengberenyi ma, kɔnɔ e fa muruta n ma han sanya fu tuli xɔrɔxɔɛ ra,

²³ nee sese mu bɔxi toma, n naxan laayidixi e benbae bɛ. Naxan birin murutaxi n ma, e sese mu na toma.

²⁴ Kɔnɔ n ma konyi di Kalebi to bira xaxili gbɛtɛ fɔxɔ ra, a fa n nabatu, n a tan nasoma nɛ na bɔxi ma, a naxan nabɛnxi. A bɔnsɔɛ kɛ sɔtɔma nɛ naa.

²⁵ Amalɛkikae nun Kanaankae to sabati gulunba kui, tina wo xa wo mafindi, wo xa gbilen gbengberenyi ma Xulunyumi Baa mabiri.»

²⁶ Alatala naxa a masen Munsa nun Haruna bɛ,

²⁷ «Yi pama kobi n matandima han mun tɛmɔi? N bara Isirayilakae xui mɛ, e naxan falama n bɛ, e ti n kanke.

²⁸ A fala e bɛ, <N bara n kali, nɔndi nan a ra, alɔ n to na na, n a rabama nɛ wo bɛ alɔ n a mɛxi wo dɛ i ki naxɛ.

²⁹ Wo tan matandilae, naxan birin kɔntixi Isirayila pama ya ma, naxee xa simaya bara dangi jɛ mɔxɔjɛn na, wo faxama nɛ yi gbengberenyi ma.

³⁰ Wo mu soma bɔxi ma n naxan laayidi wo bɛ, fo Yefune xa di xɛmɛ Kalebi nun Nunu xa di xɛmɛ Yosuwe.

³¹ Wo xa die, wo naxee ma a e birin faxama gere nan kui, n nee tan nasoma nɛ na bɔxi kui, wo mɛɛxi naxan na.

³² Wo faxama gbengberenyi nan ma, wo furee luma na nɛ.

³³ Wo xa die findima jɛrɛtie nan na jɛ tongo naani bun ma yi gbengberenyi ma. E wo xa yunubi sare xaninma han wo birin faxa gbengberenyi ma.

³⁴ Wo xi xasabi naxan naba na bɔxi rabende, wo na jɛ xasabi rabama gbengberenyi ma wo

xa yunubi xa fe ra. Wo to xi tongo naani raba na bɔxi rabende, wo fama ne je tongo naani rabade gbengberenyi ma, alako wo xa a kolon n na yunubi xɔnxi ki naxe.

³⁵ N tan Alatala, n bara ge wɔyende. N bara na nate tongo yi pama kobi xa fe ra, naxan ti n kanke. E birin faxama ne gbengberenyi ma.»

³⁶ Munsa xa xerae to gbilen kelife na bɔxi rabende, e naxa fe xɔrɔxɔe fala na bɔxi xa fe ra han Isirayila pama naxa ti Munsa kanke.

³⁷ Na kui, Alatala naxa e faxa keren na.

³⁸ Na xerae ya ma, Yefune xa di xeme Kalebi nun Nunu xa di xeme Yosuwe nan gbansan mu faxa.

³⁹ Munsa to na masenyi ti Isirayila pama be, e naxa sunnun ki fanyi.

⁴⁰ E naxa keli subaxe ma, e xa te geya longori. E naxe, «Muxu xa te yire, Alatala dennaxe masenxi muxu be. Muxu bara yunubi raba.»

⁴¹ Munsa naxa e maxarin, «Wo Alatala xa yaamari nan matandife? Wo mu geenima na kui.

⁴² Wo naxa te de, barima Alatala mu na wo ya ma sɔnɔn. Wo naxa a niya wo yaxuie xa no wo ra.

⁴³ Amalekikae nun Kanaankae na wo ya ra, e wo sɔntɔma ne e xa santidegema ra. Wo to bara wo kobe so Alatala ra, a mu na wo foxo ra.»

⁴⁴ Kɔnɔ Isirayila pama mu e tuli mati Munsa ra. E naxa te geya yire, kɔnɔ Alatala xa saate kankira nun Munsa mu keli pama xa yonkinde.

⁴⁵ Amalekikae nun Kanaankae naxee nu sabatixi na geya yire, e naxa goro Isirayilakae xili ma, e fa e bonbo, e e masege han Horoma.

15

Hadiya naxan sama serexee fari

¹ Alatala naxa a masen Munsa be,

² «A fala Isirayilakae be, <Wo na so boxi ma, n dennaxan fixi wo ma sabatide ra,

³ xa wo wama xuruse bafe serexee ra naxan nafan Alatala ma, alo serexee gan daaxi, laayidi serexee, serexee janigexi, xa na mu a ra sali serexee,

⁴ wo xa sansi xori dinxi serexee sa na fari, naxan findima sansi xori dinxi luxutaxi kilo saxan masunbuxi ture litiri keren nun a tagi ra,

⁵ a nun weni litiri keren nun a tagi. Na sama serexee gan daaxi nun serexee janigexi nan xun ma naxan findima yexee ra.

⁶ Xa a sa findi yexee kontonyi nan na, wo xa sansi xori dinxi serexee sa na fari, naxan findima sansi xori dinxi luxutaxi kilo senni masunbuxi ture litiri firin na,

⁷ a nun weni litiri firin. Na ganxi rafan Alatala ma.»

⁸ «Xa wo wama ninge bafe serexee ra naxan nafan Alatala ma, alo serexee gan daaxi, laayidi serexee, xanunteya serexee,

⁹ wo xa sansi xori dinxi serexee sa na fari, naxan findima sansi xori dinxi luxutaxi kilo solomanaani naxan masunbuxi ture litiri saxan na,

¹⁰ a nun weni litiri saxan. Na ganxi rafan Alatala ma.»

¹¹ «Na nan nabama ningee, yexee kontonyie, yexee, nun sie birin be wo naxan bama serexee ra.

¹² Wo xa na raba xuruse birin be.

¹³ Isirayilaka birin xa a raba na ki ne e xa serexee birin be, e naxan bama te ra Alatala be.

14 Xɔɲɛ naxee na wo ya ma, e fan xa a raba na ki e sɛɾɛxɛ gan daaxi bama tɛmɔi naxɛ. Na rafan Alatala ma.

15 Sɛriyɛ keren nan luma ɲama birin bɛ, Isirayilakae ba, xɔɲɛ ba. Keli wo tan ma, han wo xa die, nun nee fan xa die naxee fama, wo tan yo, xɔɲɛ yo, wo birin xa Alatala xa sɛriyɛ suxu na ki nɛ.

16 Isirayilakae ba, xɔɲɛ ba, wo birin na sɛriyɛ keren nun yaamari keren nan bun ma.»

17 Alatala naxa a masen Munsa bɛ,

18 «A fala Isirayilakae bɛ, <Wo na so bɔxi ma, n wo rasofe dɛnnaxɛ,

19 wo fa na bɔxi daxamui sɔtɔ, wo xa nde ba sɛɾɛxɛ ra n bɛ.

20 Wo na taami singe yailan sansi xɔri nɛɛnɛ ra, wo xa nde ba sɛɾɛxɛ ra n bɛ, alɔ wo sansi xɔri nɛɛnɛ nde bama ki naxɛ xɛ xaba tɛmɔi lonyi yire.

21 Wo xa na taami singe ba Alatala bɛ ɲɛ yo ɲɛ.»»

Yunubi ɲanigetare

22 «Xa a sa li wo tantanxi nɛ Alatala xa yaamarie suxufe kui, a naxee masenxi Munsa bɛ,

23 kelife na masen tɛmɔi, han wo xa die xa mamadie xa tɛmɔi,

24 xa wo mu na raba wo ɲanige ra, wo a raba kolontareya kui, ɲama xa tuura ba sɛɾɛxɛ gan daaxi ra, naxan nafan Alatala ma. Wo xa sansi xɔri dinxi sɛɾɛxɛ nun weni sɛɾɛxɛ sa na fari a raba ki ma, a nun sikɔtɛ naxan findima yunubi xafari sɛɾɛxɛ ra.

25 Sɛɾɛxɛdubɛ yunubi xafari maxandima nɛ Isirayilaka birin bɛ. Alatala dipɛma nɛ e ma. Yunubi nan a ra, e mu naxan ɲanigexi. E man

bara serexe gan daaxi ba Alatala be, a nun e xa yunubi xafari serexe.

²⁶ Na yunubi xafarima ne Isirayilaka birin nun e xa xone be, barima tantanyi na nu a ra.»

²⁷ «Xa mixi keren nan yunubi raba janigetarepa kui, a xa si gine keren ba yunubi xafari serexe ra, naxan bara je keren soto.

²⁸ Serexedube yunubi xafari maxandima ne na mixi be naxan yunubi raba janigetarepa kui Alatala ya xori. Na na jon, a xa yunubi bara xafari.

²⁹ Na seriye kerenyi na Isirayilakae nun e xa xone be, yunubi rabafe janigetarepa xa fe ra.

³⁰ Konon xa mixi nde sa Alatala matandi a janige ra, a findi Isirayilaka ra, a findi xone ra, na kanyi kerima ne nama tagi.

³¹ A bara Alatala xa masenyi mabere, a bara Alatala xa seriye matandi. Na kanyi kerima ne nama tagi, barima na yunubi kote doxoxi a xun ma.»

Malabui loxe kanafe

³² Isirayilakae to nu na gbengberenyi ma, e naxa mixi nde li malabui loxe a yege fenfe.

³³ E naxa a xanin Munsanun Haruna xon nama ya xori.

³⁴ E naxa a suxu, konon e mu a jaxankata, barima nate mu nu tongoxi a xa fe ra sinden.

³⁵ Alatala naxa a masen Munsan be, «Yi xeme lan ne a xa faxes. Nama birin xa a magonon han a faxes yonkinde fari ma.»

³⁶ Nama birin naxa a ramini e yonkinde fari ma, e a magonon han a faxes, alo Alatala a yamari Munsan be ki naxe.

Sosee xa seriye

³⁷ Alatala naxa a masen Munsa be,

³⁸ «A fala Isirayilakae be, e tan nun e xa die xa mamadie e xa e xa sosee sanbunyi rafutufutu, e gere gere daaxi xiri a de i.

³⁹ Na sanbunyi rafutufutuxi findima tonxuma nan na wo be, alako wo xa ratu Alatala xa yaamarie ma, wo man xa e rabatu. Wo naxa bira wo yete waxonfee foxo ra, naxee wo ratantanma.

⁴⁰ Na nan a niyama, wo ratuma n ma yaamarie ma, wo man e rabatu. Na kui, wo bara findi n ma mixie ra.

⁴¹ N tan nan Alatala ra, wo Marigi Ala, naxan wo ramini Misira boxi ra, alako n xa findi wo Marigi Ala ra. N tan nan Alatala ra, wo Marigi Ala.»

16*Kora Munsa matandife*

¹ Lewi bonsoe mixi nde, naxan xili Kora, Yisehari xa di xeme, Kehati xa mamadi, a nun Datan nun Abirami, Eliyabi xa di xeme, a nun Peleta xa di xeme Oni, naxan fatanxi Ruben bonsoe ra,

² nee naxa ti Munsa kanke. Isirayilaka mixi keme firin mixi tongo suuli nu na e xanbi ra. Kuntigi belebelee nu na e ya ma.

³ E naxa e malan Munsa nun Haruna xili ma, e fa a fala e be, «Wo xa mangeya bara jon! Isirayila jama birin seniyen, Alatala man na muxu tagi. Munfe ra wo tan gbansan wo yete itema Alatala xa jama xun ma?»

⁴ Munsu to na me, a naxa a yatagi rafelen boxi ma.

⁵ A naxa a fala Kora nun a xa mixie be, «Tina gesege, Alatala fama a masende won be, a xa mixi seniyeñi na naxan na. A tinma na kanyi xa makore a ra, a naxan sugandima.

⁶ Kora, i nun i xa mixie, wo xa surayi gansee tongo.

⁷ Tina wo te sa e kui, wo surayi gan Alatala be. Alatala na naxan sugandi, na nan seniyeñ. Lewi bonsoe, yakosi wo bara a radangi a i.»

⁸ Munsu man naxa a fala Kora be, «Lewi bonsoe xa die, wo wo tuli mati.

⁹ Isirayila Marigi Ala wo sugandixi ne Isirayila nama ya ma a xa horomolingira wali xa fe ra. Wo tan nan tima nama ya ra e sali temui. Na mu wo wasa?

¹⁰ A tinma wo tan Lewi bonsoe xa makore a ra, konon wo wama serexedube wali fan nan nabafe.

¹¹ Na kui i tan nun i xa mixie, wo bara lan wo boore ma wo xa Alatala matandi. Munfe ra wo na tife Haruna kanke?»

¹² Munsu naxa mixi xee Eliyabi xa di xeme Datu nun Abirami xilide, konon e naxa tondi, e fa a fala, «Muxu tan mu sigama.

¹³ Munfe ra i bara muxu ramini boxi ma, kumi nun xije xelema dennaxe, alako muxu xa faya yi gbengberenyi ma? I man wama i yete findife muxu xa mange ra?

¹⁴ I mu muxu rasoxi boxi kui kumi nun xije xelema dennaxe. I mu xee nun weni bilie xa fixi muxu ma ke ra. I joxo a ma, a i nun donxue nan a ra? Muxu mu sigama!»

15 Munsa naxa xɔnɔ ki fanyi ra, a a fala Alatala be, «I naxa e xa serexe suxu. N mu sese tongoxi e yi ra, hali sofale keren. N mu fe jaaxi yo rabaxi e ra.»

16 Munsa naxa a fala Kora be, «I tan nun i xa mixie, tina wo nun Haruna xa ti be Alatala ya i.

17 Wo birin xa wo xa surayi gansee tongo, wo xa surayi sa a ma, wo wo yete masen Alatala be. Na lanma surayi ganse keme firin tongo suuli nan ma. I tan nun Haruna, wo fan xa wo xa surayi ganse suxu wo yi ra.»

18 E birin naxa te sa e xa surayi gansee kui, e naxa surayi sa a ma, e fa ti horomolingira de ra. Munsa nun Haruna fan nu na naa.

19 Kora to jama birin malan Munsa nun Haruna xili ma horomolingira de ra, Alatala xa nore naxa mini jama birin ma.

20 Alatala naxa a masen Munsa nun Haruna be,

21 «Wo mini yi mixie ya ma. N xa e sonto keren na!»

22 Munsa nun Haruna naxa e yatagi rafelen boxi ma, e fa a fala, «Alatala, Daali birin Mange, a lanma i xa xɔnɔ jama birin ma, mixi keren xa yunubi xa fe ra?»

23 Alatala naxa Munsa yaabi,

24 «A fala jama birin be, e xa e makuya Kora, Datan, nun Abirami xonyi ra.»

25 Munsa nun Isirayila kuntigie naxa siga Abirami nun Datan yire.

26 A naxa a fala jama be, «Wo wo makuya yi yunubitoe xa lingirae ra. Wo naxa din e xa see ra, alako wo naxa fa faxa e xa yunubie xa fe ra.»

²⁷ Nama naxa a masiga Kora, Datan, nun Abirami xa lingirae ra. Datan nun Abirami naxa mini e xonyi, e ti naade ra, e nun e xa ginεe, nun e xa die.

²⁸ Munsa naxa a fala, «Wo a kolonma a Alatala nan n tixi yi wali birin na, n tan mu a ra.

²⁹ Xa yi mixie mu faxa kaabanakoe ra, Alatala mu n xεexi.

³⁰ Κονο xa Alatala sa kaabanako raba, a boxi rabi, e goro e πιπε ra a kui, e tan nun e κε birin, na nan a masenma wo βε, a e bara Alatala mabere.»

³¹ Munsa to γε na falade, boxi naxa rabi e sanyi bun ma,

³² a e gerun, Kora nun a xa mixie, e xa lingirae, a nun e xa harige birin.

³³ E naxa goro aligiyama e πιπε ra, e tan nun e sotose birin. Boxi naxa e makoto, e naxa λοε nama tagi.

³⁴ Isirayilaka naxan birin nu na e σετι ma, e naxa e gi e gbelegbele xui ma, e nu fa a fala, «Boxi naxa muxu fan gerun de!»

³⁵ Alatala naxa τε radin na mixi kεμε firin mixi tongo suuli ma, naxee surayi gan hορomolingira δε ra.

17

Nama raseniyenfe

¹ Alatala naxa a masen Munsa βε,

² «A fala Haruna σερεδube xa di xεμε Eleyasari βε, a xa surayi gansee matongo τε xοοra, a xa e τε wolee rawoli yire makuye. Na surayi gansee bara findi se seniyenxie ra Ala βε.

³ Wo xa na surayi gansee matongo, yunubitɔɛ naxee rawalixi e fa faxesa, wo e bɔnbɔ han e xa findi a kebela ra, wo e sa sɛrɛɛbade ma. Se sɛniyɛnxi na a ra barima a nu bara masen Alatala bɛ. Na kui a findi tɔnxuma nan na Isirayilakae bɛ.»

⁴ Eleyasari sɛrɛɛdubɛ naxa na mixie xa surayi gansee wure gbeeli daaxie matongo, na mixi faxaxie naxee rawalixi, a e bɔnbɔ han e findi kebela ra, a e sa sɛrɛɛbade ma.

⁵ Na bara findi tɔnxuma ra Isirayilakae bɛ, alako e xa ratu a ma a mu lan mixi yo xa surayi gan sɛrɛɛ ra bafe Haruna xa die, xa na mu a ra a fan luma nɛ alɔ Kora nun a xa mixie, alɔ Alatala a masenxi Munsa bɛ ki naxɛ.

⁶ Na kuye iba, Isirayila pama naxa wɔyɛn fɔlɔ Munsa nun Haruna ma, a e tan nan Alatala xa pama faxaxi.

⁷ E nu e malanfe tɛmɔi naxɛ Munsa nun Haruna xili ma, e naxa a to nuxui naxa dusu hɔrɔmɔlingira xun ma, Alatala xa nɔrɛ fa mini e ma.

⁸ Munsa nun Haruna naxa siga hɔrɔmɔlingira dɛ ra.

⁹ Alatala naxa a masen Munsa bɛ,

¹⁰ «Wo mini yi mixie ya ma, n xa e sɔntɔ kerɛnyi ra.» Munsa nun Haruna naxa e yatagi rafelen bɔxi ma,

¹¹ Munsa fa a fala Haruna bɛ, «I xa tɛ wole tongo sɛrɛɛbade yire, i a sa i xa surayi gansee kui a nun surayi nde. Na xanin mafuren mafuren pama mabiri, i sa yunubi xafari maxandi e bɛ. Alatala bara a xa xɔnɛ fulun yi pama xili ma, sɔntɔɛ pan bara fɔlɔ.»

¹² Haruna naxa surayi ganse tongo alɔ Munsa a fala a bɛ ki naxɛ, a a gi a siga pama yire, sɔntɔɛ nu bara fɔlɔ dennaxɛ. A naxa surayi ba sɛrɛxɛ ra, a fa yunubi xafari maxandi pama bɛ.

¹³ A naxa ti mixi faxaxie nun mixi jɪjɛɛ tagi. Mixi faxafe naxa dan.

¹⁴ Mixi wulu fu nun naani mixi kɛmɛ solofere nan faxa, bafe Kora xa mixie ra, naxee singe faxa.

¹⁵ Mixi faxafe to dan, Haruna naxa gbilen Munsa yire hɔrɔmɔlingira dɛ ra.

Haruna xa yisuxuwuri

¹⁶ Alatala naxa a masen Munsa bɛ,

¹⁷ «A fala Isirayilakae bɛ, bɔnsɔɛ xunyi birin xa yisuxuwuri keren so i yi ra, na lanma yisuxuwuri fu nun firin naɲ ma. I xa bɔnsɔɛ birin xili sɛbɛ a xa yisuxuwuri ma.

¹⁸ I xa Haruna xili sɛbɛ Lewi bɔnsɔɛ xa yisuxuwuri ma. Bɔnsɔɛ xunyi birin xa yisuxuwuri xa lu naa.

¹⁹ I na yisuxuwurie sama hɔrɔmɔlingira nan kui, saate kankira ya tode ra, n luma n yetɛ masen na wo bɛ dennaxɛ.

²⁰ N mixi naxan sugandixi, na kanyi xa yisuxuwuri mabutunma nɛ. Na kui, n bara a niya Isirayilakae naxa wɔyɛn wo ma sɔnɔn.»

²¹ Munsa naxa dentɛge sa Isirayilakae bɛ. Isirayila bɔnsɔɛ xunyi birin naxa fa e xa yisuxuwuri ra. Na naxa lan yisuxuwuri fu nun firin ma. Haruna gbe nu na e ya ma.

²² Munsa naxa na yisuxuwurie sa Alatala ya i, hɔrɔmɔlingira kui, saate kankira na dennaxɛ.

²³ Na kuye iba, a to so hōrōmōlingira kui, a naxa a to Haruna xa yisuxuwuri, naxan sa Lewi bōnsōe xili ra, a bara butun, a bara fuga, a tamare bogi gbeeli ramini.

²⁴ Munsa naxa yisuxuwuri birin namini, a e masen Isirayila nama be. Bōnsōe xunyi birin to e to, e naxa e gbe tongo.

²⁵ Alatala naxa a masen Munsa be, «I man xa Haruna xa yisuxuwuri ragbilen saatē kankira yire, a xa ragata tōnxuma ra matandilae be. Na kui e mu woyenma n ma, e mu faxesa.»

²⁶ Munsa naxa Alatala xa yaamari rabatu, alo a masen a be ki naxe.

²⁷ Isirayilakae naxa a fala Munsa be, «A mato, muxu birin nōnma ne halaki kui.

²⁸ Naxan yo a maso Alatala xa hōrōmōlingira ra, na kanyu faxama ne. Muxu birin xa sōnto?»

18

Serexedubee nun Lewi bōnsōe xa fe

¹ Alatala naxa a masen Haruna be, «I tan, i xa die, nun Lewi bōnsōe birin, wo tan nan yunubi sōtoma xa fe jaaxi sa raba hōrōmōlingira xa fe ra. Haruna i tan nun i xa die, wo tan nan yunubi sōtoma xa fe jaaxi sa raba serexedubena xa fe ra.

² I xa Lewi bōnsōe mixi birin maso i ra, alako e xa i tan nun i xa die mali wo xa wali ra hōrōmōlingira kui.

³ E i malima hōrōmōlingira wali kui, kōno e naxa makore yirabase seniye xie nun serexebade ra, alako wo naxa faxesa, e tan nun i tan.

⁴ E birama ne i fɔxɔ ra i xa hɔrɔmɔlingira wali birin kui. Mixi gbete yo naxa sunbu wo ra.

⁵ Wo tan gbansan xa seniyeŋ lingira nun serexebade wali raba, alako Alatala naxa fa a xa xɔne ramini Isirayilakae ma sɔnɔn.

⁶ N tan nan wo ngaxakerenyi Lewi bɔnsɔe tongoxi Isirayilakae ya ma n yete be. N bara e sa wo sagoe, e xa wo mali hɔrɔmɔlingira wali raba ra.

⁷ I tan nun i xa die, wo jɔxɔ sama ne wo xa serexedube wali xɔn ma serexebade nun yire seniyeŋxi fisamante, naxan na dugi gbakuxi xanbi ra. N tan nan na wali fixi wo ma. Mixi gbete na a maso na ra, a faxama ne.»

⁸ Alatala naxa a fala Haruna be, «N bara Isirayilakae xa hadiya seniyeŋxi birin fi i tan nun i xa die ma, barima wo tan nan sugandixi serexedube ra abadan.

⁹ See nan yi ki naxee findima i gbe ra se seniyeŋxie tagi, te mu naxee ganxi: Isirayilakae xa serexe, e xa sansi xɔri dinxi serexee, e xa yunubi xafari serexee, nun e xa yete ragbilen serexee. Na serexe seniyeŋxie findima i tan nun i xa die nan gbe ra.

¹⁰ Wo nee donma ne alo se seniyeŋxie. Xeme birin noma e donde wo xa denbaya kui. Se seniyeŋxie nan e ra wo be.»

¹¹ «Se naxee baxi Isirayilakae xa hadiya seniyeŋxie ra, n nee fan fima ne i ma, naxee lintanma n ya i a masenfe ra n gbe na a ra. N na fima i tan, i xa di xeme, nun i xa di ginne ma. I xa mixi birin naxee seniyeŋxi e noma na donde.

12 N man bara daxamui singee fi i ma, Isirayilakae naxee bama n na hadiya ra alo ture, weni, nun sansi xorie dinxi.

13 Daxamui singee e fama naxan birin na n be, na birin findima i gbe nan na. I xa mixi birin naxee seniyenxi e noma na donde.»

14 «Se naxan birin haramuxi mixie be Isirayila boxi ma, a fa findi n gbe ra, n bara na fi i ma.

15 Di singe birin naxee fima Alatala ma, a findi mixi ra, a findi xuruse ra, na birin i tan nan gbe a ra. Kono ibunadama xa di xeme singe nun sube haramuxi xa di xeme singe, e tan xun sarama ne.

16 E na kike keren soto, e xun xa sara gbeti kole suuli, naxan kole keren lanma giramu fu ma.»

17 «Kono i naxa ningee, yexeee, nun sie xa di singee xun sara, barima e tan seniyenxi. E wuli xa kasan serexebade ma, e ture xa ba serexe ra. E xa gan te ra Alatala be. Na rafa a ma.

18 E ganyanyi nun e yirefanyi tabe findima i gbe nan na, barima e nu lintanxi n tan Alatala ya i serexe ra.

19 N bara nee fi i tan nun i xa die ma abadan, Isirayilaka naxan birin bama e xa serexe seniyenxie ra Alatala be. Saate nan a ra naxan mu kanama abadan, i tan nun i bonsoe birin be Alatala ya i.»

20 Alatala naxa a masen Haruna be, «I mu ke sotoma Isirayila boxi ma alo boore. N tan nan findima i ke ra Isirayilakae tagi. I hayi mu na sese gbete ma.»

21 «N Isirayila xa farile fima Lewi bonsoe nan ma sare ra e xa horomolingira wali xa fe ra.

²² Isirayilakae naxa e maso hōrōmōlingira ra sōnōn, alako e naxa fa yunubi sōtō na kui e faxama naxan ma.

²³ Lewi bōnsōe nan hōrōmōlingira xa wali rabama. Xa yunubi yo sa mini na wali kui, e tan nan a kote tongoma. Na findima sēriye nan na wo bē abadan. Lewi bōnsōe mu fama kē sōtōde Isirayilakae tagi.

²⁴ N bara Isirayilakae xa farile fi Lewi bōnsōe ma kē ra. Na nan a toxi, n na a falaxi e xa fe ra, kē mu na e tan bē Isirayilakae tagi.»

²⁵ Alatala naxa a masen Munsa bē,

²⁶ «A fala Lewi bōnsōe bē, <Isirayilakae na fa e xa farile ra, n naxan fima wo ma, wo xa na farile xa farile ba n tan bē.

²⁷ Na kui wo fan a rabama nē alo wo ngaxak-erenyi naxee farile bama e xa sansi xōri ra lonyi yire, xa na mu a ra e xa weni ra e a bunduma temui naxe.

²⁸ Wo xa wo xa hadiya ba n bē Isirayilakae xa farile ra, wo fa a so Haruna sērēxēdubē yi ra.

²⁹ Wo xa farile ba n bē hadiya ra wo naxan birin sōtōma. Wo xa daxamui singee wo naxee sōtōma, wo xa n gbe ba na ra.>

³⁰ I man xa a fala e bē, <Wo na gē daxamui fisamante bade n bē, wo xa na farile ba sansi xōri nun weni ra Lewi bōnsōe bē.

³¹ Wo tan nun wo xa denbayae nōma na donde wo wama a xōn dennaxe. Wo xa hōrōmōlingira wali sare nan na ki.

³² Daxamui singee bafe mu findima yunubi ra wo bē. Wo mu Isirayilakae xa hadiya sēniyenxie maberema na kui, wo man mu faxama na xa fe ra.»»

19

Maraseniyeŋ ye

¹ Alatala naxa a masen Munsa nun Haruna be,

² «Ala xa seriye nan ya. Isirayilakae xa fa ninge ginε gbeeli ra, naxan mu mabenxi, lanyuru mu na naxan ma, a nun naxan mu sari bendunxi sinden.

³ I xa na so Eleyasari serεxεdube yi ra, a kon fa raxaba a ya xori yonkinde fari ma.

⁴ Eleyasari xa a wuli nde kasan a belexεsole ra hεrεmεlingira sode mabiri sanmaya solofere.

⁵ E xa na ninge gundi birin gan a ya xori, a kiri, a sube, a wuli, nun a jaje.

⁶ Na ninge na ganfe tεmui naxe, serεxεdube xa sediri wuri nde, hisopi, nun gεse gbeeli woli te xora.»

⁷ «Na dangi xanbi, serεxεdube xa a fate nun a xa sosee maxa, a fa so yonkin yire, konε a mu seniyeŋxi han nunmare.

⁸ Naxan bara ninge gan, na fan xa a fate nun a xa sosee maxa, konε a mu seniyeŋxi han nunmare.

⁹ Mixi seniyeŋxi nde xa na ninge ganxi xube makε, a sa e sa yire seniyeŋxi yonkinde fari ma. A ragatama menni ne Isirayila jama be alako e xa maraseniyeŋ ye yailan a ra. Yunubi xafari serεxe nan a ra.

¹⁰ Naxan bara na ninge ganxi xube makε, na fan xa a fate nun a xa dugie xa, konε a mu seniyeŋxi han nunmare. Na seriye mu kanama abadan Isirayilakae nun e xaje be.»

¹¹ «Naxan na din mixi faxaxi ra, na kanyi findima seniyeŋtare nan na xi solofere bun ma.

¹² A xa a yete raseniyeŋ yi maraseniyeŋ ye ra a xi saxan nde nun a xi solofere nde ma. Xa a mu a raba na xi saxan nde nun na xi solofere nde ma, a mu seniyeŋma.

¹³ Xa naxan yo din mixi faxaxi fure ra, a fa lu a mu a yete raseniyeŋ, na kanyi xa seniyeŋtareŋa dangima ne Alatala xa hoꝛomolingira ma. Na kanyi xa keru Isirayilakae ya ma. Maraseniyeŋ ye to mu kasanxi a ma, a mu seniyeŋxi.»

¹⁴ «Seriye nan ya: Xa mixi faxa kiri banxi nde kui, mixi yo naxan na naa, xa na mu a ra a soma naa, na kanyi findima mixi seniyeŋtare nan na xi solofere bun ma.

¹⁵ Sesase rabixi birin findima se seniyeŋtare ra.

¹⁶ Mixi naxan din mixi faxaxi ra wula i, naxan bara faxa a jaaxi ra, xa na mu a faxa a yete ma, na kanyi findima seniyeŋtare nan na xi solofere bun ma. Naxan din mixi faxaxi xorie ra, xa na mu a gaburi ra, na fan mu seniyeŋxi xi solofere bun ma.»

¹⁷ «A lanma na mixi mooli xa seniyeŋ ye ra, naxan masunbuxi na ninge ganxi xube ra. Na ye xa tongo dulonyi yire, xa na mu a ra xure.

¹⁸ Xeme seniyeŋxi nde xa hisopi wuri salonyi tongo, a a rasin na ye xora, a a kasan na kiri banxi ma, a kui se birin ma, nun mixie ma naxee nu na a kui. E man xa na raba mixi ra naxan dinxi mixi fure ra, naxan faxa a jaaxi ra, xa na mu a ra naxan faxa a yete ma, a nun mixi naxan dinxi mixi xorie ra, xa na mu gaburi ra.

¹⁹ Mixi seniyeŋxi xa na ye kasan mixi seniyeŋtare ma a xi saxan nde nun a xi solofere nde. A na ge na ra, a xa a yete nun a xa sosee

maxa ye ra, a fa findi mixi seniyeŋxi ra na xi solofere nunmare ra.»

²⁰ «Mixi naxan tondi a yete raseniyeŋde, na kanyi xa keru jama ya ma, barima a xa seniyeŋtareja dangima ne Alatala xa hɔrɔmɔlingira ma. A to mu kasanxi maraseniyeŋ ye ra, a mu seniyeŋxi.

²¹ Yaamari nan na ki Isirayilakae be naxan mu kanama abadan.»

«Maraseniyeŋ ye kasanma naxan ma, na kanyi xa a xa dugie xa. A mu seniyeŋma fo nunmare.

²² Mixi seniyeŋtare dinma se naxan na, na se bara findi se seniyeŋtare ra. Mixi naxan dinma na se ra, na fan findima mixi seniyeŋtare nan na han nunmare.»

20

Meriba ye

¹ Kike singe, Isirayila jama birin naxa so Sini gbengberenyi ma, e yonkin Kadesi. Mariyama naxa faxa menni, e fa a ragata gaburi kui.

² Ye to mu nu na jama yi ra, e naxa e malan Munsa nun Haruna xili ma.

³ E naxa sonxo Munsa ra, e nu a fala, «A nu fisa muxu fan xa faxa Alatala muxu ngaxakerenyie faxa temui naxe.

⁴ Munfe ra wo Alatala xa jama rafaxi yi gbengberenyi ma, muxu nun muxu xa xurusee xa faxa?

⁵ Munfe ra wo muxu raminixi Misira boxi ra fafe ra yi yire jaaxi, xore bili, weni bili, girenadi wuri bili mu na dennaxe. Hali ye min daaxi mu sotoma be.»

⁶ Munsa nun Haruna naxa keli jama ya ma, e e felen hōrōmōlingira sode de ra. Alatala xa nōre naxa mini e ma.

⁷ Alatala naxa a masen Munsa be,

⁸ «I xa yisuxuwuri tongo. I tan nun i taara Haruna, wo xa Isirayilaka birin malan, wo wōyen fanye ra e ya xōri, alako a xa ye ramini. Wo ye raminima ne Isirayila jama be alako e tan nun e xa xurusee xa ye min.»

⁹ Munsa naxa a xa yisuxuwuri tongo naxan nu na hōrōmōlingira kui, alo Alatala a yamari a be ki naxe.

¹⁰ Munsa nun Haruna naxa jama malan na fanye ya ra, e fa a fala e be, «Wo tuli mati, wo tan matandilae. Muxu xa ye ramini wo be yi fanye kui?»

¹¹ Munsa naxa a belexe ite, a fanye bonbo sanya firin a xa yisuxuwuri ra. Ye naxa gbusan fanye ra, jama nun xuruse birin naxa e min.

¹² Kōnō Alatala naxa a masen Munsa nun Haruna be, «Wo to mu laxi n na, Isirayila jama ya xōri, wo xa binye ti n tan Seniyentōe ma, wo tan mu fama yi jama rasode na bōxi ma n dennaxe fixi e ma.»

¹³ E menni nan xili Meriba ye, barima Isirayilakae sōnxō Alatala ma menni ne, a fa a xa seniyyeni masen e be.

Edon mange tondife Isirayila xa dangi

¹⁴ Munsa naxa xerae xee Edon mange ma keli Kadesi, a falafe ra a be, «I ngaxakerenyi Isirayilakae xui nan ya! I a kolon muxu tōrōxi ki naxe.

¹⁵ Muxu benbae goro ne Misira, muxu naxa ne wuyaxi raba menni. Kono Misirakae naxa muxu nun muxu benbae paxankata.

¹⁶ Muxu naxa Alatala maxandi, a fa muxu xui rame. A naxa a xa maleke xee muxu raminide Misira. Yakosi muxu na be Kadesi naxan na wo xa naaninyi ra.

¹⁷ A lu muxu xa dangi wo xa boxi tagi. Muxu mu wo xa xee nun wo xa weni bilie kanama. Muxu mu ye bama wo xa kolonyie kui. Muxu mu sigama kola ma, muxu mu fama yirefanyi ma. Muxu tima wo xa kira xungbe kerenyi nan xon, han muxu dangima wo xa boxi ra temui naxe.»

¹⁸ Edon mange naxa a yaabi, «Wo mu dangima muxu xa boxi ra fefe ma, xa na mu muxu wo gerema santidegema nan na.»

¹⁹ Isirayilakae man naxa a fala a be, «Muxu tan dangima ne kira xon. Xa muxu nun muxu xa xurusee wo xa ye nde min, muxu xa a sare fi. Muxu mu i maxorinxi sese ma, muxu wama dangife ne tun.»

²⁰ Edon mange man naxa a yaabi, «Wo mu dangima feo!» Na kui, a naxa a xa soorie ramini a senbe ki ma Isirayilakae ya ra.

²¹ Edon mange to tondi Isirayilakae xa dangi a xa boxi ra, Isirayila naxa gbilen.

Haruna faxafe

²² Isirayila nama naxa keli Kadesi, e naxa siga Horo geya yire.

²³ Alatala naxa a fala Munsa nun Haruna be Horo geya yire, Edon xa boxi naaninyi ra,

²⁴ «Haruna fama ne a benbae lide aligiyama. A mu soma na boxi ma n dennaxe fixi Isirayilakae

ma, barima wo bara n ma yaamari matandi Meriba ye xa fe ra.

²⁵ I xa Haruna nun a xa di xεmε Eleyasari xanin Horo geya fari.

²⁶ Menni i xa sεrεxεdubε dugie ba Haruna ma, i e ragoro a xa di xεmε Eleyasari ma. Haruna laaxirama nε menni, a fa a benbae yire li.»

²⁷ Munsa naxa a raba, alɔ Alatala a yamari ki naxε. E naxa te Horo geya fari Isirayilaka birin ya xɔri.

²⁸ Munsa naxa Haruna xa donmae ba a ma, a e ragoro a xa di xεmε Eleyasari ma. Haruna naxa laaxira geya fari. Munsa nun Eleyasari naxa goro geya ra,

²⁹ e fa Isirayila jama rakolon Haruna faxa fe ra. Isirayila naxa a jɔn fe raba xi tongo saxan bun ma.

21

Isirayila xa gere singe gbengberenyi ma

¹ Aradi mangε Kanaanka, naxan nu sabatixi Negewi boxi ma, a to a mε, a Isirayila nu minife Atarima kira nan na, a naxa e gere, a ndee findi geelimanie ra.

² Na kui Isirayila naxa yi laayidi tongo Alatala bε, «Xa i yi mixie sa muxu sagoe, muxu e xa taa birin kanama nε.»

³ Alatala naxa tin Isirayilakae xa laayidi ra, a naxa Kanaankae sa e sagoe. Isirayilakae naxa e sɔntɔ, e e xa tae kana. Na nan a toxi e naxa menni xili sa Horoma, naxan wama a falafe «gbaloe.»

⁴ Isirayilakae naxa keli Horo geya ma Xulun-yumi Baa kira xɔn ma, alako e xa Edon bɔxi mabilin. Kɔnɔ limaniya naxa ba e yi ra,

⁵ e fa a fala Alatala nun Munsa bɛ, «Munfe ra wo muxu ramini Misira bɔxi ra, alako muxu xa fa faxa gbengberenyi ma? Taami mu na be, ye mu na be, fo yi donse jaaxi naxan goroma koore ma!»

⁶ Na kui Alatala naxa a niya bɔximasee xa mini e tagi, e xa mixie xin, e mixi gbegbe faxa.

⁷ Nama naxa a fala Munsa bɛ, «Muxu bara yunubi raba wɔyɛnfe ra i tan nun Alatala ma. I xa Alatala maxandi muxu bɛ, a xa yi bɔximasee makuya muxu ra.» Munsa naxa tin na ra, a Alatala maxandi pama bɛ.

⁸ Alatala naxa a yaabi, «Bɔximase misaali rafala wure gbeeli ra, a gbaku wuri kuye ra. Mixi xinxi naxan a ya tima na ra, a mu faxama.»

⁹ Munsa naxa bɔximase yailan wure gbeeli ra, a a gbaku wuri kuye ra. Na temui bɔximasee mixi naxee xinxi, e nu nɔma e ya tide na ra, e kisi.

¹⁰ Isirayilakae naxa siga, e sa yonkin Oboti.

¹¹ E naxa keli menni, e siga Iye Abarimi gbengberenyi ma naxan ya rafindixi Mowaba bɔxi ma, sogetede mabiri.

¹² E to keli menni, e naxa siga Serede gulunba yire.

¹³ E to keli menni, e naxa siga Arinon dɛ ra, xure naxan na Amori bɔxi ma. Arinon nan na naaninyi ra Mowabakae nun Amori kae tagi.

¹⁴ Na nan a ra, a sɛbɛxi sɛbɛli nde kui, Alatala xa geree xa fe na naxan kui,

«Wahebi nun a xa gulunbae na Sufa bɔxi ma,

¹⁵ Arinon gulunbae gexi han Ari,

a findi Mowaba naaninyi nan na.»

¹⁶ E to keli, e naxa siga Beeri, Alatala a masen Munsaxa βε dɛnnaxε, «Naxa malan, n xa e ki ye ra.»

¹⁷ Isirayilakae yi suuki ba na waxati nε:

«Ye xa te kolɔnyi ra!

Wo xa βεeti ba a xa fe ra!

¹⁸ Mangεe nun kuntigie bara a ge, mangε tɔnxuma kanyie.»

¹⁹ E to keli gbengberenyi ma, e naxa siga Matana. E to keli Matana, e naxa siga Naxaliyeli. E to keli Naxaliyeli, e naxa siga Bamoti.

²⁰ E to keli Bamoti, e naxa siga Mowaba gulunba yire, Pisiga geya na dɛnnaxε. Gbengberen yire birin toma nε na geya fari.

²¹ Isirayilakae naxa xεεrae xεε Amorikae xa mangε Sixɔn yire a falafe ra,

²² «Muxu wama girife i xa bɔxi nan ma. Muxu mu xε yire nun weni bogi yire lima. Muxu mu wo xa kolɔn ye minma. Muxu luma mangε xa kira gbansan nan xɔn ma, han muxu i xa bɔxi igiri.»

²³ Sixɔn mu tin e xa dangi a xa bɔxi ma. A naxa a xa sɔorie malan, e naxa mini Isirayilakae xili ma gbengberenyi ma, e fa e gere Yahasi.

²⁴ Isirayilakae naxa geeni. E naxa e xa bɔxi birin tongo keli Arinon xure ma han Yaboko xure, han Amonikae xa bɔxi naaninyi ra. E mu nɔ dangide na ra barima Amonikae sɛnbε nu gbo.

²⁵ Kɔnɔ Isirayilakae naxa Amorikae xa taae birin suxu, e fa sabati nee kui. E naxa Xesibon fan suxu, a nun a xa rabilinyi.

²⁶ Xesibon nan nu na Amorikae xa mange Sixon xa mangataa ra. A nu bara na taa ba Mowaba mange nde yi, a nun a xa boxi birin han Arinon xure.

²⁷ Na nan a ra, bestibae a falama,
«Wo fa Xesibon!
Sixon xa taa xa ti,
a man xa senbe soto!

²⁸ Te bara Xesibon gan,
Sixon xa taa bara kana te ra.
Mowaba boxi xa taa Ari fan bara gan,
naxan xa mixie nu noma Arinon tode.

²⁹ Naxankate na wo be Mowabakae,
wo tan Kemosi xa batulae.
A xa di xemee bara e gi.

A xa di ginxe bara findi geelimanie ra Amori
mange Sixon xonyi.

³⁰ Kɔnɔ muxu bara no e ra,
Xesibon bara kana han Dibon.
Muxu bara e halaki han Nofa,
han a sa Medeba li.»

³¹ Isirayila naxa sabati Amorikae xa boxi ma.

³² Munsa to ge Yaaseri taa rabende, Isirayila naxa Amorikae keri na longori birin ma.

³³ Na dangi xanbi, e naxa kira tongo sigafe ra Basan. Basan mange Ogo nun a xa soorie naxa e li Edereyi.

³⁴ Alatala naxa a masen Munsa be, «I naxa gaaxu a ya ra! N na sama ne i belexe, a nun a xa soorie nun a xa boxi birin. I xa a bonbo alo i Amori mange Sixon bonboxi ki naxe Xesibon.»

³⁵ Isirayilakae naxa Ogo, a xa die, nun a xa soori birin bɔnbɔ. Mixi keren mu nɔ a bade e yi. E naxa a xa bɔxi findi e gbe ra.

22

Balaki xa xɛɛɾaya

¹ Isirayilakae naxa siga e sa yonkin Mowaba fili ma, Yurudɛn xure dɛ, Yeriko ya tagi.

² Siporo xa di xɛmɛ Balaki nu bara a mɛ Isirayilakae naxan nabaxi Amorikae ra.

³ Mowabakae nu bara gaaxu Isirayila jama belebele xa fe ra.

⁴ Na kui, e naxa a fala Madiyan kuntigie bɛ, «Yi jama belebele fama won ma bɔxi birin xun nakanade, alɔ ningee mɛrɛ xun nakanama ki naxɛ.» Balaki nan nu na Mowaba mangɛ ra na tɛmɛi.

⁵ A naxa xɛɛrae xɛɛ Beyori xa di xɛmɛ Balami yire, naxan nu sabatixi Petori, a bari taa xure dɛ ra, a falafe ra, «Nama belebele nde bara keli Misira bɔxi ma, e fa yonkin n ma bɔxi sɛɛti ma.

⁶ Yandi, i xa fa yi jama dankade, barima e sɛnbɛ gbo n bɛ. Tɛmunde, na ki n nɔma nɛ e bɔnbɔde, n e kerɛ yi bɔxi ma. N a kolon, i na duba naxan bɛ, na bara baraka. I man na naxan danka, na fan bara danka.»

⁷ Mowaba kuntigie nun Madiyan kuntigie naxa siga se matoe sare ra Balami xɔn, e fa Balaki xa xɛɛɾaya iba a bɛ.

⁸ Balami naxa a fala e bɛ, «Wo xa kɔɛ radangi be. Alatala na yaabi so n yi, n na falama nɛ wo bɛ.» Na kui, Mowaba kuntigie naxa xi Balami xɔnyi.

⁹ Alatala naxa mini Balami ma, a a maxorin, «Nde na yi mixie ra i naxee rasenexi i xonyi yi ki?»

¹⁰ Balami naxa a yaabi, «Mowaba mange Siporo xa di xeme Balaki nan yi mixie xee, a e xa fa a fala n be,

¹¹ «Nama belebele nde bara keli Misira boxi ma, e fa sabati n ma boxi seeti ma. I xa fa yi pama danka, alako n xa no e keride.»

¹² Alatala naxa a masen Balami be, «I naxa bira yi mixie foxo ra, i naxa na pama danka. Barakatse pama na a ra.»

¹³ Na kuye iba Balami naxa keli, a a fala Balaki xa kuntigie be, «Wo gbilen wo xa boxi ma, barima Alatala mu tinxi n xa bira wo foxo ra.»

¹⁴ Na kui, Mowaba kuntigie naxa gbilen Balaki yire, e a fala a be, «Balami bara tondi birade muxu foxo ra.»

¹⁵ Balaki man naxa kuntigi gbegbe gbete xee, naxee tide dangi a singee ra.

¹⁶ E naxa siga Balami yire, e a fala a be, «Balaki xa masenyi nan ya: «N tan Siporo xa di xeme Balaki, n bara i mayandi, i naxa tondi talufe ra n yire!

¹⁷ N i sare fima ne a fanyi ra. I wama naxan yo xon, n na fima ne i ma. Yandi i xa yi pama danka n be.»

¹⁸ Konso Balami naxa Balaki xa xerae yaabi, «Hali Balaki a xa banxi rafe gbeti nun xema ra, a a so n yi ra, n mu noma fefe rabade n Marigi Alatala mu n yamari naxan na.

¹⁹ Wo naxan nabama, wo fan xa lu be han tina gesege. N man xa Alatala xa masenyi rame.»

20 Alatala naxa mini Balami ma kɔɛ ra, a a masen a bɛ, «Yi mixie to bara fa i xilide, i xa bira e fɔxɔ ra, kɔnɔ n na naxan fala i bɛ, i na nan nabama.»

21 Na kuye iba Balami naxa baki a xa sofale fari, a bira Mowaba kuntigie fɔxɔ ra.

22 Balami sigafe naxa Alatala raxɔnɔ. Alatala xa malekɛ naxa siga kira ibolonde Balami ya ra. A nu dɔxɔxi a xa sofale fari, a xa walike firinyie nu na a fɔxɔ ra.

23 Balami xa sofale to Alatala xa malekɛ to kira tagi, santidegema suxuxi a yi, a ramixi a tɛ i, a naxa keli kira xɔn ma, a so xɛ ra. Balami naxa sofale bɔnbɔ, alako a xa a xun ti kira ra.

24 Alatala xa malekɛ man naxa sa ti e xa kira di xɔn ma weni bilie tɛtɛ firinyie tagi.

25 Sofale to Alatala xa malekɛ to, a naxa a raxɛtɛn tɛtɛ ra, a Balami sanyi xɛtɛn tɛtɛ ra a ɲaaxi ra. Balami naxa gbilen a bɔnbɔ ra.

26 Alatala xa malekɛ man naxa sa ti yire raxɛtɛnxi a fanyi ra. Dangide yo mu nu na.

27 Sofale to Alatala xa malekɛ to, a naxa a sa Balami bun ma. Balami naxa xɔnɔ a ma, a a bɔnbɔ a xa yisuxuwuri ra.

28 Na kui, Alatala naxa sofale dɛ ramini, a a niya a xa a fala Balami bɛ, «A saxan nde nan yi ki i n bɔnbɔma. N munse rabaxi i ra?»

29 Balami naxa a yaabi, «I n matandixi nɛ. Xa santidegema na n yi ra nu, n i faxama nɛ keren na.»

30 Sofale naxa a fala Balami bɛ, «N tan xa mu i xa sofale ra, i tema naxan fari tɛmɛi birin? N darixi yi mɔoli raba ra?» Balami naxa a yaabi, «Ade.»

³¹ Na temui Alatala naxa Balami ya rabi maleke tofe ra, a tixi kira tagi, a xa santidegema baxi a te i, a suxuxi a belexe. Balami naxa a felen, a suyidi keren na.

³² Maleke naxa a maxorin, «Munfe ra i bara i xa sofale bonbo sanya saxan? N faxi ne n xa kira ibolon i ya ra, barima i na kira naxan xon yi ki, murutela xa kira na a ra.

³³ I xa sofale bara i ratanga n ma sanya saxan. Xa a tan mu a ra nu, n bara i faxa nu, konon n mu a tan faxama.»

³⁴ Balami naxa a fala a be, «N bara yunubi raba! N mu nu a kolonxi, i tixi n ya ra. Konon yakosi, xa yi biyaasi mu i kenexi, n xa gbilen n xonyi.»

³⁵ Alatala xa maleke naxa a masen, «Ade, i xa bira yi mixie foxo ra, konon n na masenyi naxan masen i be, i na nan falama.» Na kui, Balami nun Balaki xa xerae naxa siga.

³⁶ Balaki to a me a Balami na fafe, a naxa siga a ralande taa nde ma Arinon xure de ra, Mowaba xa naaninyi yire.

³⁷ A naxa Balami maxorin, «Munfe ra i mu fa n ma xeraya singe xili ma? I joxo a ma n mu noma i sare fide?»

³⁸ Balami naxa Balaki yaabi, «N bara fa i xon, konon n mu noma woyende na ki tun. Alatala masenyi naxan sama n de i, n na nan tun falama.»

³⁹ Balami nun Balaki naxa siga, e so Kiriya Xusoti.

⁴⁰ Balaki naxa ningee nun yexese ba serexe ra, a nde so Balami yi ra a nun kuntigi naxee nu na a foxo ra.

41 Na kuye iba, Balaki naxa Balami xanin Bamoti Baali geya fari. Menni a naxa Isirayila nama seeti nde to.

23

Balami dubafe Isirayila nama be

¹ Balami naxa a fala Balaki be, «I xa serexebade solofere yailan be. I man xa fa tuura solofere nun yexee kontonyi solofere ra.»

² Balami naxan maxorin, Balaki naxa a birin naba. E naxa tuura keren nun yexee kontonyi keren ba serexe ra na serexebade keren keren ma.

³ Balami naxa a fala Balaki be, «I xa lu be serexe fe ma, n tan xa n makuya dondoronti. Temunde Alatala fama minide n ma. A naxan yo masen n be, n a falama i be.» Balami to te geya nde fari,

⁴ Alatala naxa mini a ma. Balami naxa a fala a be, «N bara serexebade solofere yailan, n yexee kontonyi keren nun tuura keren nan baxi a birin keren keren fari.»

⁵ Alatala naxa masenyi fi Balami ma a naxan masenma. A naxa a yita a be, «Siga Balaki yire, i xa yi masenyi ti a be.»

⁶ Balami naxa gbilen Balaki yire, a a li a tixi a xa serexe fe ma, a tan nun Mowaba kuntigie.

⁷ Balami naxa a xa masenyi ti yi ki, «Balaki nan faxi n na kelife Siriya. Mowaba mange nan n xilixi, kelife sogetede geyae kon na.

«Fa, Yaxuba bonsoe danka n be!
I xa xone radin Isirayila ma!»

8 N noma mixi dankade di,
Alatala mu naxan dankaxi?
N noma xonode mixi ma di,
Ala mu xonoxi naxan ma?

9 N e toma kelife geya kon na,
keli yire itexi.

Nama nan a ra,
naxan luma a xati ma,
naxan tagi rasama e nun si gbete ra.

10 Nde noma Yaxuba bonsoe kontide,
konti naxan dangima meyenyi konti ra?
E nu Isirayila nama itaxun doxide naani ra,
nde noma a seeti keren yati kontide?

Ala xa n mali n xa aligiyama li tinxinyi kui.
Ala xa n mali n xa maniya e ra n ma saya kui.»

11 Balaki naxa a fala Balami be, «I munse
rabaxi n na yi ki? N i rafaxi ne n yaxuie dankade,
konon i tan na dubafe e be.»

12 Balami naxa a yaabi, «Alatala na masenyi
naxan sa n de i, n mu lan n xa na fala?»

13 Balaki man naxa a fala a be, «Won xa siga
yire gbete, i noma e tode dennaxe. I seeti keren
nan gbansan toma be, i mu e birin toma. Menni
i noma e birin tode, i fa e danka.»

14 A naxa Balami xanin Sofimi, Pisiga geya
fari. A naxa serexebade solofere yailan menni, a
tuura keren nun yexee kontonyi keren ba serexe
ra na serexebade keren keren ma fari.

15 Balami naxa a fala Balaki be, «I xa lu be i xa
serexe fe ma, n tan xa n makuya dondoronti, n
nun Alatala xa lu yire keren.»

16 Alatala naxa mini Balami ma, a masenyi nde
fi a ma, a fa a fala a be, «Siga Balaki yire, i xa yi
masenyi ti a be.»

17 Balami naxa gbilen Balaki yire, a a li a tixi a xa serexe fe ma, a tan nun Mowaba kuntigie. Balaki naxa a maxorin, «Alatala munse masenxi?»

18 Balami naxa yi masenxi ti a be,

«Balaki, keli.

Siporo xa di xeme, i tuli mati.

19 Ala mixi mu a ra, a mu wule falama.

Adamadi mu a ra, a xa a xaxili masara.

A mu a xui masarama.

A mu nɛɛmuma a xa saatɛ ma.

A mu laayidi kanama.

20 Ala bara n yamari n xa duba yi nama be.

Alatala bara baraka sa e ma.

N mu noma na masarade.

21 Tɔɔre mu luma Yaxuba bɔnsɔɛ ya ma.

Setareɲa mu toma Isirayila.

E Marigi Alatala na e fɔxɔ ra.

Mangɛ xui mɛma nɛ e tagi.

22 Alatala e raminixi Misira bɔxi ra,

senbe na e yi ra alɔ sɛxɛ ninge.

23 Karamɔxɔ wali mu noma Yaxuba bɔnsɔɛ tɔɔɔde.

Sematoe mu noma sese rabade Isirayila xili ma.

A fama falade Yaxuba nun Isirayila xa fe ra,

Ala xa wali mato!

24 Yi nama kelima alɔ yetɛ gine,

e tima alɔ yetɛ xeme,

naxan mu a sama fo a xa sube don,

a naxan faxa,

fo a xa a wuli min.»

25 Balaki naxa a fala Balami be, «Xa i mu wama e dankafe, hali i mu duba e be.»

²⁶ Balami naxa a yaabi, «N mu a fala i be, Alatala na naxan yo masen n be, n na nan falama?»

²⁷ Balaki naxa a fala Balami be, «Awa, won xa siga yire gbete. Temunde Alatala tinma i xa yi nama danka n be menni.»

²⁸ Balaki naxa Balami xanin Peyori geya fari, gbengberenyi toma dennaxe.

²⁹ Balami naxa a fala Balaki be, «Serexebade solofere ti be, i man xa fa tuura solofere nun yexee kontonyi solofere ra.»

³⁰ Balami naxan maxarin, Balaki naxa a birin naba. A naxa tuura keren nun yexee kontonyi keren ba serexe ra na serexebade keren keren ma fari.

24

Balami dubafe Isirayila be

¹ Balami to a to a Alatala nu wama baraka safe Isirayila xa fe ma, a mu karamoxo wali raba alo a darixi a raba ra ki naxe. A naxa a ya rafindi gbengberenyi ma.

² A to Isirayila nama to, e yonkinxi e bonsoe ki ma, Ala Xaxili naxa goro a ma,

³ a fa yi masenyi ti:

«N yi nan masenma,
n tan Beyori xa di xeme Balami,
naxan xa se igbema a fanyi ra,

⁴ naxan Ala xui ramema,
naxan Ala Xili Xungbe Kanyi xa laamatunyi
toma,

naxan fahaamui sotoma suyidi kui.

⁵ Yaxuba, i xa kiri banxie rayabu,

Isirayila, i xa lingirae tofan.

⁶ E gulunba rafema,
e luma alo laakɔɛ naxan na xure dɛ ra,
alo wuri bilie Alatala naxee sixi ye yire.

⁷ Ye mu jɔnma Isirayila nama yi ra,
tunɛ goroma e xa sansie ma a fanyi ra.
E xa mangɛ sɛnbɛ gbo Agaga bɛ,
Isirayila xa mangɛya xili fanyi sɔtɔma nɛ.

⁸ Ala naxa e ramini Misira bɔxi ma,
e sɛnbɛ gbo alo sɛxɛ ninge.
E e yaxuie xun nakanama nɛ,
naxee e xɔri girama,
e e faxama xalie ra.

⁹ E e malabuma nɛ alo yetɛ,
nde suusama e rakelide?
Baraka xa lu mixi bɛ naxan na duba wo bɛ,
danka xa lu mixi bɛ naxan na wo danka!»

¹⁰ Na kui Balaki naxa xɔnɔ Balami ma a jaaxi
ra. A naxa a fala, «N i xili nɛ i xa n yaxuie danka,
kɔnɔ a sanya saxan nde nan yi ki, i na dubafe e
bɛ!»

¹¹ Keli be keren na! Siga i xɔnyi! N nu bara
laayidi tongo i bɛ wali sare xa fe ra, kɔnɔ Alatala
mu tinxi i xa a sɔtɔ!»

¹² Balami naxa a yaabi, «N mu a fala i xa
xɛɛrae bɛ,

¹³ <Hali Balaki a xa banxi nan nafe gbeti nun
xɛɛma ra n bɛ, n mu nɔma sese rabade Alatala
mu n yamari naxan na. Alatala naxan masenma
n bɛ, n nɔma gbilende na fɔxɔ ra?»

¹⁴ Awa, yakɔsi, n na gbilenfe n xɔnyi, kɔnɔ i xa
a kolon yi nama naxan nabama wo ra.»

¹⁵ Na temui Balami naxa yi masenyi ti a bɛ:
«Beyori xa di xɛmɛ Balami xa masenyi nan ya,

naxan see igbema a fanyi ra,

¹⁶ naxan Ala xui ramema,

naxan Ala Xili Xungbe Kanyi xa laamatunyi
toma,

naxan fahaamui sotoma Ala Xili Xungbe saabui
ra.

¹⁷ N fe toxi naxan fama rabade yare.

N fe toxi naxan makuya yakosi ra.

Tunbui nde fama tede kelife Yaxuba xa mixie ma.

Mange tonxuma nde fama kelide Isirayila ya ma.

A Mowaba xun nakanama ne,

a Seti xa die xa fe nonma ne.

¹⁸ Edon xa fe goroma ne,

Seyiri xa fe goroma ne,

konon Isirayila senbe sotoma ne.

¹⁹ Mange nde kelima Yaxuba xa mixie ya ma,

naxan bekae sontoma.»

²⁰ Balami to Amalekikae to, a naxa yi masenyi
ti:

«Amaleki si fisamante na nu a ra,

konon a ranonyi, a bonoma ne!»

²¹ Balami to Kenikae to, a naxa yi masenyi ti:

«Wo sabbatide mabanbanxi,

wo tee saxi fanye nan fari,

²² konon Asuri fama ne wo xun nakanade,

a wo findi geelimanie ra.»

²³ Na temui a naxa a xa masenyi xun dusu:

«Nde noma kiside Ala xa naxankate ma?

²⁴ Kunkuie fama ne kelife Kitimi,

e noma ne Asuri nun Xeberi ra,

konon a ranonyi, e fan xun nakanama ne.»

²⁵ Na dangi xanbi, Balami naxa keli, a gbilen a
xonnyi. Balaki fan naxa keli naa.

25

Isirayilakae xa kuye batu

¹ Isirayilakae to nu yonkinxi Sitimi, e naxa so yene rabafe Mowaba gine ra.

² Na gine naxa Isirayila xeme xili e xa lan e xa serexe ma, naxee nu bama e xa kuyee be.

³ Isirayilakae to Peyori xa Bali kuye batu folo, Alatala naxa xone e ma.

⁴ Alatala naxa a fala Munsa be, a a xa jama yarerati birin gbaku wuri kon na a ya i, a e ya rafindi soge ma, alako a xa xone xa gbilen Isirayila foxo ra.

⁵ Munsa naxa Isirayila kiitise yamari, «Wo xa mixi birin faxes, naxan bara Peyori xa Bali kuye batu!»

⁶ A fefe na fala, Isirayilaka nde naxa fa Madiyanka gine nde ra a ngaxakerenyie ya i. Munsa nun Isirayila jama naxee nu na wafe hoxomolingira sode de ra, naxa na gine nun na xeme to.

⁷ Haruna xa mamadi, Eleyasari xa di xeme Finexasi serexedube to na gine nun na xeme to, a naxa keli, a tanbe tongo,

⁸ a bira na xeme foxo ra kiri banxi kui, a sa a tan nun na gine soko a xa tanbe ra e furi ma keren na. Na temui Alatala xa xone naxa dan.

⁹ Mixi wulu moxonen nun naani nan faxes na gbaloe kui.

¹⁰ Alatala naxa a masen Munsa be,

¹¹ «Haruna serexedube xa mamadi, Eleyasari xa di xeme Finexasi, bara n ma xone ba Isirayilakae ma. N ma xanunteya n ma jama be nu na

a bɔɲɛ kui, a fa a niya a xa na raba. N tan mu Isirayila birin sonto n ma xanunteya xa fe ra.

¹² A fala Finexasi bɛ, n bara bɔɲɛsa saate xiri a tan nun n tan tagi.

¹³ Na saate luma n tan nun a bɔnsɔɛ tagi, e fa findi sɛrɛxɛdubɛɛ ra abadan, barima n ma xanunteya nu na a bɔɲɛ kui, a man fa a niya Isirayilakae xa yunubi xa xafari.»

¹⁴ Isirayilaka naxan faxa e nun na Madiyan ginɛ ra, a nu xili Simiri, Salu xa di xɛmɛ. Simeyɔn bɔnsɔɛ xunyi nde nan nu a ra.

¹⁵ Na ginɛ Madiyanka tan nu xili Kɔsibi, Suuru xa di ginɛ. Madiyan xabilɛ ndee xunyi nan nu a baba ra.

¹⁶ Alatala naxa a masen Munsa bɛ,

¹⁷ «Wo xa Madiyankae gere alɔ yaxuie!

¹⁸ E findixi wo bɛ yaxuie nan na Peyori kuye xa fe ra, nun e maaginɛ Kɔsibi xa fe ra. Kɔsibi findixi e xa yarerati nde xa di ginɛ nan na,

¹⁹ naxan faxa Peyori kuye xa fe kui.»

26

Isirayilakae kontife a firin nde

¹ Na gbaloe to dangi, Alatala naxa a fala Munsa nun Haruna sɛrɛxɛdubɛ xa di xɛmɛ Eleyasari bɛ,

² «Wo xa Isirayila ɲama birin xili sɛbɛ, keli a ɲɛ mɔxɔɲɛn ma han na xanbi, a denbaya ki ma, naxan birin nɔma sɔɔriɲa rabade.»

³ Munsa nun Eleyasari sɛrɛxɛdubɛ naxa a fala Isirayilakae bɛ Mowaba bɔxi ma Yuruden xure sɛɛti ma Yeriko ya i,

4 «Isirayilaka birin xa konti, keli mixi ma naxan bara ꝑe mɔxɔꝑen sɔto han na xanbi, alɔ Alatala a yamari Munsa nun Isirayilakae be ki naxe.» Isirayila bɔnsɔe naxee mini Misira bɔxi ra, nee nan yi ki.

5 A folɔ Isirayila xa di singe Ruben nan ma, a xa die nan yi ki: Xanɔki, Palu,

6 Xesiron, Karimi, nun e xabilɛe.

7 Ruben bɔnsɔe xabilɛe nan na ki. Nee xasabi lan mixi wulu tongo naani nun saxan keme solofere tongo saxan nan ma.

8 Palu xa di xeme Eliyabi

9 nan nu na Nemuweli, Datan, nun Abirami baba ra, naxee keli Munsa nun Haruna xili ma Isirayila kuntigie ya ma. E nun Kora nun a foxirabirɛe to keli Alatala xili ma,

10 bɔxi rabi ne, a fa e birin gerun. Na lɔxɔe Alatala mixi keme firin mixi tongo suuli gan ne te ra, e xa findi misaali ra nama be.

11 Kɔnɔ Kora xa die tan mu faxa na fe kui.

12 Simeyɔn xa die nan yi ki e xabilɛ ki ma: Nemuweli, Yamin, Yakimi,

13 Sera, Sawulu, a nun e xabilɛe.

14 Simeyɔn bɔnsɔe xabilɛe nan na ki. Nee xasabi lan mixi wulu mɔxɔꝑen nun firin, mixi keme firin nan ma.

15 Gadi xa die nan yi ki e xabilɛ ki ma: Sefon, Xagi, Suni,

16 Oseni, Eri,

17 Arodi, Areli, nun e xabilɛe.

18 Gadi bɔnsɔe xabilɛe nan na ki. E xasabi lan mixi wulu tongo naani, mixi keme suuli nan ma.

19 Yuda xa die nan yi ki: Eru nun Onan. Kɔnɔ e tan faxa Kanaan bɔxi nan ma.

²⁰ Yuda xa die nan yi ki e xabile ki ma: Selaha, Peresi, Sera, nun e xabilee.

²¹ Peresi xa die nan yi ki: Xesiron, Xamuli, nun e xabilee.

²² Yuda bõnsõe xabilee nan na ki. E xasabi lan mixi wulu tongo solofere nun senni, mixi keme suuli nan ma.

²³ Isakari xa die nan yi ki e xabile ki ma: Tola, Puwa,

²⁴ Yasubu, Simiron, nun e xabilee.

²⁵ Isakari bõnsõee nan na ki e xabile ki ma. E xasabi lan mixi wulu tongo senni nun naani, mixi keme saxan nan ma.

²⁶ Sabulon xa die nan yi ki e xabile ki ma: Seredi, Elon, Yaxaleeli, nun e xabilee.

²⁷ Sabulon bõnsõe xabilee nan na ki. E xasabi lan mixi wulu tongo senni, mixi keme suuli nan ma.

²⁸ Yusufu xa die nan yi ki e xabile ki ma: Manasi nun Efirami.

²⁹ Manasi xa die nan yi ki: Makiri nun a xabilee. Makiri nan Galadi nun a xabilee soto.

³⁰ Galadi xa die nan yi ki e xabile ki ma: Yeseri, Xeleki,

³¹ Asireli, Sikemi,

³² Semida, Xeferi, nun e xabilee.

³³ Xeferi xa di xeme Selofexadi tan di ginnee nan tun soto. Nee xilie nan yi ki: Maxala, Nowa, Xogala, Milika nun Tirisa.

³⁴ Manasi bõnsõe xabilee nan na ki. E xasabi lan mixi wulu tongo suuli nun firin, mixi keme solofere nan ma.

³⁵ Efirami xa die nan yi ki e xabile ki ma: Sutela, Bekeri, Taxani, nun e xabilee.

³⁶ Sutela xa di nan yi ki: Eran nun a xabilee.

³⁷ Eframi xa die nan na ki. E xasabi lan mixi wulu tongo saxan nun firin, mixi keme suuli nan ma. Yusufu xa mamadie nan na ki e xabile ki ma.

³⁸ Bunyamin xa die nan yi ki e xabile ki ma: Bela, Asibeli, Axirama,

³⁹ Sufami, Xufami, nun e xabilee.

⁴⁰ Bela xa die naxa findi Arade, Naaman, nun e xabilee ra.

⁴¹ Bunyamin xa die nan na ki e xabile ki ma. E xasabi naxa lan mixi wulu tongo naani nun mixi suuli keme senni ma.

⁴² Dana xa die nan yi ki e xabile ki ma. Suxami nun a xabilee. Dana bonsoe nan na ki e xabile ki ma.

⁴³ E xasabi naxa lan mixi wulu tongo senni nun naani, mixi keme naani ma.

⁴⁴ Aseri xa die nan yi ki e xabile ki ma: Yimena, Yisiwi, Beriya, nun e xabilee.

⁴⁵ Beriya xa die nan yi ki: Xeberi, Malakiyeli, nun e xabilee.

⁴⁶ Aseri xa di gine nu xili ne Sera.

⁴⁷ Aserikae nan na ki e xabile ki ma. E xasabi lan mixi wulu tongo suuli nun saxan, mixi keme naani nan ma.

⁴⁸ Nafatali xa die nan yi ki e xabile ki ma: Yaxaseeli, Guni,

⁴⁹ Yeseri, Silemi, nun e xabilee.

⁵⁰ Nafatali bonsoe nan na ki e xabile ki ma. E xasabi lan mixi wulu tongo naani nun suuli, mixi keme naani nan ma.

⁵¹ Isirayilaka konti lanxi mixi wulu keme senni nun keren, mixi keme solofere tongo saxan nan ma.

⁵² Alatala naxa a masen Munsa be,

⁵³ «Kanaan boxi itaxunma na mixie nan ma e bõnsõe xasabi ma, a findi e ke ra.

⁵⁴ Bõnsõe birin ke sõtõma a xa mixie xasabi bere nan na. Bõnsõe naxee xa mixie gbo, i nee gbe ragbo dangi booree ra, naxee xa mixi xurun.

⁵⁵ N tan nan a ragirima bõnsõe birin lan a xa ke naxan sõtõ e bõnsõe xasabi ma.

⁵⁶ Boxi itaxunyi findima Ala xa maragiri nan na, bõnsõe xungbee nun bõnsõe xurie tagi.»

⁵⁷ Lewi bõnsõe nan yi ki naxee konti e xabile ki ma: Gerison, Kehati, Merari, nun e xabilẽe.

⁵⁸ Lewi bõnsõe xabilẽe nan yi ki: Libini, Xebiron, Maxali, Musi, nun Kora. Kehati nu bara Amarama sõtõ.

⁵⁹ Amarama xa ginẽ nu xili ne Yebedi, Lewi xa di ginẽ, naxan bari Misira. A naxa Haruna, Munsa, nun e maagine Mariyama bari Amarama be.

⁶⁰ Haruna nu bara Nadabo, Abihu, Eleyasari, nun Itamari sõtõ di ra.

⁶¹ Nadabo nun Abihu faxa ne, e to serexe gan te ra naxan mu daxa.

⁶² Di xeme naxan konti Lewi bõnsõe ya ma, keli a kike keren ma han na xanbi, a xasabi lan mixi wulu moxõpen nun saxan nan ma. E xa konti nu na a xati ma, barima e mu boxi sõtõ ke ra Isirayilakae ya ma.

⁶³ Munsa nun Eleyasari serexedube na mixie nan konti Mowaba boxi ma Yuruden xure seeti ma Yeriko taa ya i,

⁶⁴ kõõõ Munsa nun Haruna serexedube mixi naxee konti Turusinina gbengberenyi ma, na keren mu nu na Isirayilakae ya ma sõõõn.

⁶⁵ Alatala a fala ne, a nee birin faxama ne gbengberenyi ma. Na kui, e sese mu lu dunija, fo

Yefune xa di xeme Kalebi, nun Nunu xa di xeme Yosuwe.

27

Ginee xa ke seriye

¹ Yusufu xa di xeme Manasi, na fan xa di xeme Makiri, na fan xa di xeme Galadi, na fan xa di xeme Xeferi, na fan xa di xeme Selofexadi, di gine suuli nan soto, naxee nu xili: Maxala, Nowa, Xogala, Milika nun Tirisa.

² Na di ginee nan fa e yete kan dentege Munsa, Eleyasari serexedube, nun Isirayila yareratie be, Isirayila nama birin ya xori, horomolingira sode de ra. E naxa a masen,

³ «Muxu baba mu di xeme soto. A bara faxa gbengberenyi ma, konɔ a mu nu na Kora xa mixie ya ma naxee keli Alatala xili ma. A tan faxa a yete kan xa yunubi rabaxi nan ma.

⁴ Munfe ra muxu baba xili bama a xabile xa mixie ya ma, di xeme to mu na a be? Ke nde so muxu fan yi ra, muxu baba ngaxakerenyie tagi!»

⁵ Munsa naxa e xa fe dentege Alatala be.

⁶ Alatala naxa a masen a be,

⁷ «Selofexadi xa di ginee bara nondi fala. E baba ke so e yi ra alo e baba ngaxakerenyie a soto ki naxe.

⁸ A fala Isirayilakae be, «Xa xeme nde sa faxa di xeme xanbi, wo a ke so a xa di ginee yi ra.

⁹ Xa di gine fan mu na a be, wo a ke so a fafaxakerenyie yi ra.

¹⁰ Xa fafaxakeren yo mu na a be, wo a so a baba fafaxakerenyie yi ra.

¹¹ Xa a sa li, a baba fafaxakeren yo mu na, wo a ke so mixi yi ra, e nun naxan makore e boore ra a xabilɛe ya ma.» Na xa findi yaamari nun seriye ra Isirayilakae be, alo n tan Alatala a yamarixi i be ki naxe.»

Yosuwe findife Munsa ɲɔxɔɛ ra

¹² Alatala naxa a masen Munsa be, «Te yi Abarimi geya fari, alako i xa boxi mato n naxan fima Isirayilakae ma.

¹³ I na ge a matode, i taa masarama ne, i gbilen i benbae ma alo i taara Haruna,

¹⁴ barima wo bara n ma yaamari matandi. Isirayilakae to keli n xili ma ye xoli xa fe ra Kadesi, Sini gbengberenyi ma, wo mu seedeɲɔxɔya raba n ma seniyenyi xa fe ra.»

¹⁵ Munsa naxa a fala Alatala be,

¹⁶ «Alatala, daali birin Marigi Ala, mixi keren doxo pama xun ma,

¹⁷ naxan tima e ya ra, e mini temui nun e so temui, naxan e raminima, a e raso, alako i xa pama naxa lu alo xuruse naxee rabeɲinxi e yete ma, kantama yo mu e be.»

¹⁸ Alatala naxa a masen Munsa be, «I xa Nunu xa di Yosuwe sugandi, Xaxili Seniyenxi na naxan ma. I xa i belexe sa a ma.

¹⁹ I xa a ti Eleyasari serexedube nun pama birin ya xori, i fa yaamarie so a yi ra,

²⁰ i xa mangeya nde xa dangi a ma, alako Isirayila pama birin xa a xui suxu.

²¹ A tima ne Eleyasari serexedube ya i n waxonfe maxorinde geme sugandixie ra. N yaabi naxan fima, a tan nun pama birin perema na nan

ma. E minima Eleyasari serexedube xui nan ma, e soma Yosuwe xui nan ma.»

²² Munsa naxa Alatala xa yaamari raba. A naxa Yosuwe tongo, a sa a ti Eleyasari serexedube nun Isirayila nama ya i,

²³ a a belexe sa a ma, a yaamarie so a yi ra, alo Alatala nu bara a yamari ki naxe.

28

Geesege nun nunmare serexe

¹ Alatala naxa yi masenyi ti Munsa be,

² «A fala Isirayilakae be, e xa n ma serexe ba a ba temui. Donsee nan e ra, naxee ganma, e xiri joxunme te n na.

³ «A fala e be, <Loxo yo loxo wo xa serexe gan daaxi ba Alatala be, yexee firin, naxee bara je keren soto, lanyuru yo mu na naxee ma.

⁴ Keren xa ba geesege, boore xa ba nunmare.

⁵ Wo man xa sansi xori dinxi kilo saxan ba serexe ra naxan namulanxi oliwi ture fanyi litiri keren nun a tagi ra.

⁶ Na serexe gan daaxi mooli nu bama n be Turusinina geya ma, a xiri joxunme nu tema n na.

⁷ Weni serexe litiri keren nun a tagi bama yexee seeti ma Alatala be. Na serexe rafalama yire seniyenxi nan kui.

⁸ Wo xa sansi xori dinxi serexe nun weni serexe ba nunmare temui yexee seeti ma. Na birin findima serexe gan daaxi nan na naxan xiri joxunme tema n tan Alatala ra.»

Malabu loxe serexe

⁹ Malabui ɔɔɔ wo xa yexee firin ba malabu ɔɔɔ serexe ra, naxee bara ne keren soto, lanyuru yo mu na naxee ma. Sansi xori dinxi serexe naxan namulanxi ture kilo senni ra, nun weni serexe xa ba na yexee seeti ma.

¹⁰ Malabui ɔɔɔ serexe gan daaxie nan bama geesege nun nummare serexe ra, a nun e xa weni serexe.

Kike xi singe serexe

¹¹ Kike xi singe birin, wo xa tuura firin ba serexe gan daaxi ra, a nun yexee kontonyi keren, a nun yexee solofere, naxee bara ne keren soto, lanyuru yo mu na naxee ma.

¹² Sansi xori dinxi serexe kilo solomanaani naxan namulanxi ture ra, a xa sa tuura keren yo tuura keren seeti ma. Sansi xori dinxi serexe kilo senni naxan namulanxi ture ra, a xa sa yexee kontonyi keren yo yexee kontonyi keren seeti ma.

¹³ Sansi xori dinxi serexe kilo saxan naxan namulanxi ture ra, a xa sa yexee keren yo yexee keren seeti ma. Serexe gan daaxi nan a ra naxan ganma, a xiri noxunme te n tan Alatala ra.

¹⁴ Weni litiri saxan serexe xa ba tuura birin be. Weni litiri firin serexe xa ba yexee kontonyi birin be. Weni litiri keren serexe xa ba yexee birin be. Na serexe mooli bama kike xi singe birin ne kui.

¹⁵ Wo xa sikote keren fan ba Alatala be yunubi xafari serexe ra, wo geesege nun nummare serexe bama temui naxe, a nun a xa weni serexe.

Sayamaleke Dangi Sali serexe

¹⁶ Kike singe xi fu nun naani nde, wo xa Sayamaleke Dangi Sali raba Alatala xa binye bun ma.

17 Na kike xi fu nun suuli nde findima sali loxoε nan na. Wo xa taami lebinitare don xi solofere bun ma.

18 Na xi singe wo xa wo malan Ala batude. Wo naxa wali yo raba na loxoε.

19 Wo xa yi serexe gan daaxie ba Alatala be na loxoε: tuura firin, yexee kontonyi keren, nun yexee solofere, naxee bara ne keren soto, lanyuru yo mu na naxee ma.

20 Sansi xori dinxi serexe kilo solomanaani naxan namulanxi ture ra, a xa sa tuura keren yo tuura keren seeti ma. Sansi xori dinxi serexe kilo senni naxan namulanxi ture ra, a xa sa yexee kontonyi keren yo yexee kontonyi keren seeti ma.

21 Sansi xori dinxi serexe kilo saxan naxan namulanxi ture ra, a xa sa yexee yo yexee seeti ma.

22 Wo xa sikote keren fan ba Alatala be yunubi xafari serexe ra.

23 Wo xa na serexee sa geesege daaxie xun ma, naxee bama loxoε birin.

24 Wo xa nee ba xi solofere bun ma. Serexe gan daaxi nan a ra naxan ganma, a xiri joxunme te n tan Alatala ra. Nee bama ne loxo yo loxo, e nun boore serexe gan daaxie, nun weni serexe.

25 A xi solofere nde, wo xa wo malan Ala batude. Wo naxa wali gbeteε raba na loxoε.

Xε Xaba Sali serexe

26 Xε Xaba Sali, wo na fa sansi bogi singee serexe ra Alatala xon ma, wo xa wo malan n batude. Wo naxa wali yo suxu na loxoε.

27 Wo xa yi serexee ba: tuura firin, yexee kontonyi keren, nun yexee solofere, naxee bara

Ƶe keren soto. Nee nan bama serexe gan daaxi ra, e xiri Ƶoxunme te n tan Alatala ra.

²⁸ Sansi xori dinxi serexe kilo solomanaani naxan namulanxi ture ra, a xa sa tuura keren yo tuura keren seeti ma. Sansi xori dinxi serexe kilo senni naxan namulanxi ture ra, a xa sa yexee kontonyi keren yo yexee kontonyi keren seeti ma.

²⁹ Sansi xori dinxi serexe kilo saxan naxan namulanxi ture ra, a xa sa yexee keren yo yexee keren seeti ma.

³⁰ Wo xa sikote keren fan ba Alatala be yunubi xafari serexe ra.

³¹ Wo xa na serexee sa boore serexee xun, wo naxee bama loxoε birin, e nun sansi xori nun weni naxan fan bama serexe ra. Lanyuru yo naxa lu na serexee ma.

29

Sara xa Sali serexe

¹ «Kike solofere nde xi singe, wo xa wo malan n batude. Wo naxa wali yo raba na loxoε. Wo sarae fema ne na loxoε.

² Wo xa tuura firin ba serexe gan daaxi ra, a nun yexee kontonyi keren, a nun yexee solofere, naxee bara Ƶe keren soto, lanyuru yo mu na naxee ma.

³ Sansi xori dinxi serexe kilo solomanaani naxan namulanxi ture ra, a xa sa tuura keren yo tuura keren seeti ma. Sansi xori dinxi serexe kilo senni naxan namulanxi ture ra, a xa sa yexee kontonyi keren yo yexee kontonyi keren seeti ma.

⁴ Sansi xori dinxi serexe kilo saxan naxan namulanxi ture ra, a xa sa yexee keren yo yexee keren seeti ma.

⁵ Wo xa sikote keren fan ba Alatala be yunubi xafari serexe ra.

⁶ Na serexe birin sama serexe gan daaxie nan xun, wo naxee bama loxo yo loxo, a nun wo naxee bama kike yo kike a xi singe, a nun sansi xori dinxi nun weni serexe naxan sama e seeti ma. Serexee nan e ra naxee ganma, e xiri joxunme te n tan Alatala ra.»

Yunubi xafari loxoe serexe

⁷ «Na kike solofere nde, xi fu loxoe, wo xa wo malan n batude, wo fan xa sunyi suxu. Wo naxa wali yo raba na loxoe.

⁸ Na loxoe wo xa tuura nde ba serexe gan daaxi ra, a nun yexee kontonyi keren, a nun yexee solofere, naxee bara je keren soto, lanyuru yo mu na naxee ma.

⁹ Sansi xori dinxi serexe kilo solomanaani naxan namulanxi ture ra, a xa sa tuura seeti ma. Sansi xori dinxi serexe kilo senni naxan namulanxi ture ra, a xa sa yexee kontonyi keren yo yexee kontonyi keren seeti ma.

¹⁰ Sansi xori dinxi serexe kilo saxan naxan namulanxi ture ra, a xa sa yexee keren yo yexee keren seeti ma.

¹¹ Wo xa sikote keren fan ba n tan Alatala be yunubi xafari serexe ra, dangife na yunubi xafari serexe, nun na serexe gan daaxie wo naxee bama loxo yo loxo, a nun sansi xori dinxi nun weni serexe.»

Bage Ti Sali serexe

¹² «Kike solofere nde, xi fu nun suuli, wo xa wo malan n batude. Wo naxa wali yo raba na loxoe. Wo xa sali nde raba n tan Alatala be xi solofere bun ma.

¹³ A xi singe, wo xa tuura fu nun saxan, yexɛɛ kontonyi firin, nun yexɛɛ fu nun naani ba sɛrɛxɛ gan daaxi ra n tan Alatala bɛ, naxee bara jɛ keren sɔtɔ, lanyuru yo mu na naxee ma. Wo na e gan, a xiri jɔxunmɛ te n tan Alatala ra.

¹⁴ Sansi xɔri dinxi sɛrɛxɛ kilo solomanaani naxan namulanxi ture ra, a xa sa na tuura fu nun saxan sɛɛti ma. Sansi xɔri dinxi sɛrɛxɛ kilo senni naxan namulanxi ture ra, a xa sa na yexɛɛ kontonyi firin sɛɛti ma.

¹⁵ Sansi xɔri dinxi sɛrɛxɛ kilo saxan naxan namulanxi ture ra, a xa sa na yexɛɛ fu nun naani sɛɛti ma.

¹⁶ Wo xa sikɔtɛ keren fan ba n tan Alatala bɛ yunubi xafari sɛrɛxɛ ra, dangife na yunubi xafari sɛrɛxɛ, nun na sɛrɛxɛ gan daaxie wo naxee bama lɔxɔ yo lɔxɔ, a nun sansi xɔri dinxi nun weni sɛrɛxɛ.»

¹⁷ «Sali xi firin nde, wo xa tuura fu nun firin, yexɛɛ kontonyi firin, nun yexɛɛ fu nun naani ba sɛrɛxɛ ra, naxee bara jɛ keren sɔtɔ, lanyuru mu na naxan ma,

¹⁸ a nun e xa sansi xɔri dinxi nun weni sɛrɛxɛ naxan lanma sɛriyɛ ki ma.

¹⁹ Wo xa sikɔtɛ keren fan ba n tan Alatala bɛ yunubi xafari sɛrɛxɛ ra. Wo xa na sɛrɛxɛɛ sa boore sɛrɛxɛɛ xun, wo naxee bama lɔxɔɛ birin, e nun sansi xɔri nun weni naxan fan bama sɛrɛxɛ ra.»

²⁰ «Sali xi saxan nde, wo xa tuura fu nun firin, yexɛɛ kontonyi firin, nun yexɛɛ fu nun naani ba sɛrɛxɛ ra, naxee bara jɛ keren sɔtɔ, lanyuru mu na naxan ma,

²¹ a nun e xa sansi xɔri dinxi nun weni sɛrɛxɛ naxan lanma sɛriyɛ ki ma.

22 Wo xa sikote keren fan ba n tan Alatala be yunubi xafari serexe ra. Wo xa na serexee sa boore serexee xun, wo naxee bama loxoε birin, e nun sansi xori nun weni naxan fan bama serexe ra.»

23 «Sali xi naani nde, wo xa tuura fu nun firin, yexee kontonyi firin, nun yexee fu nun naani ba serexe ra, naxee bara je keren soto, lanyuru mu na naxan ma,

24 a nun e xa sansi xori dinxi nun weni serexe naxan lanma seriye ki ma.

25 Wo xa sikote keren fan ba n tan Alatala be yunubi xafari serexe ra. Wo xa na serexee sa boore serexee xun, wo naxee bama loxoε birin, e nun sansi xori nun weni naxan fan bama serexe ra.»

26 «Sali xi suuli nde, wo xa tuura fu nun firin, yexee kontonyi firin, nun yexee fu nun naani ba serexe ra, naxee bara je keren soto, lanyuru mu na naxan ma,

27 a nun e xa sansi xori dinxi nun weni serexe naxan lanma seriye ki ma.

28 Wo xa sikote keren fan ba n tan Alatala be yunubi xafari serexe ra. Wo xa na serexee sa boore serexee xun, wo naxee bama loxoε birin, e nun sansi xori nun weni naxan fan bama serexe ra.»

29 «Sali xi senni nde, wo xa tuura fu nun firin, yexee kontonyi firin, nun yexee fu nun naani ba serexe ra, naxee bara je keren soto, lanyuru mu na naxan ma,

30 a nun e xa sansi xori dinxi nun weni serexe naxan lanma seriye ki ma.

31 Wo xa sikote keren fan ba n tan Alatala be yunubi xafari serexe ra. Wo xa na serexee sa boore serexee xun, wo naxee bama loxoε birin, e

nun sansi x̄ori nun weni naxan fan bama serex̄e ra.»

³² «Sali xi solofere nde, wo xa tuura fu nun firin, yex̄e kontonyi firin, nun yex̄e fu nun naani ba serex̄e ra, naxee bara ꝑe keren soto, lanyuru mu na naxan ma,

³³ a nun e xa sansi x̄ori dinxi nun weni serex̄e naxan lanma seriye ki ma.

³⁴ Wo xa sikote keren fan ba Alatala be yunubi xafari serex̄e ra. Wo xa na serex̄e sa boore serex̄e xun, wo naxee bama loxōe birin, e nun sansi x̄ori nun weni naxan fan bama serex̄e ra.»

³⁵ «Sali xi solomasaxan nde, wo xa wo malan n tan Ala batude. Wo naxa wali gbetēe raba na loxōe.

³⁶ Wo xa tuura fu nun firin, yex̄e kontonyi firin, nun yex̄e fu nun naani ba serex̄e gan daaxi ra, naxee bara ꝑe keren soto, lanyuru mu na naxan ma. E xiri ꝑoxunme tema n tan Alatala ma.

³⁷ Wo man xa sansi x̄ori dinxi nun weni serex̄e ba naxan lanma seriye ki ma na tuura, na yex̄e kontonyi, nun na yex̄e xa fe ra.

³⁸ Wo xa sikote keren fan ba n tan Alatala be yunubi xafari serex̄e ra. Wo xa na serex̄e sa boore serex̄e xun, wo naxee bama loxōe birin, e nun sansi x̄ori nun weni naxan fan bama serex̄e ra.»

³⁹ «Serex̄e nan na ki wo lan wo xa naxee ba n tan Alatala be wo xa sali loxōe, bafe wo xa laayidi serex̄e, wo xa serex̄e ꝑanigexie, wo xa serex̄e gan daaxie, wo xa sansi x̄ori dinxi serex̄e, wo xa weni serex̄e, nun wo xa xanunteya serex̄e.»

30

Laayidi tongoxi seriye

¹ Munsa naxa Alatala xa yaamari birin fala Isirayilakae be, a naxee so a yi ra.

² Munsa naxa yi masenyi ti Isirayila bonsɔɛ kuntigie be, «Alatala xa yaamarie nan ya:

³ Xa mixi nde sa laayidi tongo Alatala be fe nde ma, xa na mu a a kali Alatala ra fe nde ma, na kanyi lan ne a xa a xui rakamali. A naxan birin falaxi a de ra, a xa a birin naba.»

⁴ «Gine dimedi na sa laayidi tongo fe nde ma Alatala be, a na a baba xonyi temui naxe, a fa a kali,

⁵ a baba naxa a kolon a a xa di gine bara laayidi nde tongo, a baba mu sese fala na fe kui, a xa na laayidi rakamali.

⁶ Kɔnɔ xa a baba mu tin na laayidi tongoxi ra a me temui, a mu lan na gine dimedi xa a rakamali. Alatala mu a suxuma a ra a baba waxɔnfe xa fe ra.»

⁷ «Gine na sa laayidi tongo, xa na mu a a kali woyenyi mafuraxi ra,

⁸ xa a xa mɔri sa na me, a fa lu a mu sese fala na fe ra, a xa na laayidi rakamali.

⁹ Kɔnɔ xa a xa mɔri mu tin na fe ra a me temui, a mu lan na gine xa a rakamali. Alatala mu a suxuma a ra.»

¹⁰ «Kaape gine na laayidi tongo, xa na mu, gine naxan nun a xa xeme bara fatan, a xa a xa laayidi rakamali.»

¹¹ «Gine xeme taa idɔxɔɛ na laayidi tongo, xa na mu a a kali fe nde ma,

¹² xa a xa mɔri fa na fe kolon, kɔnɔ a mu fefe fala na fe kui, a lanma na gine xa a xa laayidi rakamali.

¹³ A xa mɔri na a xa laayidi me temui naxe, a nɔma tinde a ra, xa na mu a ra, a nɔma tɔnyi dɔxɔde a ma. Alatala mu a suxuma a ra.

¹⁴ A xa mɔri nɔma tinde, xa na mu a ra tondide a xa laayidi nun a xa kali birin na.

¹⁵ Xa a mu fefe falama na fe kui, a xa gine lanma a xa a xa laayidi rakamali. A xa dundui a niyama ne gine xa a xa laayidi rakamali.

¹⁶ Xa a xa mɔri tɔnyi dɔxɔma a xa gine xa laayidi ma temui gbete, a tan nan yati a xa gine xa kote xaninma.»

¹⁷ «Alatala xa seriye nan na ki a naxan fixi Munsa ma, gine xa fe ra naxan na xeme taa, xa na mu a ra gine naxan na a baba xɔnyi.»

31

Madiyankae gerefe

¹ Alatala naxa yi masenyi ti Munsa be,

² «I xa Isirayilakae gbe jɔxɔ Madiyankae ma. I na ge na ra, i fa taa masara.»

³ Munsa naxa a fala jama be, «Xeme ndee xa geresosee tongo Madiyan xili ma wo gbe jɔxɔde Alatala xili ra.

⁴ Isirayila bɔnsɔe birin xa mixi wulu keren keren ba geresoe ra.»

⁵ Isirayila bɔnsɔe fu nun firin naxa mixi wulu keren keren ba geresoe ra.

⁶ Munsa naxa na sɔori wulu fu nun firin xee gere tide. Eleyasari serexedube xa di xeme Finexasi naxa e mati, se seniye xie nu na a yi

ra, a nun sara naxee tɔnxuma fima e boore ma gere xa fe ra.

⁷ E naxa siga gere tide Madiyan xili ma, alɔ Alatala a yamari ki naxɛ Munsa bɛ. E naxa na xɛmɛ birin faxa,

⁸ a nun Madiyan mangɛ suuli: Efi, Rekemi, Suuru, Xuru, nun Reba. E naxa Beyori xa di xɛmɛ Balami fan faxa santidɛgɛma ra.

⁹ E naxa Madiyan ginɛ nun e xa di birin findi konyie ra. E naxa e xa xurusee, e xa gɔɔrɛɛ, nun e harige birin tongo.

¹⁰ E naxa e xa taaɛ nun e xa daaxaɛ gan.

¹¹ E naxa e xa harige, e xa xurusee, nun e xa ginɛ suxu,

¹² e e xanin Munsa, Eleyasari, nun Isirayila nama xɔn ma e yonkinde Mowaba fiili ma, Yurudɛn xure dɛ i, Yeriko ya tagi.

¹³ Munsa, Eleyasari sɛrɛxɛdubɛ, nun Isirayila nama yareratie naxa e ralan yonkinde fari ma.

¹⁴ Munsa naxa xɔnɔ sɔɔri wulu xunyie nun sɔɔri kɛmɛ xunyie ma, a a fala e bɛ,

¹⁵ «Munfe ra wo mu yi ginɛ faxa?

¹⁶ E tan nan bira Balami xa marasi fɔxɔ ra, e Isirayilakɛ ramini Alatala xa kira xɔn Peyori, Alatala fa gbaloe ragoro a xa nama ma.

¹⁷ Awa, yakɔsi, wo xɛmɛ dimɛ birin faxa, a nun ginɛ naxee bara xɛmɛ fe kolon.

¹⁸ Ginɛ dimɛdie tan, wo xa nee ragata wo yɛtɛ bɛ.

¹⁹ Wo tan naxee bara mixi faxa, xa na mu wo bara din fure ra, wo xa lu yonkinde fari ma xi solofere, a nun mixie wo naxee suxu gere kui.

Wo xa wo yete nun wo xa mixi suxuxie raseniye
a xi saxon nde nun a xi solofere nde.

²⁰ Wo xa wo xa dugie fan naseniye a nun see
naxan tan birin nafalaxi kiri, si xabe, nun wuri
ra.»

²¹ Eleyasari serexedube naxa a fala soorie be
naxee gere tixi, «Alatala xa seriye nan ya a
naxan masenxi Munsa be:

²² Xema, gbeti, wure gbeeli, wure, yoxui, nun
sunbui,

²³ se naxan birin mu ganma te ra, wo xa a raso
te, a xa seniye. Na dangi xanbi wo man xa a
raseniye ye ra. Se naxan mu noma rasode te,
wo xa na raseniye ye ra.

²⁴ Wo xa wo xa dugie xa a xi solofere nde.
Na temui wo bara seniye, wo fa noma sode
yonkinde.»

Sotse itaxunfe

²⁵ Alatala naxa a masen Munsa be,

²⁶ «I tan, Eleyasari serexedube, nun Isirayila
kuntigie, wo xa yi mixi suxuxie, nun e xa xurusee
konti, wo naxee sotxi gere kui.

²⁷ I xa e itaxun soorie nun nama ra.

²⁸ Soorie gbe ya ma, i xa mixi keren tongo mixi
keme suuli yo mixi keme suuli tagi, a xa findi n
gbe ra. Xurusee fan na ki, keme suuli yo keme
suuli, i keren nan tongoma e ya ma n be. A
findi ningee ra, a findi sofalee ra, a findi xuruse
lanmae ra.

²⁹ I xa nee ba soorie gbe ya ma, i e fi Eleyasari
serexedube ma Alatala xili ra.

³⁰ Isirayila nama gbe ya ma, i xa mixi keren
tongo mixi tongo suuli yo mixi tongo suuli ya ma,

keme suuli yo keme suuli, i keren nan tongoma e ya ma n be. A findi ninge ra, a findi sofalee ra, a findi xuruse lanmae ra. I xa nee so Lewi bonsoe yi ra, naxee e joxo saxi n ma horomolingira xon.»

³¹ Munsa nun Eleyasari serexedube naxa a raba, alɔ Alatala a yamari ki naxe Munsa be.

³² Naxan soɔ gere kui, a xasabi lan xuruse lanma wulu keme senni wulu tongo solofere nun suuli nan ma,

³³ ninge wulu tongo solofere nun firin,

³⁴ sofale wulu tongo senni nun keren,

³⁵ gine naxee mu xeme fe kolon, mixi wulu tongo saxan nun firin.

³⁶ Seeti naxan fixi soorie ma naxee gere ti, a xasabi naxa lan xuruse lanma wulu keme saxan wulu tongo saxan nun solofere keme suuli ma.

³⁷ Alatala gbe naxan ba na ra, na naxa lan xuruse lanma keme senni tongo solofere nun suuli ma.

³⁸ Ninge naxee fixi soorie ma, e xasabi naxa lan wulu tongo saxan nun senni ma. Alatala gbe naxan ba na ra, na naxa lan ninge tongo solofere nun firin ma.

³⁹ Sofale naxee fixi soorie ma, e xasabi naxa lan wulu tongo saxan keme suuli ma. Alatala gbe naxan ba na ra, na naxa lan sofale tongo senni nun keren ma.

⁴⁰ Mixi naxee fixi soorie ma, e xasabi naxa lan wulu fu nun senni ma. Alatala gbe naxan ba na ra, na naxa lan mixi tongo saxan nun firin ma.

⁴¹ Munsa naxa Alatala gbe fi Eleyasari serexedube ma, alɔ Alatala a yamari ki naxe.

42 Isirayila nana gbe, Munsa naxan so e yi ra,
naxan mu nu na soorie gbe ya ma,

43 na findixi xuruse lanmae wulu keme saxan
tongo saxan nun solofere keme suuli nan ma,

44 a nun ninge wulu tongo saxan nun senni,

45 a nun sofale wulu tongo saxan keme suuli,

46 a nun mixi wulu fu nun senni.

47 Na kui, xurusee ba, mixie ba, tongo suuli
yo tongo suuli, Munsa naxa keren keren ba a
birin na, a e so Lewi bonsɔe yi ra, naxee e ɲɔɔ
saxi Alatala xa hɔrɔmɔlingira xɔn, alɔ Alatala a
yamari a be ki naxe.

Tantui hadiya

48 Soori keme xunyie nun soori wulu xunyie
naxa fa Munsa yire,

49 e a fala a be, «Muxu tan i xa konyie, muxu
bara soorie konti naxee nu na muxu xa yaamari
bun ma. E birin na na.

50 Na nan a toxi muxu bara fa hadiyae ra
Alatala be xunsare xa fe ra. Kankan bara fa a
soɔsee ra alɔ belexerasoe, xurundee, tulirasoe,
nun konmagore xema daaxi.»

51 Munsa nun Eleyasari serexedube naxa na
see xema daaxi rasuxu e yi ra.

52 Na xema birin, soori xunyie fa naxan na
Alatala be, a xasabi lan fayida xema kilo keme
tongo solofere nan ma.

53 Soorie tan nu e gbee ragataxi e yi ra.

54 Munsa nun Eleyasari serexedube naxa na
see birin nasuxu soori wulu xunyie nun soori
keme xunyie yi ra, e a xanin hɔrɔmɔlingira yire,
alako na xa findi tonxuma ra Isirayila xa fe ra
Alatala be.

32

Bɔnsɔɛ saxan dɔxɔfe Yurudɛn xure sogetede

¹ Gɔɔrɛ gbeḡbe nan nu na Ruben bɔnsɔɛ nun Gadi bɔnsɔɛ yi ra. E to a to Yaasɛri nun Galadi bɔxi fan xurusee bɛ,

² e naxa fa Munsa, Eleyasari, nun Isirayila kuntigie yire,

³ e a fala e bɛ, «Taa naxee xili Ataroti, Dibon, Yaasɛri, Nimira, Xesibɔn, Eleyale, Sebami, Nebo, nun Beyon, nee na bɔxi ya ma,

⁴ Alatala naxan saxi Isirayila pama sagoe. Na longori fan xuruse kanyie bɛ alɔ muxu tan.

⁵ Xa wo bara tin a ra, be xa findi muxu tan gbe ra, hali muxu mu dangi Yurudɛn naakiri ma.»

⁶ Munsa naxa Gadi bɔnsɔɛ nun Ruben bɔnsɔɛ yaabi, «Wo ngaxakerenyie sigama nɛ gere sode, wo tan xa lu be?

⁷ Munfe ra wo wama limaniya bafe wo ngaxakerenyie yi ra, alako e naxa dangi Yurudɛn naakiri ma bɔxi ma Alatala naxan fixi e ma?

⁸ Wo babae fan bara na wali mɔoli raba n to e xɛɛ Kanaan bɔxi rabende kelife Kadesi Barineya.

⁹ E to gɛ Esekoli gulunba rabende, e naxa gbilen, e fa limaniya ba Isirayilakae yi ra sofe ra bɔxi ma, Alatala naxan fixi e ma.

¹⁰ Alatala naxa xɔnɔ Isirayilakae ma na lɔxɔɛ, a fa a kali,

¹¹ <Yi mixi naxan birin kelixi Misira, naxan xa simaya bara dangi pɛ mɔxɔpɛn na, e mu soma bɔxi ma n nan n kali Iburahima, Isiyaga nun Yaxuba bɛ dɛnnaxan fife ra e ma, barima e mu bira n fɔxɔ ra e panige birin na.

12 Fo Yefune xa di xεμε Kalebi Kenisika, nun Nunu xa di xεμε Yosuwe, nee nan peti bira n xui foxo ra e panige birin na.»

13 Alatala naxa xonɔ Isirayilakae ma ki fanyi, a fa e rabɛnin gbengberenyi ma jε tongo naani bun ma, han na mixi birin faxa, naxee wali ki mu nu rafan a ma.

14 Wo tan yunubitɔε bonsoεe, wo na birafe wo benbae foxo ra Alatala raxonɔfe ra Isirayila xili ma.

15 Xa wo keli Ala xa kira xon, a man Isirayila rabɛninma nε gbengberenyi ma, e halaki wo xa fe ra.»

16 E naxa siga Munsa yire, e a fala a bε, «Muxu wama gɔɔrε tife be muxu xa xurusee bε, a nun muxu wama yiree yailanfe be muxu xa ginεe nun muxu xa die luma dennaxε.

17 Konɔ muxu bara tin soɔrija rabade muxu ngaxakerenyi Isirayilakae bε han e xa so e sode. Muxu xa die tan luma be muxu xanbi ra nε taa kantaxie kui, alako bekae naxa e tɔɔɔ.

18 Muxu mu gbilenma muxu xɔnyi be, fo Isirayilaka birin a gbe boxi masoɔ.

19 Ke gbete mu luma muxu tan bε sonon Yuruden naakiri ma. Muxu gbe na bebiri Yuruden sogetede nε.»

20 Munsa naxa a fala e bε, «Xa wo sa a raba alo wo a falaxi ki naxε, xa wo wo maxiri sigafe ra gere tide Alatala xili ra,

21 xa wo mu gbilen be Yuruden naakiri ma, han Alatala gε a yaxuie birin keride a ya ra,

22 na temui be bara findi wo xa boxi ra Alatala xili ra. Menni na lu Alatala xa yaamari bun ma,

wo noma gbilende be. Na kui wo bara wo xa laayidi rakamali Isirayila nun Alatala be.»

²³ «Kɔnɔ xa wo mu sa na seriyɛ rabatu, na bara findi yunubi ra wo be, wo na sare fima nɛ.

²⁴ Yakɔsi, wo xa taaɛ ti wo xa ginɛɛ nun wo xa die be. Wo xa gɔɔrɛɛ yailan wo xa xurusee fan be. Kɔnɔ wo naxa nɛɛmu wo xa laayidi tongoxi ma de, wo xa na rakamali.»

²⁵ Gadi bɔnsɔɛ nun Ruben bɔnsɔɛ naxa Munsa yaabi, «Muxu fama nɛ i xa yaamari birin suxude.

²⁶ Muxu xa die, muxu xa ginɛɛ, nun muxu xa xurusee birin luma be Galadi bɔxi ma,

²⁷ kɔnɔ muxu geresosee tongoma nɛ, muxu fa gere so Alatala be alɔ i a yitaxi ki naxɛ, muxu marigi.»

²⁸ Munsa naxa Eleyasari serɛxɛdubɛ, Nunu xa di xɛmɛ Yosuwe, a nun Isirayila kuntigie yamari,

²⁹ «Xa Gadi bɔnsɔɛ nun Ruben bɔnsɔɛ sa dangi Yurudɛn naakiri ma, e siga gere sode Alatala be, han wo naxa na bɔxi birin masɔtɔ temui naxɛ, wo xa Galadi bɔxi so e yi ra kɛ ra.

³⁰ Kɔnɔ xa e mu na raba, e fan xa sabati wo tagi Kanaan bɔxi ma!»

³¹ Gadi bɔnsɔɛ nun Ruben bɔnsɔɛ naxa e yaabi, «Alatala naxan birin masenxi a xa konyi die xa fe ra, muxu a birin nabama nɛ.

³² Muxu dangima nɛ Yurudɛn naakiri ma muxu xa geresosee ra sigafe ra Kanaan bɔxi ma Alatala ya tode ra, kɔnɔ muxu kɛ tan findima bɔxi nan na Yurudɛn bebiri sɛɛti ma.»

³³ Munsa naxa Amoriƙae xa mange Sixɔn nun Basan mange Ogo xa bɔxi nun na rabilinyi fi Gadi

bɔnsɔɛ, Ruben bɔnsɔɛ, nun Yusufu xa di xeme Manasi bɔnsɔɛ seeti keren ma.

³⁴ Gadi xa die naxa gbilen Dibon ti ra, a nun Ataroti, Aroweri,

³⁵ Atiroti Sofana, Yaaseri, Yogbeha,

³⁶ Beti Nimira, nun Beti Xarani. E bara findi taa makantaxie ra, gɔɔree gbegbe fan nu na.

³⁷ Ruben bɔnsɔɛ naxa gbilen Xesibon ti ra, a nun Eleyale, Kiriyatayimi,

³⁸ Nebo, Baali Meyoni, nun Sibima. E naxa na taa ndee xilie masara.

³⁹ Manasi xa di Makiri xa die to Galadi taa suxu, e Amorikae kerri naxee nu sabatixi naa,

⁴⁰ Munsa naxa na taa so e yi ra sabatide ra.

⁴¹ Manasi xa Yayiri fan naxa taa ndee suxu, a e xili Yayiri xa taae.

⁴² Noba fan naxa Kenata taa nun a rabilinyi suxu, a yete xili sa e xun ma.

33

Isirayila xa biyaasi kelife Misira

¹ Nere nan ya Isirayilakae naxan naba e xunde ki ma Munsa nun Haruna xa yaamari bun ma e to keli Misira bɔxi ma.

² Munsa na birin sebexi ne alo Alatala a yamari a be ki naxe.

³ E naxa keli Ramesesi taa Misira bɔxi kike singe xi fu nun suuli. Sayamaleke Dangi Sali loxɔɛ, na kuye iba Isirayilakae naxa mini Misira xɔɔya kui Misiraka birin ya xɔri.

⁴ A a lixi na temui, Misirakae nu na e xa di singee ragatafe, Alatala naxee faxa e ya ma a xa xɔne kui e xa kuyee xa fe ra.

- 5 Isirayilakae naxa keli Ramesesi, e sa yonkin Sukoti.
- 6 E to keli menni, e naxa siga Etama gbengberenyi de ra.
- 7 E to keli Etama, e naxa gbilen Pi Haxiroti mabiri,
Baali Sefon ya tagi, e sa yonkin Migidoli ya ra.
- 8 E to keli menni, e naxa baa igiri,
e siga gbengberenyi ma.
E naxa xi saxan pere raba Etama gbengberenyi ma,
e sa yonkin Mara.
- 9 E to keli menni, e naxa siga Elimi,
e dulonyi fu nun firin nun tugi tongo solofere li dennaxe.
- 10 E to keli menni, e naxa siga Xulunyumi Baa seeti ma.
- 11 E to keli menni, e naxa siga Sini gbengberenyi ma.
- 12 E to keli menni, e naxa sa yonkin Dofika.
- 13 E to keli menni, e naxa siga Alusu.
- 14 E to keli menni, e naxa siga Refidimi,
kono e mu ye to naa.
- 15 E to keli menni, e naxa siga Turusinina gbengberenyi ma.
- 16 E to keli menni, e naxa siga Kibiroti Hataawa.
- 17 E to keli menni, e naxa siga Xaseroti.
- 18 E to keli menni, e naxa siga Ritima.
- 19 E to keli menni, e naxa siga Rimon Peresi.
- 20 E to keli menni, e naxa siga Libina.
- 21 E to keli menni, e naxa siga Risa.
- 22 E to keli menni, e naxa siga Kehelata.
- 23 E to keli menni, e naxa siga Seeferi geya ma.

- 24 E to keli menni, e naxa siga Xarada.
- 25 E to keli menni, e naxa siga Makeloti.
- 26 E to keli menni, e naxa siga Taxati.
- 27 E to keli menni, e naxa siga Tera.
- 28 E to keli menni, e naxa siga Mitika.
- 29 E to keli menni, e naxa siga Xasamona.
- 30 E to keli menni, e naxa siga Mosera.
- 31 E to keli menni, e naxa siga Beneyaakan.
- 32 E to keli menni, e naxa siga Horo Gidigada.
- 33 E to keli menni, e naxa siga Yotobata.
- 34 E to keli menni, e naxa siga Abarona.
- 35 E to keli menni, e naxa siga Esiyon Geberi.
- 36 E to keli menni, e naxa siga Kadesi Sini
gbengberenyi ma.
- 37 E keli menni ne, e naxa siga Horo geya ma,
Edon boxi naaninyi fe ma.
- 38 Isirayilakae xa mini Misira je tongo naani
kike suuli nde xi singe, Alatala naxa Haruna
yamari a xa te Horo geya fari, a xa laaxira menni.
- 39 Haruna nu bara je keme moxoxen nun
saxan soto, a faxa temui Horo geya fari.
- 40 Aradi mange, naxan sabatixi Negewi gbeng-
berenyi Kanaan boxi ma, a naxa a kolon Isirayi-
lakae bara fa.
- 41 Isirayilakae to keli Horo geya yire,
e naxa sa yonkin Salamona.
- 42 E to keli menni, e naxa siga Punon.
- 43 E to keli menni, e naxa siga Oboti.
- 44 E to keli menni, e naxa siga Iye Abarimi,
Mowaba boxi naaninyi ra.
- 45 E to keli menni, e naxa siga Dibon Gadi.

46 E to keli menni, e naxa siga Alamon Dibilatay-
ima.

47 E to keli menni, e naxa siga Abarimi geyae yire,
Nebo geya yatagi.

48 E to keli menni, e naxa siga Mowaba fili ma,
Yuruden xure de ra, Yeriko taa yatagi.

49 E naxa yonkin Yuruden xure de ra,
Beti Yesimoti nun Abeli Sitimi longori Mowaba
fili ma.

Kanaan boxi itaxunfe

50 Alatala naxa a masen Munsa be Mowaba fili
ma, Yuruden xure de ra, Yeriko taa yatagi,

51 «A fala Isirayilakae be, <Wo na Yuruden xure
giri temui naxe sofe ra Kanaan boxi ma,

52 wo mennikae birin faxa. Wo xa e xa
kuye birin kana, naxee masolixi geme ra, naxee
yailanxi wure raxunuxi ra. Wo xa e xa batudee
fan kana.

53 Wo xa na boxi suxu, wo fa sabati naa. N bara
na boxi fi wo ma.

54 Na boxi itaxunma wo ma Alatala xa maragiri
kepa nan ma a xabile ki ma. Naxee bonsoe
xa mixie na wuya, e xa boxi belebele soto.
Naxee bonsoe xa mixie mu wuya, e xa boxi xa
xurun. Alatala a ragirima kankan naxan soto
a bonsoe ki ma.

55 Konso xa wo mu mennikae faxa, e fama
maniyade nooge nan na naxan mixi ya toroma,
xa na mu a ra tunbee naxee mixi fari masoxoma.
E findima ne wo yaxuie ra wo xonyi.

56 Na temui, n e xa yunubi sare doxoma wo tan
nan ma.>>

34

Isirayila bɔxi naaninyie

¹ Alatala naxa a masen Munsa be,

² «A masen Isirayilakae be, <Wo na siga Kanaan bɔxi ma, n naxan fixi wo ma ke ra, a naaninyie nan yi ki:

³ Yirefanyi mabiri, wo xa bɔxi naaninyi sa foloma Sini gbengberenyi nan ma, Edon bɔxi mabiri. Na naaninyi sa foloma Fɔxɔɛ Baa nan ma sogetede mabiri,

⁴ a sa a kɔnkɔrɔn Tali Tede yirefanyi mabiri, a a xun sa Sini, a dangi Kadesi Barineya yirefanyi mabiri, a siga Xasari Adari mabiri, a sa Asimon li.

⁵ A sa keli Asimon, a a kɔnkɔrɔn han Misira dabonyi kui, a fa sa mini Baa Xungbe ma.»

⁶ «A sogekorode naaninyi findima Baa Xungbe nan na.»

⁷ «A kɔɔla naaninyi sa foloma Baa Xungbe nan ma, han a fa dɔxɔ Horo geya ra.

⁸ Kelife ra Horo geya ma, wo xa naaninyi sigama na ki ne han Xamata sode de ra, a sa dɔxɔ Sedade ra.

⁹ A na keli menni, a sigama Sifiron mabiri ne han a sa mini Xasari Enan ma. Wo xa bɔxi naaninyi nan na ki kɔɔla mabiri.»

¹⁰ «A sogetede, wo xa naaninyi sa kelima Xasari Enan nan ma, a siga han Seefami.

¹¹ A keli menni, a siga Ribila, Ayin sogetede biri, a man siga, a sa din tentenyie ra Kinereti baa sogetede biri ra,

¹² a sa mini Yuruden xure ma, a fa sa a rapɔn Fɔxɔɛ Baa ma. Wo xa bɔxi naaninyie nan na ki.»

13 Munsa naxa na yaamari radangi Isirayilakae ma, a falafe ra, «Bɔxi nan yi ki, naxan itaxunma Isirayila bɔnsɔɛ solomanaani nun a tagi ma, alɔ Alatala a ragirixi kankan ma ki naxɛ.

14 Ruben bɔnsɔɛ, Gadi bɔnsɔɛ, nun Manasi bɔnsɔɛ sɛɛti bara e gbe kɛ sɔtɔ e denbaya ki ma,

15 Yurudɛn naakiri ma, Yeriko ya tagi sogetede biri ra.»

16 Alatala naxa a masen Munsa bɛ,

17 «Eleyasari sɛrɛxɛdubɛ nun Nunu xa di xɛmɛ Yosuwe nan yi bɔxi itaxunma.

18 Wo xa yarerati keren keren sugandi bɔnsɔɛ birin kui, naxee lanma yi bɔxi itaxunyi.

19 E xilie nan yi ki:

Yuda bɔnsɔɛ, Yefune xa di xɛmɛ Kalebi.

20 Simeyɔn bɔnsɔɛ, Amixudi xa di xɛmɛ Semuweli.

21 Bunyamin bɔnsɔɛ, Kisilon xa di xɛmɛ Elidada

22 Dana bɔnsɔɛ, Yogoli xa di xɛmɛ Buuki.

23 Yusufu xa di Manasi bɔnsɔɛ, Efodo xa di xɛmɛ Xaniyeli.

24 Eframi bɔnsɔɛ, Sifitan xa di xɛmɛ Kemuweli.

25 Sabulon bɔnsɔɛ, Paranaki xa di xɛmɛ Elisafan.

26 Isakari bɔnsɔɛ, Asana xa di xɛmɛ Palatiyeli.

27 Aseri bɔnsɔɛ, Selomi xa di xɛmɛ Axihudi.

28 Nafatali bɔnsɔɛ, Amixudi xa di xɛmɛ Pedaheli.»

29 Alatala nee nan sugandi Kanaan bɔxi itaxunfe ra Isirayilakae ma.

35

Lewi bɔnsɔɛ xa taaɛ

¹ Alatala naxa a masen Munsa be, Mowaba fili ma, Yuruden xure fe ma, Yeriko ya tagi,

² «A fala Isirayilakae be, e xa taa ndee nun e rabilinyie sugandi e xa boxi kui, e naxee fima Lewi bonsoe ma, e sabatima dennaxe.

³ Lewi bonsoe sabatima na taae nan kui, e xa xurusee luma na rabilinyie.

⁴ Na taa rabilinyie xa gboya sigama ne han nongon wulu keren na taa seti naani birin ma,

⁵ kelife taa tete ma sigafe nongon wulu firin a sogetede biri, a sogeorode biri, a koola ma, nun a yirefanyi ma.»

⁶ «Na taa tongo naani nun solomasaxan ya ma, wo xa taa senni sugandi naxee findima makantadee ra mixie be naxee bara faxe ti e mu a janigexi.

⁷ Wo xa na taa tongo naani nun solomasaxan nun e rabilinyie fi Lewi bonsoe ma.

⁸ Bonsoe naxee xa taae wuya, e xa taa gbegbe fi. Bonsoe naxee xa taae mu wuya, e xa taa dondoronti fi Lewi bonsoe ma.»

⁹ Alatala naxa a masen Munsa be,

¹⁰ «A fala Isirayilakae be, e na Yuruden xure igiri sofe ra Kanaan boxi ma,

¹¹ e xa taae sugandi, naxee findima makantadee ra mixie be naxee bara faxe ti e mu a janigexi.

¹² Na taae nan findima makantadee ra na mixie be, han kiitiseae e makiitima temui naxe. Na kui e xa ratanga mixie ma naxee wama e gbejoxofe, naxee wama e faxafe keren na.

¹³ Wo xa taa senni sugandi na wali xa fe ra,

¹⁴ saxan Yuruden naakiri ma, saxan Kanaan boxi ma. Na taae nan findima wo makantadee ra.

¹⁵ Mixi yo mixi, a findi Isirayilaka ra, a findi xone ra, a findi dangi mixi ra, xa naxan yo sa mixi nde faxa a mu a janigexi, na kanyi noma a nii ratangade na taa sennie nde kui.»

¹⁶ «Kono xa mixi sa mixi bonbo wure ra han a faxa, nii ba nan a ra. A lan ne, a fan xa faxa.

¹⁷ Xa mixi sa mixi bonbo game nan na han a faxa, nii ba nan a ra. A lan ne, a fan xa faxa.

¹⁸ Xa mixi sa mixi bonbo wuri nan na han a faxa, nii ba nan a ra. A lan ne, a fan xa faxa.

¹⁹ Gberoxoe xa na faxeti faxa a a suxuxi temui naxe.

²⁰ Xa mixi nde sa a boore radin ye maraaxui ma, xa na mu, a janige a xa a gono se nde ra, a faxa, faxeti nan a ra.

²¹ Xa mixi nde sa a boore din a belexe ra yaxuya ra, a faxa, faxeti nan a ra. A lan ne, a fan xa faxa. Gberoxoe xa na faxeti faxa a a suxuxi temui naxe.»

²² «Kono xa mixi nde sa a boore radin ye janigetareja kui, xone mu na, xa na mu a se nde woli a ma janigetareja kui,

²³ xa na mu a a gono game ra janigetareja kui, a fa faxa, kono xone nun yaxuya mu na a kui,

²⁴ nama xa a makiiti yi seriye ra gberoxoe xa fe ra.

²⁵ Nama xa a ba gberoxoe yi ra, a a raso makantade kui. A xa lu menni han serexedube kuntigi laaxirama temui naxe, Alatala naxan sugandixi.

²⁶ Kono xa na kanyi sa mini makantade fari ma, a nu bara so dennaxe,

²⁷ gberoxoe fa a to, a faxa, gberoxoe mu findima faxeti ra.

²⁸ Mixi naxan nii bama janigetareja kui, a xa lu makantade han serexedube kuntigi laaxirama temui naxe. Serexedube kuntigi na laaxira temui naxe, mixi naxan nii baxi janigetareja kui, a noma gbilende a xonyi maratange kui.»

²⁹ «Seriye nan ya wo bonsoe be yire birin, temui birin.

³⁰ Faxeti mu lan a xa faxa seede keren xui ma, fo seede wuyaxi.

³¹ Faxeti mu lan a xun xa sara, a xa faxa.

³² Mixi naxan faxe ti janigetareja kui, a mu lan a xun xa sara alako a xa gbilen a xonyi be-nun serexedube kuntigi laaxirama temui naxe.

³³ Wo mu lan wo xa boxi findi boxi seniyyentare ra. Wuli raminife na nan nabama. Faxeti wuli gbansan nan findima boxi xunsare ra.

³⁴ Wo naxa wo xonyi findi yire seniyyentare ra. N tan Alatala sabatixi wo tan Isirayilakae ya ma.»

36

Gine ke kanyi futife seriye

¹ Denbaya xunyi naxee nu na Galadi xabile ya ma, Makiri xa die, Manasi xa mamadie, Yusufu xabilee, nee naxa siga Munsa nun Isirayila denbaya xunyye yire.

² E naxa a fala Munsa be, «Alatala bara a yamari i tan n marigi, i xa yi boxi itaxun Isirayila die ma Alatala xa maragiri keja ma, a xa findi e

ke ra. Alatala man bara i yamari i xa muxu taara Selofexadi xa harige so a xa di ginεe yi ra.

³ Kονο xa na di ginεe sa δοχο βοnsοε gbete xεmεe xον, e ke bama ne muxu βοnsοε ke ra, a sa e xa xεmεe βοnsοεe ke xun ma. Na kui nde bama ne muxu ke ra, naxan fixi muxu βοnsοε ma maragiri kui.

⁴ Χορεya Ne na a li, e ke bama ne muxu benbae ke ra, a sa e xa xεmεe benbae ke xun ma.»

⁵ Munsa naxa Alatala xa yaamari radangi Isirayilakae ma, a falafe ra,

⁶ «Yusufu βοnsοε, wo nondi. Alatala xa yaamari nan ya Selofexadi xa di ginεe be. E xa δοχο xεme xον naxan na xabile nde kui e baba βοnsοε ya ma.

⁷ Sese mu bama Isirayila βοnsοε nde ke ra, a findi βοnsοε gbete ke ra. Birin a benba ke nan xun makantama.

⁸ Di gine ke kanyi xa δοχο xεme xον naxan na xabile nde kui a baba βοnsοε ya ma.

⁹ Sese mu bama Isirayila βοnsοε nde ke ra, a findi βοnsοε gbete ke ra. Birin a benba ke nan xun makantama.»

¹⁰ Selofexadi xa di ginεe naxa Alatala xa yaamari suxu alo Munsa a fala ki naxe.

¹¹ E xilie nan ya: Maxala, Tirisa, Xogala, Milika, nun Nowa. E birin naxa δοχο e δεεxοe xον ma.

¹² E δοχο Manasi xa di xabilee nan xον ma. Na kui e ke naxa lu e benba Yusufu βοnsοε.

¹³ Alatala xa seriye nun yaamarie nan na ki a naxee fixi Munsa ma, katarabi Isirayila ma, e nu na Mowaba fili ma temui naxe, Yuruden xure fe ma, Yeriko ya tagi.

Soso Kitaabuie: Tawureta, Yabura, Inyila
The Holy Bible in the Susu language of Guinea (Soso
Kitaabuie: Tawureta, Yabura, Inyila Bible)

copyright © 2015 Mission Evangélique Réformée Néerlandaise et les
Traducteurs Pionniers de la Bible

Language: Susu

Contributor: Mission Evangélique Réformée Néerlandaise

This translation is made available to you under the terms of the Creative
Commons Attribution-Noncommercial-No Derivatives license 4.0.

You may share and redistribute this Bible translation or extracts from it
in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.
Pictures included with Scriptures and other documents on this site are
licensed just for use with those Scriptures and documents. For other uses,
please contact the respective copyright owners.

2020-11-11

PDF generated using Haiola and XeLaTeX on 18 Apr 2025 from source
files dated 29 Jan 2022

f1d08866-ea3e-5b9b-b506-e7690c5c61d2